

書

龍眠風雅卷六十一目錄

水厓潘 江蜀藻輯

安福吳 雲舫翁 叅

壻陳堂謀大匡

馬敬思 一百六十二首

馬孝思 一百二十五首

馬方思 十三首

馬日思 七首

龍眠風雅卷六十一

木厓潘 江蜀藻輯

馬敬思

字一公號虎岑司馬正誼公之長子卯而遊
角時即有無情最是青銅鏡纔照紅顏又白頭之
句見賞于畝山先生邑屋中至今傳之居家孝友
稊躬端峻慷慨喜交遊于貴顯則落落寡合也中
年暇心竺乾往來皆高僧名衲尤善淡溪僧卧病
前三日夢緇衣人持簡至曰善知識召汝講經淡
溪當同行也此至果見一老僧曰候子久矣速祝
髮遂驚寤自度病必不起易箒時語不及私惟以
老親遠宦未及終養為恨言訖誦般若經合十而
逝家人疾往視淡溪果以是日順世矣非有夙根而何

閨情

妾住大江南君遊大江北相隔未千里何以無消息仰
看秋鴈飛雙雙常比翼作書付歸鴻妾字君能識上寫

前集風雅卷之二十一
早歸來下寫長相憶門內無男兒黃金不得力自昔郎
別時從未離閩闕每日望酒旗遙以占風色

寄遠

有客來遠方裁書苦不長鯉魚結冰雪剖腹訴中腸寄
我相思淚滴滴血成行開書未及讀化作雙鴛鴦

寄遠曲

腰鎌非不利刈草不斷根妾心非不剛感君一夜恩青
松與皎日誓死君家門君今一忒幾時歸妾自織機爲
君衣

打魚行

夾岬桃花水一涯依依楊柳美人家幾時嫁作漁家婦

春去春來水上艤男不耕田女不紡每日江頭捕魚網
郎在船頭試水深女著紅裙自盪槳夜半忽然起風波
舟人擊楫更高歌隔浦篝燈斷復續宛如星宿墜江沱
江流水長魚依藪黃昏牽纜直至西大魚市上換米薪
小魚得錢沽美酒得酒歸來強作懽蓑衣爲被笠爲冠
明朝更向何方去烟雨灘頭把釣竿

畫竹歌

幽人無帽髮常禿芟作雲衣荷作服風塵陌上懶驅車
獨向山中結茅屋家無揚子一丘田日掃瀟湘翠數幅
平常不織亦不耕衣食無營亦自足臨池寫竹若有神
大者衝霄小如鏃何能一日無此君寧可加餐食無肉

持來市上換青錢終日行人不矚目試看笋價賤如蔬
誰肯人間買畫竹

贈張敦復

世人作書多愛肉張子作書能療俗醉中噴墨兩三升
蚤起臨池千百幅魯公善書紙背穿智永嗜草筆頭禿
羲之之後有獻之張芝之後復張旭鍾繇索靖非等倫
世南懷素皆欽服君家古帖滿繩床每日坐觀常閉目
我有尺素薛濤箋乞君數字光茅屋開窓對坐看君書
筆墨淋漓饒起伏縱如歸猿攀故枝瘦如孤鶴凌羣鶩
微如石澗瀉清流振如秋風掃林麓媚如美女臨風整
素衣勇如鐵騎當關獨馳逐古釵屋漏俱有情見者都

忘寒與煥書罷不知春草綠嫋嫋餘風動新竹

江寧古寺羅漢歌

南朝古寺遙相望半是梁唐經手創金釘玉瓦鬱差栽
翡翠珠簾垂甲帳殿中伽佛靜無言大士觀音空色相
粉壁長廊數十間畫徧三千羅漢狀問誰手筆最能工
傳說貫休爲宗匠强者怒目更張拳慈者觀心持竹杖
老者眉拖尺二長少者面似芙蓉放降龍伏虎各飛揚
或背或面各相向我聞繪事須繪神不在葫蘆只依樣
有時海變與山移何處尋君辨真妄

題陳山古松歌

我聞京師報國松霜皮鐵幹如虬龍蟠根屈節非常態

龍耳廬雅卷之十一
上下恒見白雲封以爲造物真奇絕不與凡葩鬪花葉
滄桑閱盡幾興亾兵火猶存飽霜雪每恨不得帝京遊
欲摩挲之却無由陳生聞我長太息脫衣大叫天欲秋
呼童研墨方一斗秃筆狂揮用左手水皴數丈勢縱橫
虎踞龍蟠驚怒走中堂高挂六尺寬過客遊人爭住觀
看者徘徊不忍去彷彿微聞濤聲寒書者得神體亦具
乾皴濕染潑烟霧試與兒輩詰其名無人不道是松樹
傍邊怪石更玲瓏蒼苔數點濃復濃惟愛炎天六月半
我將坐卧其下受松風

風夜懷吳惟子山居

秋杪風尤惡懷人此夜濃晚禾吹落實山葉苦無容半

榻寒依草孤窻遠送鐘杜陵茅屋在捲去已三重

玉屏上人歸自匡廬以茯苓雨茶見貽賦贈

久住匡廬淨山雲滿袖歸茯苓供藥椀笋箬裹茶衣鐘
冷鹿門夢花殘雞樹暉偶來松下坐枝作塵談揮

送澹然上人南下

叩門旋作別買就秣陵船九月袈裟冷三吳木葉天寒
江落僧影霜夜逼人眠相送無相贈新詩待我傳

贈竺怡上人

破衲補秋林柴門閉夕陰孤吟行脚苦瘦骨坐禪深愛
竹常封徑看花許借衾好山當此夜爲我一彈琴

僧善琴

過畫溪別業

猶是當年瀑重來曳杖聽水逢秋際
白山送晚餘青別業空啼鳥書窻
冷照螢殘僧若箇在指點石溪亭

嘲鵲

方書占鵲噪動即遠人歸數日頻啼
久全家一字稀豈真欺客慣亦解信
君非多少空閨婦停針盼夕暉

隔水

隔水問乘槎銀河一帶沙鴛鴦文字
鳥豆蔻女兒花屋不煩金鑄人還比
玉嘉大堤春色好楊柳暗啼鴉

守歲雜感

自學龐居士團團小盡盤酒常隨鍾
衣經亦帶鋤看素薄梁鴻熱誰知范
叔寒堂前分歲燭忽報一年殘

送吳惟子還山

買宅當溪口山深雲亦深俗書同杖
屨採藥荷鋤尋芳草斷車跡松花覆
石陰幽人塵事少流水似彈琴

宜城卽事

宜城三萬戶十載半凋零畫閣蔬爲
圃朱門荻作屏烟波當晚碧汀草出
寒青獨上長亭望漁燈亂客星

江邊蘭若

古徑有蘭若溪橋石補柴竹間安客
枕花裏曬僧鞦爐煮分秋水鐘嚴過
午齋禪堂初止靜香氣散人懷

晏起自嘲

過知多晏起客至屢空回自信貧無
累人言懶不才茶

收霽雨淡門閉午時開未了晨餐事催詩索畫來

七夕

每到雙星節常爲兒女情佳期空悵悵河漢自盈盈
嫁何年別機絲幾日成細看烏鳥頂毛落未全生

玉屏巷哭惟聖上人

老僧周甲子揮手謝屏峰種樹常棲鶴栽松半作龍
禪堂餘故物靈座想遺容識得西方路還來聽舊鐘

題陳隱士山居

美爾深山靜連宵不掩扉秋潭鶴影瘦霜草鹿胎肥
歲酒先儲甕園絲半在機此中多隱者相識姓名稀

江南夜雨

江南一夜雨深覺海棠愁秋氣先臨水人家半在樓
長鎗新市米老釀碧筒油昨過芳蘅地笙歌冷玉鈎

訪悟空上人

此地疑無寺忽傳山下鐘尋來芳草徑踏徧落花踪
卓錫常驚鶴焚香善呪龍虎溪今夜月聽爾說南宗

歲暮

辛苦一年盡依然舊草堂飛將春裏雪添作鬢邊霜
遇事偏多感醫愁未有方但求新歲稔兵不亂農桑

寄遠曲

南塘雙槳日十里藕花多楚客青衫淚吳姬白紵歌
秋山眉有岫春水臉生波不信留人處翻教喚奈何

哭叔

得叔王家少鍾情太傅深死生如是夢婚嫁未完心契
濶非疇咎幽明便古今從茲林下路無復仲容尋

閒居卽事二首

自從搖落後萬事不縈懷山水託茅屋漁樵愛笋蕨
行憐影獨嘉遯及親偕黃葉孤燈夜蕭蕭吹滿堦
慣作溪南釣清白石潭地深泉亦美水淨酒同甘
選勝依花坐移尊藉草談醉來堪枕漱隨意發幽探

送友人入山得泥字

草閣經時閉山猿失伴啼芟夷沽酒路檢校和詩題
花落收蜂蜜書開點燕泥一灣斜抱水終日石橋西

金陵弔古

佳麗江南地詩成弔古哀一杯桃葉渡萬屐雨花臺
死恨王夷甫生慚褚彥回新亭當日淚流落染蒼苔

田家卽事

野老三間屋茅檐不剪茨入門先叱犬設饌止烹雌
採芡來前渚栽篁補舊籬明年春雨好荒壤盡耕菑

武城

登臨無限意弔古有餘情水退魚梁在秋深鴈字明
如何文學地翻以武城名荒市渾遊徧蕭條誦讀聲

江邨暮宿

暫借鄉人宿邨居省市譁橋通樵採路習識釣漁家
谷

口暮逢雨江頭水漲沙夜來風更急吹落隔籬花

贈山中許逸人

小隱碧雲端高懸處士冠樹桑供爾箔種竹作漁竿欲
雨山窓晦將秋草間寒別來籬下菊尊酒共誰看

哭李仲山

欲效林宗哭秋原更憐神孟郊無健子李白是詩人帙
草埋孤塚江蘿薦比隣生來貧到老天道果何因

贈黃冠

小築依山麓加餐坐石牀鶴隨雲共白鹿與鬢同蒼客
壘殘棋局人求舊藥方桃花詢往事彷彿憶劉郎

閨情

萬里遼陽戍空閨獨夜情暗燈隨燼落細雨打窓聲粉
黛啼時損羅衣病後輕昨宵曾夢見數語未分明

張齡若得藤杖甚佳作詩志之索和

未老先防噎裁成白玉鳩尋山堪作伴步履與同遊質
較湘妃渚書讐太乙樓未知宣子意能解百錢不

田家

田家原作苦生事一秋強山郭酒旗亂村翁社鼓忙鳥
啼楓子赤鴈起稻孫黃自嘆先疇薄豐年未免荒

送朱孺綿南下移親櫬二首

年少辭親早松楸失墓門線痕存密處綿性定奇溫訪
寺迷前路尋隣向舊村已知泉下樂况爾復添孫

知子行應哭江帆趁早潮露華摧薤速秋色入蓬驕地
下經三世人間換兩朝魂原還故土不用楚辭招

雨中喜三弟歸里

聞道歸期急思君却更猜客知烏有信人約雁同來布
被多時夢燈花昨夜開柴門三徑在親自掃莓苔

江頭對月

秋入家山夢涼風吹客裳酒分荷葉綠衣惹藕花香河
朔非吾侶江南是故鄉團圓今夜月偏照估人航

舟泊蕪湖

鄉思杳何極迢迢旅客情習懸湖有信風順浪無聲十
里橋邊市三更月下城嚴關無用怒書畫入官征

哭舅氏潘薪孫

憶別古橋頭牽衣上酒樓幾時芳草路一月白楊秋鶴
怨終懷土狐悲欲首丘羊曇今日淚何處是西州

同祝山如遊龍井訪竺公蘭若因留信宿却賦二
首

簪傳三笑意不解俗人聽黃葉正迷路白雲空滿庭琴
生因失譜筆禿爲鈔經一幅佳山水都來入畫屏
不識山僧姓常呼老畫師惜花剛野蔓種竹護疎籬面
對十年壁心空五蘊司懶殘爐裏芋分療鄴侯饑

李未盡先生索山居詩

君姓卽山姓公麟舊有名步隨筇杖健寒愛木綿輕數

兩供饘粥衰年節送迎只因兒女累婚嫁未忘情

江行卽景限青字

野埠漁罾密舟過水亦腥蓼花殘尚紫楊柳冷猶青古
刹分僧火寒槎共客星數峰天際外何處弔湘靈

李仲山至

數載曾爲汗漫遊憐君雙鬢定緣愁到門客至陳驚座
下筆詩成趙倚樓楚澤蘭叢空有怨吳山木葉早知秋
邇來自有江淹夢好寫花牋咏玉鈎

署中別弟

故鄉浪說滄州好到此蕭條卽欲還薄宦門庭真似水
過河地勢總無山風催槐葉官郵冷霜落蒹葭卧閣閒

私把萊衣教弱弟承權代我奉慈顏

晚泊

蓼花初盡雁南飛十月涼風吹葛衣野店鷄豚因客貴
僧房燈火避兵稀相逢岐路何須泣但聽鄉音卽當歸
隔岼戍樓鳴夜鼓旅人驚夢到柴扉

贈僧

小隱深居絕送迎偶然留客鬪楸枰庭生蔓草原無種
手植山花應有名虎爲過溪常欲嘯猿知入定不聞聲
袈裟自愛頭如雪懶去江湖卓錫行

喜無可大師歸里門

雨花臺畔送春歸久客還家丁令威天地不能容白髮

音耶凡雅卷之十一
君王已許著緇衣幾迴蓮社空兼色一任桑田是與非
烏鵲別來尋舊樹遶枝三匝欲何依

遊龍眠經左氏別業

十里黃雲一草廬宛如谷口子真居僧歸月夜常同榻
人對春燈正讀書蕉葉錯疑山鹿夢桃花驚散武陵漁
他年點染公麟筆惟有龍眠畫不如

贈潘蜀藻表兄

石經齋裏好題詩風雅吾鄉獨爾師南阮居常憐北阮
東施人欲笑西施不嫌落魄垂青眼自分無才愧白眉
近日望君何所似儼然天半一峩嵒

柬張齡若

不改衣裳不變名依然魯國舊諸生松雲贈客陶徵士
婚嫁留人向子平我欲買山先問壑君能畫水獨成聲
南州一榻容高卧閒倚秋屏看月明

訪李當衡先輩

青衫雙袖兩朝前自築柴扉遠市廛萬劫有情皈大士
十年無病學神仙心中覓句成詩癖老太棲心託畫禪
餘得日長高枕後閒讐秋水馬蹄篇

喜范一范城居

我欲求田愁近市君胡問舍轉居城畏人小築花開徑
將母餘年筆代耕雖說漁樵疎野客免驅鷄犬避官兵
移家覓得墻東地不費招尋日日行

偶題

庭前三徑半成荒
客至無童報草堂
晴檢蠹衣開藥臼
塵移鼠跡上琴牀
病來幸有高僧問
醉卧何嫌少婦傍
瑟瑟霜催紅葉老
不知秋色爲誰忙

贈元白上人

遠公避世不離羣
手種黃精與客分
杖挂一瓶揚子水
足穿兩屐慧山雲
齋從午磬聲中度
葉在寒階定裏聞
向曉數椽茅屋暖
白頭日日負餘曛

讀史

把杯擊箸恨如何
一代興亡自古多
烏鵲夜啼荒苑樹
黃牛朝飯舊宮莎
偶逢毛女詢秦事
却憶金人別漢歌

芳草不知亡國恨
春來依舊上銅駝

山行

逶迤山勢獨嵯峨
戎馬從無此地過
春剝笋衣僧飯飽
村傳社鼓醉人多
家家射鹿收新網
歲歲看蠶理舊梭
滿地江湖靡定處
桃源今古一農蓑

晚眺

故國春深犢路斜
夕陽古道水穿沙
一聲初感隣翁笛
十載前爲酒媪家
但見芳洲生杜若
不逢人面比桃花
題詩石上苔痕滿
潦倒青尊看落霞

秋夜飲友人舍得添字

貧家茅屋竹爲簷
不用湘筠六尺簾
初月似眉描漸潤

音韻通雅卷之二十一
晚雲如畫色重添烟嵐半染尋山屐書籍頻輸賣酒帘
別後詩情總蕭索錦箋十幅付江淹

同姚揆采讀小青傳分韵弔之

幽閉憑誰寄錦箋明珠十斛亦徒然小姑月冷青溪夜
神女雲歸巫峽天我見猶憐今日句他生難結後身緣
世間薄倖多如此何必貪求並蒂蓮

夜讀方子留詩感賦三首

翩翩年少玉壺冰每念興亡淚卽增南國隕星占處士
西方出世託高僧青衫骸骨歸吾土皂帽秋風挂孝陵
魂去大招招不返首陽山上幾人登

鷄骨長齋可自憐怪君忠孝兩能全渾金璞玉人增價

翡翠蘭苕詩並傳吳市衣丁歸原隱姓龐公妻在合參禪
世間好事難兼得天與其才不與年

曲笠方袍隨處緣年年灑淚泛湖船有家不惜身填海
無計能將石補天靈運慧來先作佛子真遁去竟成仙
山河妄想口堯禹從此去甘心託杜鵑

同諸子飲漱石亭八分得亭字

載酒餘酣漱晚汀狂歌坐待竹風醒城鐘欲動鷄爭唱
僧磬將昏鳥共聽衣在乾坤諸子白眼留今古一山青
永和他日重修袂指點蘭亭卽此亭

過舊題詩處有感三首

燈火柴門半掩開兒童驚問客重來偶尋舊筆留詩處

已被春風長綠苔彩筆管人曾有夢碧紗今日却非才
傍觀應笑題橋者仍是單衫破帽回
記得行吟柳絮前借君粉壁作花牋半由燕子春巢汗
敢望鷄林賈客傳醉後放歌翻自泣恹中覓句倩人聯
木蘭寺裏詩雖好也被塵封二十年
春去江南百感生杜鵑啼罷故鄉情馬尋青草堤邊度
人在黃鶯樹裏行舊榻未移愁夜漏征衣欲洗趁天晴
自憐身賤無人識縱解題詩不署名

重省滄州署中二首

南望家山送夕暄貧憐兄弟共柴門遺民社裏猶依父
荀淑車中獨抱孫五岳未完婚嫁願三江空憶鱸鱸言

莊生傲世何妨達吏隱仙蹤在漆園

春雨楊花促渡河我來初亦諱田禾舞餘梁月衣生綠
宦隱滄江鬢欲皤世亂靈均憐姊寡家貧令伯媿兄多
今秋穡事猶如舊五斗其如百口何

宿蛟臺僧房弔弘生上人並示其徒天然

欲訪支公過太因素床靈几暗封塵舊時秋草依然在

荒徑殘僧若個貧錫杖姑蘓求慧業

天然從姑
蘓參學回

袈裟白

下拜慈親

天然俗家金
陵尚有母在

長卿淪落交遊少自嘆浮生哭

故人

內人三十初度出扇索書

手執冰紈出素懷書殘黃葉亂空堦能依母訓無爲好

方信卿言亦復佳厨舍作羹粗麥飯救臺撩髮舊荆釵
家貧不厭山蔬老何用常餐繡佛齋

贈友人納姬

明珠十斛買娉婷紫玉爲簫白玉屏一寸秋波橫眼碧
半簾春草上睂青暮歸峽內常行兩生小人間便喚星
扶却侍兒嬌不起海棠花下醉初醒

喜晤愚公禹公兩舍弟

桃葉秋深一問津木蘭舟小僅容身帝城花萼懷中夢
故里桑麻亂後親洗馬渡江綠病弱士龍借屋爲家貧
憐君却似烏衣燕縱入高樓亦傍人

同客過舊院有感

朱樓歌舞畫橋邊閒述風流憶少年紫玉千金求管笛
明珠十斛闔花鈿薛濤亂後多應嫁琴操歸來又入禪
回首舊題人面處絳桃空落院門前

放後謁方正學先生墓

咫尺天威怒不除怪來螳臂却當車遺風自爾懸金馬
葬地誰爲乞玉魚桐葉本枝猶若此桑田異代更何如
身先九死應無恨報得君恩一劍餘

再贈古顏上人

新築幽棲水一涯石橋橋上挂袈裟持來鐵鉢誰供米
化得雲山自種茶生死有因歸貝葉色香難斷是梅花
江湖滿地孤身易但坐蒲團卽是家

過友人別業

探幽夾道暗松篁
流水清清石作梁
山路屐隨牛跡去
樹根衣惹兔絲香
安絃軫上修琴譜
卧病菴中寫藥方
猶記子西詩句好
日閒真覺似年長

寒食前三日送姚彥昭訪何道岑先生黃州

笛吹蘄竹倚高樓
目送烟波感壯遊
地近荆襄原負險
文推屈宋舊悲秋
千行賓客尊前席
五馬風流居上頭
羨却使君吟咏好
相傳猶似在揚州

跪讀陶丘家報

傳聞鬚鬢半如銀
客到方知信始真
老去宦情元已淡
舊來薄祿未全畝
右軍孫衆聊娛目
陶令兒多不救貧

莫怪家書行字大
眼昏燈下白頭人

重陽前一日登投子山

醉採茱萸繫臂間
顧予憔悴鬢毛斑
常年佳節多愁雨
今日先期早看山
特地尋僧逢病起
過橋乞菊帶霜還
秋峰好處都堪眺
何必重陽始一攀

秋夜

消磨豪氣漫憑凌
貧賤交情愛也憎
堂上霜寒懷老佛
靜中形影類孤僧
讀書快意頻呼酒
得句披衣夜點燈
漸覺疎狂無俗事
秋山黃葉一人登

祝山如席上同錢飲光先生夜酌

熟讀離騷夜雨殘
床頭周易共盤桓
鵲從蜀破猶稱帝

音耶風雅卷之十一
松自秦亾懶署官鉢冷瞿曇歸後托詩工摩詰晚年看
草堂幽處梅花發偏與人間鬪歲寒

得方爾止先生書

三載移家桃葉春釣船烟雨芰荷身他鄉白髮驚新長
故國青山依舊貧道上曾逢秦壁使祠前爭泣漢銅人
南朝多少尊官塚冷落高低卧石麟

和蕪關湯玄翼先生石城懷古二首

上皇宮殿碧雲頭憶管繁華夢裏遊賜姓勲臣藏券第
添香侍女曝衣樓洲殘蘆荻空銜月湖冷荷花不耐秋
一曲渡河公竟死新聲彈斷舊箜篌

王氣終殘慘客神樵歌江上孝陵薪金床玉几同朝露

甲帳朱簾捲暮塵天子不修南渡史諸臣誰問北來人
琵琶老妓燈前訴綠柳青蒲對白蘋

舟中即景

雙槳蘭橈獨自乘忽然風雨亂春燈沙汀有警鷗先覺
水驛無夏鷄可憑古樹露根堪繫舫敗蘆垂葉半藏罾
青青柳色龍眠岫勞我終宵夢裏登

江行同友人飲酒肆

幾番零落渡江東買得舟帆未買風紅面蓼蘗如少女
白頭鷗鷺似漁翁晚峯殘照人爲畫霜葉微酣詩更工
今日與君同覓醉青帘橋畔是黃公

贈汪羽年先生

江湖散髮混樵漁短布單衣勝曳裾半榻寒雲眠野寺
一犁春雨動耕鋤瓦瓶慣講收茶法場圃頻徵種樹書
除却落花常載酒柴門無事挂柴車
哭四舅父潘根孫
怕向山陽陌上行幾番吹笛病魂驚同年甥舅如兄弟
半世升沉隔死生伯道櫬原無祭主子猷琴亦痛亡情
許多親戚凋零盡哭到郊原暗失聲

懷十洲和尚

三尺蒲團一杖藤坐來說法共傳燈春嵐散作香臺雨
夜月敲開石磻冰山鳥聽經知念佛土人乞米爲齋僧
凡心久戀維摩側欲著袈裟尚未能

寄贈戴東鮮先生山居

買山人笑住山遲如此幽棲好賦詩曉夢慣驚晴鳥喚
世情莫共海鷗疑多栽蕉葉朝臨帖熟摘櫻桃夜賭碁
輸我濁懷塵碌碌何年卜築借隣枝

梅花詩和祝山如二首

雪裏吹香暗裏聞雪飛花散惜離羣根埋古寺依寒石
枝渡橫江亞暮雲南內娣姨蛾淡掃西湖妻子鶴平分
尋常最愛橋頭月茅店烟消帶夕曛

冰散沙堤路未乾支筇潛聽鳥聲殘水雲迷處渾無影
香雪和時可共餐幽性從來輕富貴孤芳原不借欄杆
久聞鄭谷詩情好一字重吟便覺安

煮酒

亂憂歲月付滄浪暫得平安是醉鄉採入菊花添野味
覆來荷葉引新香春衣久典愁無賴夜甕初開色有霜
却怪婦言渾不解劉伶借此示佯狂

冬宵有感

寒葉蕭蕭風滿林愁人當此更難禁窮如有敵猶非極
悲到無聲始是深病裏詩書皆夙業夢中婚嫁亦關心
冬宵那得東方白坐待鳴鷄夜抱衾

江行

孤舟風雨滯河橋解纜船頭繫柳條隔岸燈帘懸酒字
小灣罾步插魚標雞啼野戍時聞鼓鴈哺菴雞夜避潮

懷潘薪孫舅氏

嗟君明月獨南飛奔走風塵一布衣家是赤眉殘破後
書無黃耳寄來稀稻梁秋入龍眠坂芳草春過燕子磯
佳麗縱然誇建業邇時消息恐全非

漁家

南浦烟雲水一涯蓑衣盪漾荻蘆花身隨鷗鳥堪爲侶
夢宿汀洲卽是家山暗婦收春網雨潮歸兒弄夕堤沙
得魚換酒橋頭市指點青帘不用賒

李未盡先輩以小像索題信筆應之

近來鬚鬢已成衰此是盧郎年少時陵谷忽隨滄海變
衣冠猶見漢官儀畫中覓畫王摩詰身外傳身顧愷之

即使丹青無姓字背人摸索也應知

秋風

颯颯秋風葉葉催單衣恹上最高臺乾坤有礙寬猶窄
歲月無情去莫回知負襄陽明主問弔殘湘水故人哀
淮陰漂母楊家妾何事金釵解愛才

江行同三弟限韻

村岍漁翁各有家柴門一道逐江斜竹因土暖多生笋
梅為春寒尚帶花鳧浴不驚青草渡鷗行常篆白堤沙
遙遙天末迷前路蕩漾東風任小槎

乞竹

地餘爭說竹宜栽逢著山僧乞一回雨後正當渠醉日

閒中相約荷鋤來縱然有肉寧求瘦即使無花亦愛才
堪笑子猷猶借寓吾廬雖小足徘徊

惺非上人贈竹詩以謝之

月白沙明何處邨山僧移自給孤園春根雉子當依母
霜籜龍鍾已抱孫此日愛君非借物他時過客莫題門
青青曲徑欄干外燒得茶鐺當酒尊

荻港晤瀛渤上人因留茶話

僧桐人

夾岍蘆深好繫舟偶然乘步上僧樓樹邊打坐霜埋膝
花裏焚香雪滿頭五夜鐘殘催曉夢三生石上記春秋
遠公况我同鄉客白社淵明是舊遊

貓

前耶屈卷之十一
蘆簾紙帳小堂虛
玳瑁霜寒玉不如
寒夜有情眠共榻
春燈作伴看讐書
山田祭賽同迎虎
旅缺歸來久乏魚
麀鼠技窮花外影
月明未敢過吾廬

猿

有客還棲舊草堂
何須驚怨北山旁
林間偷果逢僧擲
崑下簪花學婦粧
三峽聽來風瑟瑟
五溪歸去路茫茫
人間自灑傷心淚
不必君啼亦斷腸

蠹魚

神仙三食竟何如
舊業荒涼一徑餘
佐治腹邊千段錦
鄴侯家計數牀書
漫將古篆誇龍鳥
每爲加餐誤豕魚
我笑前身應是汝
終年只在此中居

作客莫愁歸隱處
故山叢桂有人招

贈茅山道士錢載陽

神仙桑梓舊茅山
美爾人間任往還
松樹雲開晴鶴舞
蓮花池閉老龍閒
身無長物餘殘衲
囊有奇方駐少顏
獨坐一樓明月夜
跣趺雙膝自緘關

偶憶

東風消息獨徘徊
久閉柴門手自開
寒食暖逢人病起
梨花香在燕歸來
竹鐫詩句春痕細
石補蒼苔雨意催
昨日偶從堤上過
遺簪翡翠却攜回

少年行贈友人

相逢陌上少年行
雙劍芙蓉匣內鳴
身欲許人猶有母

龍耳風雅卷六十一
臣誣盜嫂本無兄結成海內皆豪俠羞向燈前說姓名
醉後自歌還自泣彈箏一半是秦聲

方明農先生新卜居桃葉渡東云是宋其武學士
宅

閒來徧訪高人宅曲巷幽棲一草亭移竹無時逢上巳
灌蔬有地課園丁橋臨桃渡三秋碧樓望鍾山二月青
此是宋公舊池館常將佳話與人聽

爲淡溪上人作書併題

未辦買山錢徒有買山志書到白雲深投筆發長喟

天竹

火樹三冬色珊瑚七尺高啄殘山鳥嘴錯認是櫻桃

白石榴

素種覓張騫花開白練妍忽逢妃子笑冰齒最嫣然

可嘆

玉笛橫吹九辨秋美人烟雨曉粧樓無情最是青銅鏡
纔照紅顏又白頭

題巖陵圖

蕩漾桃花夜雨時長竿百尺坐垂絲故人若不爲太子
老死桐江誰得知

夜讀秋胡傳

最懽久客逢歸日難信空閨別後心邂逅豈真渾不識
故將金作長卿琴

春思

眉黛秋山畫綺窓君遊越海妾吳江停針妬殺池邊鳥
縱繡鴛鴦不繡雙

友人以子屬予寄名戲題

夢兒亭上舊風流生子應如孫仲謀小字霍家師太病
命名花譜喚忘憂

宮怨

消瘦東風愛綺輕漢家三十六宮名君恩那得如春草
肯向堦前處處生

題落花美人圖

二月春深花盡發行人賣罷鶯聲歇幾紅羞上女兒粧

隨風吹墮鴉頭襪

題王山人山水冊子

居士維摩子晉禪篝燈雪屋靜無烟貧來一幅丹青畫
半作樵山半作田

清明哭亡弟禹公弟觀寄江寧寺中

去年風雨寄書來繚繞鶯花處處催今日江村寒食路
長干寺裏野棠開

庭前

庭前萱草合懽名池畔荷花並蒂生寄語兒家休種柳
止知送別不留行

雪中登投子

投子峰頭雪欲封
亂來留得幾株松
土人指點棲禪處
此是山僧舊挂鐘

戲作竹枝詞

南浦荷開雨漲時
方舟常繫木蘭祠
女郎廟裏行人少
暗訴春情乞鬼知

經謝玉章墓

杜鵑凹裏杜鵑啼
馬鬣孤墳日欲西
幾點淚痕濡宿草
春風吹徧野棠梨

龍眠山行憶祝山如

去年同掃嶺頭雲
忽見桃花却憶君
昨日北邙吹暮雨
望中青草是新墳

閨情

商量停織漫拋梭
雙繡鴛鴦並蒂荷
不是愛他名字好
只因恨客別離多

觀鐵冠圖劇口號二首

新亭風景望中收
國破家亾事事愁
一曲商歌齊下淚
煤山猶勝景陽樓

無端舊事落花前
細說興亾倍黯然
此曲人間聞不得
江南愁殺李龜年

題靜波方丈

手托長鏡夜不眠
山頭開得一坵田
早來種芋供常住
猶恐官家索稅錢

題畫

九月扁舟繫晚汀江村漁火數峰青
秋風吹冷蘆花被
詩半裁成酒半醒

送人入空門

美君端豈爲無家
斬斷恩緣誦法華
多少別離生死恨
從今淚不上袈裟

渡口卽事

門前春水沒漁磯
採得青莎織雨衣
隔岸不通官馬路
釣船時送老僧歸

客中夜讀錢虞山選香奩諸什所選名妓居多

老樹娑娑月似霜
孤燈不覺漏聲長
風流最愛香奩咏

伴客黃昏當女郎

沽酒

憂自中來強自持
典衣權買杜陵卮
酒無通夜消愁力
一醉能消一個時

雜感

誰家彈曲舊箏篴
歌到傷心易白頭
休弔錢塘蘓小小
紅顏豈值一年秋

謝客薦星士

韓愈憂讒蘓軾窮
生來磨蝎守身宮
才人命薄多如此
何用成都賣卜翁

舊院

音耳 風牙卷二十一
風俗江南半已非
院門空鎖綺羅稀
歸來尚有韓熙載
乞食誰憐舊衲衣

愁

唾壺擊碎狂歌發
昨日紅顏今白髮
何處愁人易斷腸
孤舟風雨空閨月

樂

人間樂事海無邊
不獨笙歌醉舞筵
更有關心開口處
看花馬上順風船

蕪關

報稅千艘日不閒
蕪關官吏抱嚴關
小舟若問私藏貨
詩在秋江畫在山

新燕

梨花如霰絮如鹽
撥亂東風半下簾
贏得美人春卧起
一條纖尾賽雙尖

獨眠

胡床楚簟獨相親
紙帳紗幃半似銀
斷酒每憐茶博士
同眠惟愛竹夫人

田家早景

江南六月早禾天
農婦家家饁向田
幾處桔槔時斷續
綠楊陰裏一聲蟬

閨燕

杏花風落漸成堆
繡箔珠簾戶半開
不是因君頻出入

畫屏深閉有誰來

官齋卽事

如水門前好設羅
拂窓樹影獨婆娑
鵲聲啼處鴉聲噪
不解愁多喜亦多

題畫贈吳閬圃

幾年人未踏長干
夢裏松聲午夜寒
試問南朝四百寺
至今多在畫中看

江寧放後感懷

夜長鐘鼓最難眠
僮僕相看共黯然
怕說郎君年尚少
登科何必定今年

題陳章侯人物圖

輕素松江六尺綾
剡溪藤紙潔如水
聞君愛畫唐人物
半是山翁半醉僧

春郊卽事

大堤柳絮白如綿
愛聽提壺與杜鵑
少婦尋春香路窄
借名掃墓落花前

山僧索詩

寒山殘雪野梅香
流水扶筇度石梁
翻向城中索詩句
不知身已入詩囊

金百二移尊郊外送春卽景

青青柳色覆長堤
苦竹菴中日欲西
婪尾花前婪尾酒
杜鵑枝上杜鵑啼

馬季思

字永公號玉峯正誼公之仲子少補諸生卓

有大有志為人爽朗軒豁表裏洞開正誼公
捐館陶丘積逋千餘金雖傾產莫能償永公留陶
三年力請于代者清其乾沒爬其垢蠹始獲無恙
得家書輒付之火曰亂吾志耳陶人士噴噴稱季
子曾奔其弟禹公喪于白門執紼盡哀觀者為之
感泣其季友性成如此永公兄弟有六方子田伯
兄弟有三皆吾從姑之子玉友金昆照耀寰海永
公兄弟皆工詩而遽逝其四使假之以年磨礱問
學所造當不止此然其詩已居然登制作之林矣
以視列朝集中所載皇甫
子浚諸兄弟何多讓焉

重有感

蛾眉入宮掖豈不異君恩一旦顏色衰君恩寧久存丈
夫懷壯志豈不羨乘軒一旦仕路窮乘軒何足論蔬食
可充腹何必雞與豚布衣可適體何必裘與璫身榮既
已危何況子與孫李斯棄上蔡二疏出東門即此進退

間便分智與昏所以達士志沒齒老丘園

手錄香山集成喜賦

我聞香山集流傳至雞林其國酬詩價一首百黃金愛
才有同志豈分古與今素心亦慕之無從取次吟既未
誦其詩何由見其心偶過曠閣齋見此即欲讀大小三
千篇數十餘卷軸假來置案頭專心手自錄冬寒日孜
孜未遑櫛與沐錦句難盡謄謄就十之六點不吝丹鉛
鑽豈惜刀錐長歌短句中義蘊粗能窺曉吟日初出夕
讀人盡時間出從人飲掩卷置空帷夜歸猶呼僮秉燭
往取之同時酬唱者尚有元與李格律與歌行猶然壓
二子作者雖云多怡情無過此芳名永不沒不沒良有

以此本若歲蕤重裁蔡侯紙

陶丘村翁嘆

跨驢南郊行暫憩僧寺住暑氣莽侵人乘涼依古樹忽
有老翁來短衣髮垂素問我爲誰與荅云是行路省俗
過堯封新官何如故翁言未及伸老眼淚如注故侯仁
且廉窮簷溥膏露此地苦河工壩夫最爲蠹舊額十餘
名誅求等正賦僉點憑奸胥私門羅厚賂富者得偷安
貧者反催募鬻盡妻與兒逃亾不知數故侯下車初挺
然抗章訴但爲生民哭那畏上官怒一朝遂所請西江
蘓渴鮒善政固多端斯須難采布真宰誠茫茫循良胡
不祚青山突然崩赤日當空暮去時有餘悲村童及里

姬哀哉賢令尹安得再逢遇

爲四姪紹平悼亾作

人生當少時所重在伉儷况汝值家貧二十猶未妻烽
火逼郊原完婚乃客歲入門果雍雍玉桃艷階砌共道
新婦賢端貞且聰慧縞衣甘適體著簪任束髻怡顏奉
孀姑勤學勸夫婿下至婢僕流無不稱仁惠占夢既有
徵在今春夏際生男本尋常生女何淹滯竭力廣延醫
一到一投劑女生未三朝阿母竟同逝家門胡不祥同
病至三世自先慈及三弟婦皆嬰此厄汝時裂肝腸對人惟泣涕遺
挂不忍看空房從此閉麥飯與菜羹草草成家祭回憶
結襦初僅足一年計豈無榮華者偕老猶不替何獨困

斯人芳齡遂分袂已矣痛難忘疾風摧蘭蕙

爲幼兒種花作

是花人盡愛汝愛在海棠年年阿姨家移入到茅堂瓦
盆三四叢一一手自將此花異衆卉宜雨偏忌暘五月
當霽天陰晴候無常忽雨汝運出忽日汝運藏花固適
厥性運者無乃忙自言當秋初嬌艷吐花房玉頰微潮
酒朱唇淺暈香阿翁於此時一咏復一觴翁意別有屬
於汝却相妨杜家精文選范家理墨莊有兒勤讀書身
老無愁腸願言息此勞努力窮青緗芝蘭與玉樹纔是
種花方

雜咏四首

夷吾天下才結交有鮑子分金何獨多仲也良有以故
人絕不嗔知爲貧所使感此意獨深直與生我比今人
受惠初許爲知己死及至金盡後棄舊如敝屣朋友五
倫事今古不同揆感嘆發長吟頽風深足鄙

吾憐王偉元慟父不克終攀栢日號泣栢枝無春風讀
詩廢蓼莪罔極思無窮如何御衣血乃有稽侍中食祿
期報主非不念及翁兩賢各異趣忠孝理亦同

荆卿遊燕市屠沽相與嬉擊筑酒同酣復有高漸離歌
泣自有意旁觀安所知七首入強秦太子猶嫌遲蕭蕭
易水寒壯士身先危或疑所待客偕行尚可爲不見報
韓人博浪又空椎直須赤幟起天運方轉移

音耶牙卷之二
昭儀位中宮天皇初未決英公進一言唐祚幾淪滅有
孫倡義旗其氣何激烈馳檄動四方竟與乃祖別乃祖
貞觀朝房杜稱同列貽謀之不臧私語嘗切切其後雖
不材其先實賢哲公爲社稷臣置身反容悅生慚褚遂
良死愧狄仁傑

烈婦詞

君不見逸士梁伯鸞借妻孟氏隱于野終身不履帝王
都舉案怡然棲廡下又不見漢庭王仲卿牛衣對泣美
青雲一旦敢言身就戮區區富貴何足云昔時富貴人
所羨今時富貴人所賤金釵鈿合有時窮短布單衣終
不變吾邑項子起孤生盛年通籍何其榮遲之數載猶

未選前歲驅車入帝京不獨官階耀閭里復有微榮及
妻子春來樓頭望亦然花牋錦標從茲始久羈輦轂待
君恩君恩未沐忽被論頸濺長安市中血魂抱黃泉道
上冤一身雖死罪莫贖并坐妻孥與僮僕遠謫中原已
不堪况投絕塞亦何辱閨中聞此不勝悲累欲捐生畏
人知適值夜半無人處偷將長繩先自衰生則同室死
同穴芳魂皎皎凌霜雪可憐富貴似春華不共君榮共
君折寄語貧婦戒貪求勿教夫壻覓封侯縱使金屋暫
時榮終不如屢屢烹雌同白頭

署中同三舍弟并朔朗兩兒侍宴有作

水署秋高氣蕭索白頭老親常獨酌屈指我來旦暮間

坐待西山日又薄我攜次兒到此晚昏夜城南呼鎖鑰
長兒日午先我來關外風塵饑且渴計汝遠婚別一年
喜汝不似太時弱阿弟且自帝京至老樹枝頭噪鳥鵲
斗大官齋本不寬忽聚竹林與花萼夜深大被榻共眠
晨起趨庭趾相錯老親爲此懷抱開尊前笑對燈花落
自言骨肉暫團圓衰年苦被微官縛戶內頓覺家人多
門外依然可羅雀但恐弟歸兒又行相依那得常如昨
何日柴門賦歸成繞膝諸孫真足樂

題龔山集後

槐蔭枝繁受風大主人愁劇情無那惟有詩篇愜素心
對之頓覺愁顏破龔山先生詞場宗金石成聲珠落唾

有唐杜白若同時應與我公三獨坐潘生編輯假我書
日將十紙勤自課一日十紙未爲多十日百紙猶嫌惰
更于臨池趁曉涼北窓不敢閒高卧從茲苦志自鑽研
朗咏高吟日數過生時名已四方傳歿後風猶千載播
先生在日一詩成輒與同心共唱和獨是眼前詞客日
紛紛律細如君寧幾箇

潘生謂
木厓也

去鷄行

太秋田叟來市厘縛鷄送我大如拳老妻慈愛不忍殺
養到今年值百錢有時土中閒撿索有時奮翅窺戶落
几邊踏藉盤案翻滿屋淋漓遺穢惡明朝有客到衙門
倉卒將爾供盤殮從茲不殺亦不羨
樹柵勿復論

音地居牙卷六十一
懸弧歌爲九姪作

當戶今朝弧矢懸我因爲汝歌長篇人間兒女等閒事
惟我與汝最少年我管生女年十六一門兄弟獨開先
汝今十六卽生子其年亦與我相似衰宗子姓果蕃延
三鳳入龍從茲始縱使商瞿晚較歡何如二十年前心
更喜香水蘭湯看浴兒我心獨爲汝翁思汝翁年纔三
十三玉樹階前新長枝汝年若到翁今年此兒又是懸
弧時懸弧懸悅我相同若論早歲含飴輸汝翁

重閱徐克草兼贈蜀藻表兄

憶昔羈棲陶丘道憂來日夜心如擣偶從朋好借書看
贈我以君徐克草入手不待全編終久困遂覺開懷抱

短句長吟非一篇就中最愛歌行好良由雅尚本天然
況從弱冠工文藻嬌如芙蓉出水新秀似蛾眉施淡掃
山城格調有誰同惟吾外舅龔山老龔山詩管追少陵
晚愛香山恣幽討初若隨興便揮毫却費推敲屢削藁
不必高歌泣鬼神但期命意通老媪今人謂白與杜殊
安知長慶風味同天寶我今重閱似陶時胸次頓豁無
煩惱獨惜才難與命爭兩地容况嗟潦倒雖然客况嗟
潦倒猶幸吟成山川風月刊梨棗

遊碾玉峽二首

司農別有號號與此山傳鑿石通樵徑分流灌秣田林
蘿秋礙日茅屋午炊烟一自騎鯨去悲風起墓前

爲司農公

作

青山無用買卽此可圖安谷響晴聞雨巖深夏覺寒江

湖縈逸興池館任凋殘輪與荷薪者閒來抱膝看爲外

作山

遊龍眠二首

少保幽棲處溪邊曲徑開澗茶留客坐蔬飯待僧來引

水窮泉脉當山壘月臺階前松栢古猶望後人培爲少

作

往哭仙郎墓迤邐過一峰期君終化鶴得婿果如龍是

同吳聿風激墳前火聲傳僧寺鐘欲除霜殺草新種幾

株松爲長
公作

蒹葭

弱質葳蕤少生來傍水涯風搖隨岸葉波壓暫時花縱

託江湖老難辭霜雪賒幾曾依玉樹移入到人家

古鏡

百鍊菱花鏡誰家製作精團圓如月出瑩徹敵冰清雲

鬢還爭愛霜華却恨明妍媸原有定分別似無情

村居卽事二首

生涯無別策強半在耕耘俗健兒能射村粧婦不裙桑

榆爭繞舍鵝鴨自爲羣聞說輸官稅三分已一分

傳有城南寺焚香近萬家祇因貪事佛不是愛看花田

父行驅蹇隣姑出坐車紛紛齊入拜歸路日西斜

憶江南

江南榮客夢寺苑憶凭登香積朝炊飯浮圖夜繞燈茶
瓜留施主簪綬半高僧欲學無生去妻孥割未能

催妝詩

為張子菘作

旭旦香車出看君意態新賦詩推道韞擲果候安仁襦
結初妝際冰當未泮辰畫眉與視舌俱是姓張人

懷次女蛟臺

忽忽三年別遙遙百里程自憐生計苦惟望母家迎連
歲頻添女沿江怕過兵書來為壻喜筆可代躬耕

初度感懷二首

秋氣苦炎熱余生及此辰巖香空薦廟寸草未酬親假

我慚窺易繩先愧析薪祇應坐茅屋皓首布衣貧
騎竹纔如昨無何又白頭山河軍壘日風雨秫田秋勸
學攻兒諺談詩遣婦愁花前閒啜茗猶未壓新篔

長女歸寧因懷次女蛟臺

莫道離親遠能來只片時臨風吹老淚有妹繫予思合
室無生策終年恒苦饑何當廻小艇同畫曉窻眉

贈隣人

水田纔十畝耕作自兒時茅屋三間小蔬畦四季宜榻
因推客卧囊有娶妻貴笑我惟書癖農桑總未知

再過鄉村二首

不因官路近淳朴儘堪居竹屋生幽韵村童聚讀書沙

明閒立鷺溪靜夜張魚收割
消息傳倉卒沿途忽到兵壯夫擔子走老婦逐牛行餘
粟坑爲廩長圍水作城時共避某氏水圩頓看十里內鷄犬靜
無聲

外舅明農先生遠遊北塞久不見歸賦此懷之

行脚原同一老僧芒鞋竹杖任凭登人經易水空悲筑
馬度黃河直走水蔓草有時懷故國白頭無路哭荒陵
含情試望煤山樹青似當年尚幾層

惜桂

婆娑雙桂向荒臺俱是前人手自栽西壁餘條猶且在
東廂弱質已全摧每聞驟雨愁花盡時有幽香隔戶來

傳語兒童休便折不同紫李與黃梅

題抱鴛圖二首

水國雙飛返故園君恩未報又銜冤芳魂搖落隨秋草
遺挂淒涼鎖墓門蠟燭灰成新涕淚白楊風入舊傷痕
不知月冷霜寒夜厲鬼嗚嗚何處村
輕綃寫出雪霜姿傳道金陵老畫師額爲傷多難點纈
心因怨劇故顰眉東廂失却魂歸處北邸初張人看時
懷袖三年離不得也同湖海舊相隨

冬初與揆采及大兄各賦弔小青詩四首

一自芳魂搖落後年來空羨廣陵春知心泉路惟蘓小
分手樓前無季倫死太已消詩字債他生休作女兒身

當時珠淚頻飄灑莫灑無情妬婦津
人嘆紅顏多薄命天因命薄與紅顏可憐瘦影常臨水
不似高僧亦閉關詩比芙蓉含露泣身同鸚鵡透籠艱
畫圖縱得嬌嬈態未及新粧畫遠山
誰負人間薄倖名至今猶恨武林生花前憐我猶然我
水面呼卿豈有卿蟬縱悲鳴難棄蛻鶯雖學語未成聲
鷓鴣此日無尋處芳曲空傳療妬羹
夢魂歸去向天涯廿四橋邊路更賒只有霜風摧蕙帳
難將秋鏡照梅花丹心化作山頭石絳縷封題臂上紗
拾得窻前詩數首也同千載奏琵琶

壽大兄三十初度

多情留客度寒天信是人稱內外賢同爨未聞羹可憂
共眠常覺被相連漫嗟馬櫪難酬志自有狐裘足記年
今日一尊諸弟勸庭前遑問酌誰先

哭張氏表姊兼慰左復生二首

也知天意摧蘭蕙但恨霜風尚早摧贈婦陸機情緒重
悼亾潘岳語詞哀錦衾縱爛情難共菱鏡雖明影不來
憶管甘貧無所怨今朝何用送錢財

夢旣徵蘭必抱兒豈知兒喪母同哀幽魂至死難消恨
種玉雖成亦是悲并蒂蓮花空出水雙飛烏鵲已亾雌
更憐乳母哀哀想盡辛勤襁褓時

除夕

常羨蝸牛尚有廬蕭然四壁笑相如從他歲月空流轉
泥我窮愁不并除蠟炬欲殘無檝馬椒盤將薦只園蔬
病妻中夜猶揮淚肯蓄何曾爲我儲

初三日同張子千德遠家渭陽出南城道經故園
有感

十年戎馬渾郊坻焚掠人烟似斷萍到處荒燐皆化碧
何年野草不還青雕梁泥落無棲燕鄴架書殘空拂螢
幸有咎時隣叟在我來指點舊池亭

臨鏡見有白髮感賦

曉起鏡前窺短髮鏡明髮禿轉添憂喬松老太能經雪
蒲柳生來怯到秋長貌漸衰人不覺霜華忽上影先愁

安仁何用多傷感我少於君亦白頭

曉發江村限韻二首

比屋蕭條亦是村沿邊春色動蘋蘩夢歸鄉土常多淚
衣著江泥尚有痕擾擾哀鴻愁旅食依依芳草送王孫
今宵須傍青帘泊莫待提壺夜叩門
二月濤生水面寒村雞初唱向江干行厨有米吹猶易
鼓楫無風渡亦難春意漸深鄉思亂波聲不遣旅魂安
舉頭獨羨沙邊鳥飛去飛來振羽翰

南中聞嚴君量移定陶

尋親遠道值春寒夜雨頻驚旅夢殘解綬應拋滄海郡
折腰仍似粵東官喜聞路尚離家近不信冠猶倩客彈

自逐馬蹄泥濘太久無驛使問平安

陶丘清明

客中此日倍凄然陌路逢人挂紙錢未有青山埋故骨
但從平地起新阡春增婦女襟邊淚風動牛羊草底烟
回憶虎岑亾母墓松楸料亦望吾還

贈田琢如貢士

四郊雞犬是秦餘淳朴還推水竹居地僻肯從遊子借
徑荒先命野人鋤瓶封菊蕊冬儲酒饌入溪頭早市魚
天半逢君能愛客不妨高枕當吾廬

龍眠山

龍眠宜是逃名地憶管公麟隱此間薄有壺觴如栗里

不將疾徑比終山桃梅逐路爭開落麋鹿親人共往還
春色定知遊客遍風塵憐我滯江關

射蛟臺

武帝東遊曾駐蹕旌旗欲返未央宮長蛟自恃風濤險
玉弩潛翻江浪中流水無波通客舫當山壘石賴村翁
遙看天柱層巒秀名與茲臺萬古同

綠琴

綠琴宜趁月明初石上橫來儘自如恥入王門寧碎却
幸留客費是焚餘高山流水隨人寫羌笛秦箏令爾疎
一自廣陵彈罷後至今塵土未全除

錦瑟

清幽最愛琴兼瑟五十朱絃操更繁按拍可堪愁裏聽
高歌誰向曲中論空留峰影臨湘水不共竿聲到國門
總爲雅音難悅耳悲笳哀角遍山林

滄州署中同大兄一公賦三首

長蘆先世舊乘驄我父荒齋在此中一境官猶分大小
兩朝局已各西東私心亦擬他時望直節人傳漢代風
况復兗州新授地封疆約畧又相同先太僕公曾
巡按山東
相逢漫說滄州惡但得清閒性亦安未有桃源堪避世
暫同桺下不卑官人稀故里傳書少道遠江船載米難
風土近來相習久坐嘗杯酒更加餐

五年猶是借人居官况蕭條尚似初興發窻前摻警句

俸餘郭外購遺書久知門冷原無雀自減盤餐不受魚
也信金多非鮑叔遊輪一任故交疎

園官送菜

清齋六月可烹葵先向郊園雨後移種好止應憑小吏
祿微難遽效公儀壁間綠葉吟虫篆籬外黃花野雀窺
馬齒嘉蔬同一飽分疏何必少陵詩

江寧集龔山草堂

柴門曲徑桺陰遮地僻真成處士家引水入池鳧試浴
東蘆爲架豆爭花朝厨圃近蔬堪剪晚巷人稀犬不譁
鎮日晴窻無俗事苦吟薄醉是生涯

丙子初度二首

音韻通雅卷之二
愁聲從未出深閨合是梁生操作妻月照窓前槐影亂
霜侵檻外竹枝低身因小病朝慵起兒爲長饑夜慣啼
今日閨中邀女伴半分脫粟半黃虀
堂前同著綵衣裳弱女於今及母長麋鹿引麕常自乳
梅花臨老不成妝燭從西舍休言借棗熟東隣未可嘗
紙閣蘆簾了生事成仙何必羨劉剛

晚宿村莊

秋風蕭瑟動寒林對此偏傷旅客心
借得板扉權當榻覆將鶉褐卽爲衾
頻傾野店三升酒敢忘王孫一飯金
牢落欲憑詩遣興饑虫砌下似同吟

抵署

諸弟春歸子舍寬朝昏誰復
勸加餐臨邛祿薄難分客
彭澤兒多不就官旅袂盡從
初雨潤鄉書細向夜燈看
馬蹄十日輕相送未覺人間
行路難

抵署數日卽遣小力南回二首

倦鳥投林且息機
單身何事向南飛
愧非穎士留無益
得似方回見漸稀
客路莫貪殘夜出
里門須趁未霜歸
逢人若問予消息
諱却秋窓帶減圍
夢入家園我減餐
風烟遣爾報平安
菊經白露花將發
鴈過黃河影正寒
塵路行多歸使熟
鄉書傳到客心寬
含辛亦有千行淚
暗濕青衫未敢彈

九月初七日

雞聲初唱起焚香遙望南雲拜北堂霜露百年空有淚
蓼莪三復不成章椿存未敢輕嘗酒線密猶留舊製裳
回首墓門真寂寞寒松翠栢正蒼蒼
授衣
四面雲黃欲雪天無衣翻動老親憐故鄉千里寒難寄
草榻三更覆獨先官只胡家分後絹盜餘王氏舊時氈
一從薄儉悲慈母聞淡青衫久廢綿

賦得貧家養女嫁常遲

繞膝嬌姿堪慰情學拈針線果聰明作羹厨下先將母
咏雪堂前每讓兄五岳欲遊留向子十年不字問君平
家貧生計惟餘犬底事朝朝賣未成

出署

官如臣父幾人廉縱不彈冠也不嫌柳下官箴原是直
子魚家教本從嚴千行別淚襟邊濕一片寒雲野外瞻
獨立閒庭無客到春來白髮鏡中添

送姚揆采還浮渡

欲同遊諸岩以雨不果行

還家爲問寢門安惜別情深欲語難有酒每從鄰舍貰
無衣空念故人寒溪邊學釣常投餌隴上催耕不正冠
唱和蕪關詩句好莫教傳與貴游看

與方三素伯有江右之役業已登程予忽興盡而

返

回車中路似知幾欲語離情心事違可信賣文爲客苦

本知分俸罷官微，頻燒蠟炬憐同飲。細檢書籤割半歸，
話到五更猶不寐。坐聽雞唱各沾衣。

春日友人邀過西園兼懷其人北道

春到芳園喜見招，入門疎影竹蕭蕭。梅花對客如含笑，
鶴步隨人又過橋。僧飯有緣沿路鉢，野墳無禁遍山樵。
艱辛築得藏書處，閒付東風鎖寂寥。

紅葉

點點霜華染素秋，吳江欲落任飄流。酒燒詞客林間煖，
詩送宮娥靜裏愁。太乙吹殘藜火在，杜鵑啼罷血痕留。
須知不是桃花瓣，莫引漁郎錯駕舟。

哭五舅氏二首

人却危君不自危，長庚星去及秋期。龍蛇有兆應歸命，
參朮無靈莫罪醫。荆樹已分田氏宅，蘆花休衣閔家兒。
從今怕踏西州路，暗觸羊曇醉後悲。

飄然粵海獨乘航，意外遭逢先澤長。數畝未營元亮秫，
千金空博陸生裝。倚門失汝誰將母，遺腹如男亦慰孀。
我似季鷹來一哭，賞音知不向靈床。

哭外舅方僉山先生二首

生計常言與願違，但逢行處便忘機。身來故國俄驚病，
骨幸蒼頭蚤護歸。酒店尚留當日債，詩名不救闔門饑。
酸辛舟過三山峽，昏黑江天失少微。

偕隱青溪性所安，灌園人去辟纒單。其能煎豆嗟何及，

音即...
蚌欲生珠老漸難設主靈帷延客拜寄骸野寺倩僧看
撫棺莫罪予來晚雙淚天涯總未乾

抵署

十年七度赴陶丘門巷蕭疎似昔遊鄉物却珍來路遠
民情翻爲太官愁宣房纔罷填河柳幕府申催享士牛
時有兵過遙望故園歸未得東風吹老菊花秋

秋日子有竟行信宿路雲麓所莊却贈

迂道投君百里程問人方識所莊各登堂書有兒堪讀
負郭田惟僕代耕王氏祚昌沿世族李家孤在賴門生
須知遠客無歸計莫比尋常訪戴情

孤雁二首

何事哀鳴入夜分一聲聲在客中聞沙邊鷗鷺非同侶
塞上風烟想舊羣影掠湘江空帶月路尋衡岳獨穿雲
天涯飄泊寧多少相對惟餘我共君

振羽秋高盡旅行何緣拋却獨宵征無家寡婦經年別
失路孤臣萬里情綠樹但聞棲衆鳥青天誰與問前程
艱辛好入寒雲裏幸莫相逢阮步兵

秋日同諸友過李孟一西園因和張龍佛先生韵

登臨正及杪秋閒十畝園林屋數間黃菊滿籬纔半吐
白衣載酒莫空還子自謂也殊方漸覺朋情重旅食常虞生

計艱花下簪曾親飲處啼痕私向栢枝攀先君與孟一尊公交甚善

嘗飲于此園

四舍弟濟上信至知歸櫬將得所請矣

舍弟書從濟上來持書未讀我心哀髮緣旅恨霜千丈
腸似江流日九迴荒徑痛無陶令在佳城留待沈公開
呼天乞與冬暄穩好向山橋野店催

雪作謝沈涵文餉酒

擁被繩床夢不安天風吹雪滿闌干青占麥甲豐將兆
白上鴉翎凍欲攢惜莫林間同葉掃愛留窻下映書看
解衣思質旗亭酒望外逢君念我寒

除夕同四弟作

淺酌村醪奠_行盈_行瓣香初蒸淚縱橫世情險阻嘗應遍
鄉路分明太未_一角豈真因一哭猿腸終必斷三聲

愁心亦似荒原草但逐春風吹又生

二月十九日先嚴靈觀南回孝恨不得扶送哭呈

二律兼示四弟

白髮思鄉漸減餐尊鱸雖在失張翰已衰病骨歸來晚
未死官身太更難青草雨淋塵路滑黃河風逐怒濤寒
庾公淚落瞿塘水穩奉靈輿過急灘

予欲偕行此願違老親付託爾扶歸心傷薤露歌聲遠
目斷柴門樹影稀幸覓寢丘同馬冢敢延弔客致烏飛

時已買山
即擬歸葬居廬待補趨庭缺山後山前慘落暉

沽酒

美名何必定青州處處孤帘晚未收嵇阮慣從墟畔過

音韻通雅卷之十一
荆高常向市中求急因留客憑增價暫爲思鄉借解愁
憶簪金釵初拔後妝臺連日罷梳頭

咏茶

身披野服自年年莫笑山人癖性偏穀雨節來和霧採
梅花香在帶雲煎匏尊汲澗龍驚卧石鼎飛濤鶴避烟
新句一聯琴一曲薰風間啜小窓前

讀潘蜀藻表兄徐竟草二首

頻年書劍走風塵欲乞微膏奉老親才似樂天無異調
生疑太白是前身彭城趨立師門雪濟上閒留幕府春
贏得詩篇如錦綺歸囊不信爾猶貧

歸日裝如太日輕空將筆札動公卿搏霄野鶴霜毛瘦

徹底冰壺詩思清作客我猶遭世難嗟君天果妬才名
謫仙簪已飄零甚又謫人間太學生

友人書室見有咏白鸚鵡者和之

不將錦綺艷紅妝巧語聲聲寄恨長弔影獨憐梁上月
隨身常帶隴頭霜羽毛對客成佳句縞素如予老異鄉
授得蜜多經一卷開籠誰放雪衣娘

初度感懷

蒲團拜裏佛龕香背却僧寮暗自傷篋內綵衣空涕淚
庭前鴈序半存亾嘔心血作詩千首計口糧儲粟一囊
南望鄉關如絕塞幾時趣得遠歸裝

九月七日爲先慈忌辰詩以代哭

音韻居牙卷之二
異地今朝恨不平寒風吹我淚痕盈衣邊那有親縫線
厨下何曾婦作羹兩歲天涯爲客苦他生日暮倚門情
虎岑多少松楸樹愁聽鳴鳴晝交鳴

夏月冒雨同方侯士兄弟遊龍眠別業二首

白練千條下急湍山深六月尚多寒芸窓遍挂絺衣濕
草榻分眠布被單莫倚弟兄留客慣須憐僮僕過河難
春來聞說花如錦惜未相將看藥欄

雨窓遙對最高峰欲上還愁滑短筇犢角漸成三徑竹
濤聲不斷四山松談深客坐頻傳盞夢覺僧廊忽打鐘
午爨且分香積米隔溪隣舍未聞春

婦病

纔贖金釵向酒坊日臨窻午未梳妝貧添老態顏先瘦
雨送新寒骨暗傷買藥自炊簾下火呼兒同進佛前香
關心總爲糟糠重幾夜醒聽更漏長

夏日偶作示內

草閣連朝客到空閒眠貪愛竹窻風面黃憐汝將成媪
頭白嗟予已是翁小病豈關無肉瘦長貧莫罪有詩窮
鹿門平日堪偕隱况復干戈在眼中

訓子

敢說藏書富五車亂來猶未失張華寒儒膏火窻前雪
亂世簪纓鏡裏花對客最嫌狂作態愛兒勿令早傳家
許多年少營生理懶弄丹鉛實可嗟

愛一作教

音韻通雅卷之二十一
左霜鶴先生要予與方素伯入龍眠俱不果往
札到偏招魯兩生天風一路熟香秔月臨清淺河邊影
松帶陰寒雨後聲蠟屐未乘遊子興盤殮空費主人情
漫言五岳芒鞋遍咫尺龍眠不易行

夜雨

晚占天色近何如不見繁星帶草廬蟋蟀聲寒四壁靜
芭蕉響徹五更初花移夕圃新添檻水滿秋田更入渠
屋漏已拚沾濕遍小窻愁有未收書

題王安節所寄畫松

冰統一樹倚高岑白下傳來寄念深妙筆直追前輩手
雅懷同守後凋心依稀風度龍崖曲彷彿濤生草閣陰

安得鬱葱真似此石橋南畔好追尋

惜桂

婆娑雙桂小山隈移向尚書宅裏栽

數椽爲錢尚書舊宅

宦後吾

翁猶寄憶劫餘兵火未全灰

一林爲兵所燬

風生靜夜香先露

月到中天花正開莫遣兒僮攀折苦好留幽韻待詩催

葺居

老屋三間舊讀書廿年分住作吾廬掃來塵土連蛛網
買得松杉換蠹餘春燕引雛巢自補晴鳩呼婦舍同居
從今縱值風號夜高卧茅檐儘晏如

家醞初成二首

今年種秫未全荒爲竭詩腸藉酒狂漉出已同桑落色

音即居刊卷之十一
嘗來添入菊花香乞隣亦惜酬高價訪舊何曾許濫觴
還是貧家新釀好良宵多有不時藏

獨醒何事與人殊况復開尊不用酤也信名難齊白墮
祇教味略比黃墟閒尋野藥親攜鋪旋採新荷自覆甌
却看老妻顏亦喜金釵免質酒家胡

寄長安友人

粼粼車騎滿長安功令新傳取士寬遊學范滂膺郡辟
輪邊卜式拜郎官策身人幸彈冠早捷徑君忘行路難
涓滴媿無將伯助王孫應恕舊交寒

東郡偶吟四十韻

泱泱海岱正垂紳吾祖當時漢直臣歛手貪污爭解綬

囊頭權貴懼埋輪甘陵不避譏朋黨杯酒寧能假故人
共祝虞淵方浴日那期泗鼎竟沉淪綵縫惡少衣邊線
黃著流亾首上巾四境鉏鈎徒望遂孤城鼠雀獨傷巡
戚姬垺燼朝朝火范蠡湖荒夜夜燐惟我有親纔捧檄
單車就道始披榛桂薑老太偏存辣薑白從來耐受辛
珠遁簪曾還合浦花繁今又種安仁村名石井常留月
瑞紀班枝尚有麟虎爲傳君過北渡雉因童子就埽馴
輿情一任歌兼謗廷論何妨侃復聞惠政止餘碑在口
窮鄉安得賄焚身聲名詎慮卿慚長威信咸驚吏若神
東郡趨庭當烈日西疇祈雨值茲辰邑侯齋向賢祠禱
太守寬爲孝女伸從此天心稱穰穰依然原隰慶昫昫

音耳 屈平卷之十一
績當魯國成何晚 畝到南陽問必真 桃李秋門分得少
豕魚鄴架校讐頻 登陴練就彎強卒 入幕閒將作奏賓
居士暇時惟六一 勝人醒處足三旬 曹丘半是長安牘
虞芮多因隔縣民 恥託二天州刺史 懶呈尺字漢平津
謂方濟寧孫益都也 范雲宦罷甘嘗麥 張翰秋深每憶蓴 屈指五
年週甲子 遙臨九月是庚寅 故園情篤還侵夢 祇樹心
虔久戒嗔 叔可乘騎悲武子 姊能矢栢念靈均 老猶待
卜滕公冢 孫盡連成謝氏姻 雞肋眼前如可棄 棠陰別
後更能新 蓼莪有淚空瞻岵 負荷無才繼析薪 作客已
經難似蜀坑儒 何意酷如秦 柴車毀却人休借 比舍炊
成爨不因赤土須 磨天外劍青氈 留取坐間茵 願紉蘭

佩羞同艾敢擬金 根妄改銀粟里風傳陶靖節 龍眠山
屬李公麟 東頭屋在堪消夏 下溟田開定及春 饒有壯
懷仍落落 不禁狂舞自蹲蹲 碁敲涼月貪邀客 棗過前
檐豈羨隣 漫道柴桑無逸趣 烹葵釀秫未全貧

丙子初度偶吟四首

也知歲月愁中度 偏向閨中事事愁 生計有無隨分過
恐驚霜雪早侵頭

前有霜根後有槐 隨風灑雨漬空階 不須素食依三寶
常啜糟糠卽是齋

每見卿愁我不愁 我原自許是黔婁 封侯此日何從覓
虛負凝妝上翠樓

已經家難嗟無母况復堂空未有姑此日六親俱係我
我能忍作薄情夫

題池河主人壁

野店大方迎宿客短牆鷄又喚行人匆匆襍被何時息
虛負鶯花二月春

書家信後口號五首

塞雁南飛萬里途同聲雲裏自相呼庭前暗數排空陣
恰恰成雙未有孤

相約歸期今欲愆不同鴻鴈到南天情知客騎歸來晚
莫信君平賺卜錢

慣得癡兒嬌更憐終朝撩亂火堆邊慮他吸盡三升乳

夜半長啼母不眠

老僕騎驢先我回呱呱偏念此嬰孩歸囊見說無瓜果

啼向懷中不下來

魏紫姚黃花遠攜栽時勿棄舊丸泥爲予寄語嬌癡女
烹太蒼苔剝啄鷄

邊詞

旌旗逐隊共揮戈戰士沙場喋血多主將論功歸上第
幾曾白骨受恩波

渡汶河示舟子

聽說從前有客過音容約記似予多尋思不用求名姓
舍弟曾經此渡河

過主人園中觀杏

倚杖尋芳一徑斜，胭脂半落雨中花。知君釀熟能留我，不必前村問酒家。

燕語

雙雙新燕語雕梁，一日銜泥幾度忙。却笑無家千里客，與君同是借人堂。

送春

風飄柳絮點人衣，又見殘紅撲面飛。曾約春歸須待我，留春不住讓春歸。

七夕

瓜果初陳針線收，誰家巧婦獨登樓。凭肩漫作他生誓，

且共今生到白頭

馬方思

字江公號屏菴一公之第七弟也早喪母敏悟過人父以少子稍姑息能彊志力學年方舞象即補弟子員大司寇姚公龍懷愛其才以長女妻之嘗與諸昆更番侍父任一門之內以父兄為師友先後學使者拔真高等儀于壘宮年二十五卒親知戚為之恫嘆不獨樞部公抱喪明之痛一公輩銜人琴之悲也所著有寒檜軒集藏于家

元宵侍大人飲有懷五兄新逝

上元當此夕寂寞度佳辰病起行差健庭趨舞試新燈花雖縱目池草暗傷神若得同來此應嗟少一人

季秋送姚庭若南下省其婦翁方邵邨侍御

何事霜天忽遠征頻年有夢憶冰清楓林到處同秋爽雁陣橫空共客行人入玉關驚老至話盈甥室總離情

蟹螯蓄並東籬酒遲雨歸鞭十月程

姚注若招同張齡若諸子

倦向齋前步夕陽承君招飲北山堂酒開新釀浮尊綠

蔬出行厨帶雨香坐有丈人寬禮澆談深今夕任疎狂

醉中更玩新圖畫時注若新學畫山水不問瓶傾與漏長

友人邀遊龍井因雨阻未往詩以志悵兼和張齡

若韵寄竺怡上人

有約尋山興儘賒塵心濯向梵王家那堪春色傷榆莢

未向茅菴惜落花繞徑柳陰纔曳綠傍崑竹塢又添芽

虛予此度來聽泐乘暇還期共煮茶

且署中懷內兼和原韻

猶記離筵慘落暉霜天開篋拂征衣倏驚歲暮懷人急
為戀庭幃未忍歸繞膝諸雛猶可慰長貧旨蓄莫教稀
勞將春酒封藏好待我還家坐翠微

暮春拜別大人二首

輪省庭闈輪告歸一年幾度感睽離衰親愛向山居老
薄宦慚因兒達遲飴已多孫含有日莊堪種秫釀無期
菊松此去開三徑好是逍遙綠野時

離筵夜夜侍庭除話到家常意不舒向子累纒名岳遂

小同情切暮年餘三叅卜正無佳兆百口貧猶共一居

孤首自當迎旅櫬敢無撫姪待克閭時大人命迎五兄之櫬歸桐兼以

七姪為囑

音韻原珠卷之十一
大人憂旱欲移家累先歸

賢勞小邑已多年北戶桑麻尚宛然憂旱頓驚荏澤警
移家擬就秫莊田貧憐宦橐書猶富愚有孫謀貽亦賢
爲報鹿門須早葺清陰依舊綠窻前
夏日同姚庭若遊夕園偶占一絕
出郭尋山酒不賒竹林共坐話桑麻枯僧莫晒狂夫醉
燒笋還烹穀雨茶

十四夜聞歸雁有賦

月明午夜正中天歸雁聲聲掠陣旋爲問爾從南地過
家書曾否藉君傳

病中紀事

病覺浮生竟日闌柴關暮掩鳥飛還忽聞靜裏爭喧急
鵲啄餘冰落照間

丙午落第感懷二首

桃李公門未敢期上林果自斲殘枝可憐賤子投閒日
猶是嚴親遠望時

九月江鄉蟹漸肥東籬菊亦正芳菲登高携得床頭酒
惟愛黃花待我歸

馬日思

字禹公順治間諸生一公之第五弟也弱敏

悟約落落寡交贅婦翁何辯齋家惟浮白讀書兩
花登高之屐秦淮泛舟之船間一寄興而已年三
十餘早卒樞部公哭之慟一子塲以一公仲子鳳
翥爲之後其詩皆散失無存僅按其趨庭草數首
猶陶丘署
中手書者

雪中夜坐

瑞雪年華好，殘冬夜氣寒。山陰遊有興，梁苑賦誰看。擁
被爐猶冷，開窻絮已殘。豈知冰署裏，亦自卧袁安。

呈佺山先生

何事高人不肯閒，一年強半鎖柴關。貧無生計惟彈鋏，
老向交遊爲買山。梨棗漫矜裝橐富，風霜須識道途艱。
哺雛軒裏朝朝望，久客休教臘盡還。

壽佺山先生

頻年踪跡遍天涯，荒署經時駐客車。詩似杜陵推史筆，
妻如栗里共耕畝。介眉正合傾春酒，攬鏡何嘗見雪華。
岱嶽曾登有熊夢，徐卿二子送君家。

元宵月食

每對清光惟獨步，况逢佳節倍多情。嫦娥有意悲離別，
不使今宵向客明。

前題佺山及愚兄弟各得一絕，意調相同，因復拈
此。

閒庭唱和興悠悠，詩思相侔句亦侔。只恐愁憑明月寄，
却因無月轉添愁。

竹枝詞二首

妾似葵花長向日，郎如柳絮只隨風。殷勤爲勸章臺客，
落盡花時絮亦空。

書來但說歸心速，春仲相期秋後裝。無定光陰惟日月，

郎邊偏短妾偏長

竹對蘭二首

法因無且轉新添

開爽習味與新添昔思昨對亦對只恐愁戀隨其害

此

前數念山氣愚只策各駢一絲意情昨同因對昨

不與今齊向客問

尋樸青米對歸丈與致自消奇多部款款育意悲轉限

天曾且食

龍眠風雅卷六十二目錄

木厓潘 江蜀藻輯

金閻章鏡承孝可 祭

甥方 將當時

左國昌 十五首

姚文良 四首

方于宣 四首

吳兆武 一首

丁舟巘 五首

吳熹 一首

吳席 一首

戴 臚 五十五首

方 碩 二十五首

錢法祖 十六首

姚氏鳳儀 二十六首

吳昌猷 八首

姚士塗 十五首

殷 邦 二首

姚鼎季

二十八首

張竑

三十首

周孔爰

一首

周肯堂

二首

吳水



龍眠風雅卷六十二

木厓潘 江蜀藻輯

戴

臚

字韓五儀部梳河公之孫文學式其之子也

學被服師傳單思腐毫不肯苟作家貧以傳經為業學殖富有津梁後學輒能隨質導引歸于繩尺江州司馬江子磊齋延入讓溪署中訓其諸子以病卒于邸次聞者咸為惋惜韓五所作詩頗多有一存餘集自怡草歲寒吟諸稿已逃其最者專為一卷以表幽潛正在編摩間客告我外邊有議予茲選稍濫者不得已遂自愧始因痛加芟削然前此已悔莫追矣韓五有知當不以於嚴罪我也

步出城東門行

為橋成作

步出城東門歡聲滿道旁與客河堤立橋成生輝光經營已數月風景倏異常濟人勝舟楫寧嘆川無梁自今涉不病往來免寒裳豈獨利百姓亦以通工商舊署曰

子來此名差足當側聞昔盛時茲橋壯吾鄉青龍落日
見彩虹臥波長百貨左右列市肆東西望結隊閒遊子
拍板間笙簧美人月下來携手闐艷妝盛事豈能久世
變遂荒涼歷今三十載父老臨河傷向我談往昔追思
不能忘不圖至今日大舉復群襄朱欄照水赤白石受
苔蒼登橋若平地驅車可同行請看走馬過聯翩少年
郎誰爲題柱者念之心飛揚

讓溪署中午日集種花堂限午字

客序屆天中閱俗似吾土隨地合時宜令節尚重五賢
侯從民風山城狎笳鼓公餘張讌會親朋具賓主娛母
衣斑爛嬉兒弄綵縷尤快竹林歡但少花萼聚談諧窮

探揆小技亦云輔雅類西園集勝效東山賸居官有餘
清爲儒何必腐冰厨出精饌汎蒲競當午供客炙新鵝
華筵踰常矩倦閒覓瞻眺行園陟花塲輕風蕩微涼悠
然歇沉雨仰面看濃陰流鶯刷毛羽葱菁露群山孤亭
誠可補坐久爽易招支頤笏漫拄豈云官且貧菜根種
盈圃烹葵再命酌豪致旋起舞酒政戒苛條詩曹習舊
伍尊前引大白拚醉誰復數座上抽短毫催吟良太苦
剪燭不知夜新月忽已吐人生貴行樂碌碌奚足取牢
騷會須平當歌勿懷古

孤兒行

吁嗟噫嘻悲哉人生之苦莫如無父無父人不憐猶且

受人侮執手雖有兄弟權舉目竟無伯叔撫背人常下
孤兒淚對人吞聲不敢吐堂上母老家徹貧茹檠今年
稱六旬大母冰霜踰八十白髮如雪骨嶙峋報劉之情
何日陳曾無菽水可養親厨中釜甑已生塵行將負米
兼負薪自分有生數多舛誰料天地容吾身此身未有
託儼然獨立雞群鶴垂髫擇學好詩書父死失傳將廢
學願守我柴荆安能事耕鑿悲哉男子志在凌秋雲孤
兒磊磊復落落孤兒悲悲歌未竟聲凄其忍淚喉苦咽
放聲腹苦饑吁嗟嗚呼人生之苦莫如無父我生何竟
爲孤兒激烈推枕起中夜毛豎似聞鬼相咤久已顏面
令人憎曷不長揖向人謝君不見梁鴻少孤爲賃舂未

必窮年鬱鬱寄廡下

漏雪歌

我有數椽依老樹地無半畝亦環堵曾避風雨不避雪
覆屋稀疎未嘗補今年仲冬雪初見寒花片墮攪素練
直壓屋椽椽欲頽瓦縫參差下如霰屋裡何異飛當空
小牕明几外內同誰擲瓊瑤碎我室輝我蓬葦何時窮
貧家人夜燈每斷藉此分光到書案忽驚案上白盈盈
掀翻書帙濕已半書濕不妨且不讀冷埋地爐欺楮楮
悄然凍坐體欲僵脫衣擁被寒生粟稚女畏寒床上啼
荆妻忍凍手提携蒙頭卷膝難安臥夜長醒耳思聞鷄
曉起呼爨厨無烟煮濤但聚水晶鹽薪濕撐竈炊不熟

音耶風雅卷之十二
買薪挾價安能廉出戶劈面風雪打可憐饑雀啄檐啞
凍翅見人不得飛惟我與汝同病者噫吁嘻大雪莫蔽
寒士門空厨累日之饗殮大雪莫侵寒士屋四壁虛無
寒徹骨

題孫兩田客舟草後

我愛南遊客牢騷盡付詩歸看囊是錦編就色爲絲星
斗秋江落雲烟夜權隨酒酣歌莫放遙動越吳思

送廓也上人之白下

忽買扁舟去何爲憶秣陵塔尋多寶現臺望雨花登藉
受如來戒應叅最上乘一瓢兼一衲猶似六朝僧

由皖歸訪錢孝則湖上卽事二首

群從交情厚貧還喜客來恰乘秋月閏遲却好花開黠
鼠侵晨嚙驚蟬傍暮哀已知行色慘誰復肯憐才
亭上俯修木蕭疎受夏涼拂雲叢桂暗撐屋老梅蒼夜
月張琴理秋風啓甕嘗翻嫌拘禮法信宿兩相忘

張吉如齋頭夜話

城頭更懶報大抵是宵分風響疑穿竹天空欲墮雲架
看書累帙匣有劍藏文得句燈殘後鐘聲落枕聞

憶越巢早梅

谷口層臺上橫檐一樹梅生因高處傲放被暖時催在
野全增色先春早受胎雪寒門正揜且問客誰來

雪蕉初夏卽事

入夏暑方侵茅堂盡覆陰巢存來舊燕樹密得幽禽晨
露濯花瘦午雲窺牖深却因方丈室常繫讀書心

贈童求上人

即張僧持弟今從石和尚遊

年少持精戒如君亦竟能長齋胎已受猛力行全憑博
學羞儒業叅禪對佛燈阿兄雖賣藥也是在家僧

錄姚嵩肇遺詩

知君難再世身後類文園未有傳書種空招作賦魂生
承香案謫死博玉樓恩夙病緣吟苦篇篇碧血存

夏日過張我思涉園

登樓心自遠

園有心遠樓

衣冷臥雲輕素壁分水潔規窻受

月明罨青山綴色空響竹流聲別具小丘壑欣然忘俗

情

署中秋晚雜咏

署靜渾閒事荒園步幾回草枯除射地石亂彘花臺彈
雀過墻去牽藤上架來晚涼踈雨滴秋意滿尊罍

客中烹魚醉而拈此

客舍迎江路呼船自買魚未經供饌美先喜出罾初浪
跡非彈鋏思鄉故問書吳泉堪一醉興欲擬尊鱸

過江州宿興龍庵贈住持了能

古刹名曾識高僧臘更尊談禪宗乘熟入世道心生靜
對梅花坐勤持貝葉翻喜聞藏跡處廬岳有祇園

阻風值雨

寒滯春江擢無端信野橫倒風推岸浪斜雨驟篷聲雜
語隣舟開孤吟獨夜清淒然增客思醒眼待天明

阻雪

小艇爭風便驚濤不肯平半帆難假力雙槳竟無聲穩
泊膠水固輕裝載雪盈貪眠炊熟起只畏濕煙生

雪

寒牕猶對雪清趣客中賒繪色皴皆粉詩情淡不華盛
來烹玉茗踏去問梅花疑有神仙侶凌空鶴羽斜

碧筩杯

摘得新荷蓋如擎裏露盤刺香絲欲引傾酒色爭寒象
飲真堪似鯨吞轉覺難誰爲消暑法頓遣甕頭乾

磊齋以

外隙地盡爲菜圃卽事漫成

民色非難起看君此味長祇爭花譜艷寧識菜根香退
食分賓友加餐愧稻梁雖從年歉計淡泊亦何傷

喜孫小武得幼弟消息

桑田改後不勝悲每嘆君家會合奇有弟皆于分散得
逢人好釋死生疑兵爭未罷仍愁隔書觀如真豈恨遲
借問沙頭無數鳥春令飛到定何時

畫眉

山禽飲啄自無儔閒入園林性頗幽常顧羽毛臨水檻
獨將名字媚妝樓青螺解用輕描勝翠黛爭看細抹留
切莫含顰效西子恐應蹙損倍添愁

憶錢孝則兼寄左峙匡

遙知暑不到高臺舊向茅堂避暑來晴嶂出雲凭案立
晚禽棲竹待鐘催墅中鬪奕曾分局谿上行歌定幾回
深憶越巢招隱地賦成原讓左思才

同孫又申張吉如左峙匡訪注我園梅留飲限梅
字

籜碎因風掃砌苔犯寒爭綻一園梅窻中影向燈前亂
席上香從暗裏來防折戶教童子閉喜探尊爲故人開
孤山逸詠難追步對此吟情又被催

春雪送錢飲光先生歸江村兼和留別之作

依依送別柳條新冷面衝風凍幅巾豈是梁園乘暮雪

翻教下里和陽春羈留市井成孤客畢竟詞壇第一人
誰道方袍無處任田間大可著遺民

蜀客弟新婚

梅枝初亞向檐窺正傍粧臺索笑宜綉褥香温寒不近
珠簾月度夜猶遲長卿自有求鳳操秦女能爲引鳳吹
從此深閨同咏絮勸君刪却舊來詩

喜晤楊無諍先生白下

老困才名漫乞憐干霄筆勢尚依然見君似欲長爲客
交我何由不論年無術自酬黎棗富服丹人羨鬢鬚玄
且看白下驚心處柳外鳥啼只暮烟

白門懷皖中應試諸子

楊柳青青任別離尊前曾與約歸期翻悲獨客羈留久
正想諸君戰勝竒竹響只敲連雨夢花飛難寄送春詩
江南江北烟波迥一樣江城聽子規

喜報恩寺塔修成併建塔前大殿

長千古塔插雲中五色琉璃絢碧空不壞由來憑佛力
重修畢竟是神工然燈夜夜明如晝繫鐸層層靜有風
禮罷更瞻新寶殿莊嚴一代梵王宮

潘貽孫移居卽其家故宅

比舍皆居司馬孫百年門巷舊來尊又歸易主前人第
將築娛親大隱園燕賀應知巢不改鶯遷却喜樹還存
外家闕閱今隣並韋杜城南許再論

舊所居爲令舅氏得之兩宅比隣纔

可數武

集姚東朗想山處酌蓮是日立秋

花砌深深暑退遲晚涼呼客醉花時碧翻珠顆盤陳露
白擁香房粉暈脂井畔初傳梧葉墮燈前莫認海棠垂
迎風欲綻明朝蕊虛遣先開第一枝

夜過石塘湖

遠岸烟昏多夕陽闌風偏促槳聲忙乍聞菰裏漁罾起
時覺衣邊荇帶香乘去使槎星可接過來野寺樹全藏
偶然寄宿還成夢月滿湖心一櫂涼

南昌喜遇孫豹人先生

當代詞壇重大名欣逢老筆更縱橫別來尚識荊州面

年少曾聞有道聲，歷盡山川成客況。談深故舊見交情，萍踪偶自章江合。還憶龍眠感慨生。

贈江磊齋二首

君才只合侍金門，百里那堪展士元。聖主屏風新重吏，名家床笏舊承恩。藜窺天祿聲先著，花擬河陽跡尚存。莫謂荒區遲報最，從來利器試盤根。

十年釋褐甫爲官，鄉近携家不道難。灑水冷然清且挹，匡廬深處秀能餐。娛親更學斑衣舞，兄弟頻溫大被寒。誰似平原還愛客，也隨幕裏盡君權。

贈德安姚小山明府

邑有葛洪山

匡廬峰畔領花城，葉染霜紅擁蓋迎。才借石渠勤吏事，

地非勾漏重仙名。披帷篆暖香初艷，入座琴餘韻獨清。五尺去天瞻瑣闥，鷄行爭聽雁行聲。

懷張吉如并寄吳賡虞

每尋仲蔚欵扉開，隴鳥先能報客來。窗外種蕉堪聽雨，竹邊移石愛生苔。耽遊肯廢探幽屐，斷飲曾呼賭醉盃。近與吳郎數晨夕，莫忘尺素共詩裁。

見燕子

垂楊新種待鶯啼，何意開軒燕到齊。社後春深穿暖徑，雨前晴穩試香泥。雕梁選定身方主，瀚海飛來影不迷。笑尔因人偏似拙，讓誰常傍上林栖。

蛟臺贈童期公

身在塵中鶴立孤生平豪氣對君無青瑣自是傳經物
絳帳爭來問字徒閣上烟雲供筆墨宅邊泉石領江湖
相逢莫作悲歌態久已文章笑腐儒

與蜀客弟同抵灤水復送之楚

扁舟十日共江干解纜其如解袂難爲客笑予裘已敝
出門憐爾鈇初彈晨昏遠接嚴親夢菽水權貽大母歡
歲暮行蹤休久滯楚天愁聽雁聲寒

蜀客弟由楚返灤雪中送之歸里

客程計日漢川頭曾約歸裝榻更留姜氏被從江上暖
謝家詩自雪中收修途未免投人刺儉橐難爲卒歲謀
自顧旅懷猶送別一天寒色悵孤舟

懷龍眠二首

數椽蘭若嵌山隈猶記支公撥草萊

謂水上人

鋤圃每因供

客饌讀書曾許傍經臺池邊雀去空留月

水上人久逝座上

獅馴又吼雷

一名獅子社今爲無鑿禪師駐錫

懸憶虎溪宗社主禪關

春到蒲蒼苔

精舍

入山豈必絕山幽人境爲廬亦可求曉霧深穿松徑濕
春風小憩橋亭秋書牀筆格閒情適鳥語花開野趣收
往往探梅緣分減至今常似憶羅浮

九峰山房

繡聞紹聞來省其兄因爲堂上獻祝喜晤賦此

伯子居官唱和稀春帆來逆雁行飛幸留冰署花分管
看奉霞觴綵映衣千里駕兼存杵臼三珠樹獨艷庭闈

尊前且共西堂話聚首艱難莫易歸

贈姚佩若

才名直噪五雲邊世濟家聲總讓賢鯉對又看烏府峻
雄文爭領雁行先輸君興致當尊酒視我鬚眉更少年
喜咏新詩饒紀勝登臨應擬壯遊篇

李芥須夫子惠書并寄詩扇見懷次韻奉答

客心每繫故山邨回首當年立雪門弟子琴書行李滯
先生松菊草堂存自憐王粲依殊土敢擬侯芭受法言
拜牘還兼詩在袖如從杖履話寒温

返里喜左注我兄弟連日招飲因箴我索題餘軒

卽席用壁間韻

佳名偏愛此軒居事事難忘世澤餘繩武意深披諫草
過庭悲往重遺書徑通巷市喧能寂惚借園林致不虛
有客初歸頻款戶須知最近是吾廬

立春後二日同諸子訪胡彥三石門山居

早聞卜築近山邨曾是先朝大隱園

居為外曾祖大
叅公讀書舊址

里尚存韋氏第烟霞兼屬晉公孫秋田負郭留餘頃世

業趨庭受雅言

大叅公著有
壁經雅言

幾度擬尋憐客滯東風邀

扣草堂門

九日對雨飲被閏齋與左注我箴我同賦

西齋九日苦蕭騷積雨愁牽興不豪佳節城中難免俗
今年屋裡當登高藍田勝集堪懷杜栗里閒情合擬陶

性僻猶能追往事風流畢竟屬吾曹縱羞落帽全無髮
爭取題詩更用饒圍爲霜寒遲放菊蟹因潮長乏持螯
翻虛杖底曾携物且破牀頭未盡醪踈響只聞飛敗葉
乍涼微覺入單袍雁行似帶三江濕山瀑應添萬壑濤
好待新晴還整屐徧採秋色莫辭勞

無題四首

嬋娟爭現月中身清照盈盈絕點塵每向人前偷半面
不知窺著是何人

天然雙抹遠山橫映帶秋波分外明乍見迴身留顧盼
極深情處似無情

自惜如花只淡妝芳心不禁逐蜂狂秋容更與誰爭艷

斂笑無言對海棠

牡丹新樣學來梳却憶瓜含未破初從此白頭應有歎
當墟何不嫁相如

左國昌

字子永侍御三山公之仲子也爲夏子子周
異母兄弟友愛有加十歲隨侍御公宦閩南
強識博聞造語必嘔心血嘗覽邑志載譚孝子事
僅據虎守門一節爲驗喟然曰人性物性一也虎
守門已到盡物性地位非孝子而何十七補諸生
與同榜生吳德音式昭吳昌仍燕公齊繩祖念修
方里井公趙襄國以贊有六駿之稱侍御公按浙
子永偕兄弟僑居白門杜門謝客了不知爲貴家
兒乙酉避亂新安夢神人告曰左氏陽九當在汝
二親遂以小年夜禱于神願以身代年三十早卒
卒之先一日始爲父母言之其純孝如此予有事
茲選人列小傳不以文采先行誼其孤森以所撰
行略見示故爲

夏彝仲陳臥子爲先王父序拾餘錄謂其惓切黨

音見屋牙先之二二
禍稱爲知幾因憶往事感賦

刑餘呼父母靈帝畏稱兄堪憐陳竇輩身爲國事爭
熹廟得世父柱下稱錚錚抗疏李選侍移宮著直聲貂
璫皆神叢公卿學逢迎或有知幾者築室擬袁閎城狐
惟恐犯喙虎莫敢撓世父獨仗劍仇者已欲烹檻車三
千里園門芝草生大父垂老別隕涕回神京膺滂竟碎
首天日慘不明白雀哀家園何殊大鳥鳴肘腋爲敵國
朝夕有人偵西亭與北寺十族且數驚所幸聖人出江
海見澄清日月有時矣諸公請易名偃毛遵突抗胥尚
賴奢成

登鷄籠山懷古

松檟何年老蕭梁臺殿灰寺隨弓鼎下門傍辟雍開仙
梵人烟出 高皇天仗來他時侍從者簪筆有鄒枚
過華嚴與普光藏之兩上人茶話晚歸遇雨

空堂鳴磬罷携我坐香臺二十年前願三千界裏回斜
穿雲樹沒遠指布帆開虎跡留山路深防去復來

孤城久困望援兵不至

戍樓三百雉終夜坐塵埃孤雁雲邊沒雙鵬城上哀鐵
衣空自冷玉帳未曾開日誦秦州句將軍伐鼓來

望碾玉峽

瀑布傳茲峽山陰興可乘落花沾路濕亂石倚崖崩欲
就農家問兼無樵子憑烟蘿徒隔望何日再來登

過別峰庵

緣坡穿竹樹又見梵王家院俯千峰秀門開一徑花茶
香爭穀雨飯熟煮胡麻暫覓蕉窻夢西林日已斜

霧冲

地僻無兵掠亭閒到客稀採桑都是女種竹盡名妃犢
子凌晨放鵝群傍晚歸何分蘭與蕙香氣出林微

晚宿鑪峰下

萬木叢篁裡茅齋朴正宜借陰編虎落補隙柵鷄埒聽
曲隨風轉呼樽向日移問更憑鳥報促坐待晨炊

憩九峰

隔嶺尋蘭若高松隱翠微餉人炊薏苡供佛架薔薇去

去情難別行行願復違春陰遮薄日却恨雨催歸

雨歸越巢

露濕衝泥至瓜棚當草亭一灘沙洗白夾岍桺搖青留
客看漁釣呼童載酒餅重遊如未厭到此亦須停

過祝聖寺送清隱上人之白門

遠公趺坐石床間客到門前未掩關荒寺雖嫌廛市近
孤雲常共鉢盂閒詩存古調無人和經在名山隨地頒

清隱有藏板分
散嘉善秀水

蒲饌烟殘難挂錫滄江秋色上容顏

甲申秋避難新安道中

負笈擔簷敢憚遙餐風沐雨自朝朝逢來豪客誰憐李
逃去奚奴不愛蕭時被盜僕
有去者夾路但聞啼虎豹巢林何

處寄鷓鴣莫言避禍全無策尚有吳門乞食簫

山齋讀書偶咏

磴引深林徑引苔平天小閣半峰開松宜閒聽時臨水
月稱高情一上臺鳥逐落花穿塢入僧從乞米破烟回
蕭條鎮日容疎放那見披榛二仲來

夏日山居

灌木千章覆短墻山齋當夏傲羲皇窓臨翠壁全消暑
花落閒堦自有香愛納晚涼凭水榭喜聽鶯語坐風篁
敲詩淪茗渾無事一撥爐烟入夢鄉

同友人春遊

芳郊春到最堪憐偶共提壺二月天處處水流紅杏雨

家家人在綠楊烟輕衫廣袖看肩並紫燕黃鸝聽語圓
數載情懷今暢好從教春去任啼鴉

方

碩

字侯士李芥須之入室弟子也在芥須門下
時年方舞勺芥須嗜風雅設帳古塘偶吟春

郊花發候侯士輒續云山礪月明時芥須異之嗣
是丁作詩弱冠補邑諸生冠一軍試文傳海內凡
六入棘闈未及艾卒有五七律
數卷無古詩亦許渾之流亞也

遲芥須李夫子不至即步原韻

何處談心好還期欲報庵納涼依大樹煮茗汲深潭孤
月窓間靜清風夢裏酣幾番望不至兀坐白蓮龕

盛孝寬招集古塘得花字

已悲秋瑟瑟又覩日暉暉歲歉龍常蟄霜遲蟹不肥幽
花歛亂草墜葉響空闌季子茱萸酒酣時揜菊歸

砧聲

搗衣日日事著意是深秋寒入三更夢風添萬里愁紫
貂裘不遍黃菊酒難郵惟有閨中力聲聲寄隴頭

北堂初度得筵字

慈親年過六諸子恣茫然鷄遜茅容割熊慚仲郢賢萱
花開處處萸莢紀年年喜進今宵酒盤蔬當綺筵

山中雜興

一逕夾山水千家靜日暉誅茅緣補漏摘果爲防饑甜
釀經秋蜜寒縫隔歲衣趁晴燒栗炭不待六花飛

曉發

夜漏聽纔歇晨征路已東雖然迎面日不敵打頭風人

亂黃塵裡鴉呼墨樹中今朝何事早納粟到衰翁

官埠橋

一路經行處楸梧與薜蘿山深牛跡少沙澗雁痕多人
盡愁霜重橋還帶雨過冷烟茅店裡沽酒聽漁歌

峽山村舍

寒村山作幃小院草爲樓喚犬緣防虎關驢正傍牛香
然諸佛面霜冷五更頭未曙呼炊飯燈花落敝裘

諸父宗玉饋魚

吾伯生平儉烹鮮月幾回忽馳小力至言送活魚來百
里塘皆涸三星罾可哀有肴翻覓酒不盡是隣醅

雨中獨酌示內

音見眉牙卷之二
飯減羞然火囊空近典錢自知惟汝苦相對竟誰憐煖
酒纔知釀烹魚未買鮮今宵霧氣重衾薄可裝綿

送戴蜀客入蜀

錦江江畔錦官城萊子斑衣事遠征路入蠶叢隨馬首
人過鳥道聽猿聲望雲劍閣憐先王看月琴臺憶長卿
從此趨庭饒笑詠草堂應亦有詩名

次張澡青太史韻呈四松伯兄

早歲雙推白鹿車鹿門偕隱復何如宦情冷似飛霜日
賓敬莊於解綬餘擲地吟成摩詰畫臨池寫得右軍書
傍人莫問東山事一枕羲皇舊草廬

重九後三日集飲潘貽孫畏築步還山兄韻

踈籬猶帶兩三花門逕參差路不遐鮮鯽膾嘗三白酒
雕胡飯煮六安茶已從空際看孤雁懶向高林數暮鴉
好月入簾休秉燭知君詩思正無涯

送潘渭臣歸白下

天門遙接石城霞萊子思歸夢裡賒故國是家翻作客
他鄉爲客更成家蘆花朶朶迎人揖雁陣蕭蕭背日斜
此去秣陵堂上問季方合卺正年華

不寐

露下銀河月欲西幾回側聽雁聲低數莖白髮歎寒枕
一盞青燈傍小溪人爲乍貧眠卽覺兒因失乳臥還啼
從前多少邯鄲夢徹夜醒然聽曉鷄

音見月牙卷之二
爲潘連城催妝詩

兩朝伉儷結層層
權買秋江賦
迨水外祖家元前宰相
曾王父是大中丞龍乘至後陽初復鸞噦
弦時月正升
從此門闌增氣色
竹松長繞百花藤

謁先大人攢室

呼兒策蹇意如何
泥著青松咏蓼莪
臘雪尚堆三尺許
春風又是一年過
酒纔澆後悲猿鶴
燈欲殘時冷薜蘿
惟有山僧常作伴
白雲深處梵音多

對雪

飄揚無定亦無瑕
帶雨隨風整復斜
已似謝庭飄柳絮
更同庾嶺落梅花
浮空不解貂裘冷
颺影還添鶴鬢嗟

鸚鵡對看如有意
飛來飛去噪窓紗

山齋得天字

小霽輕寒二月天
山僧招我入龍眠
團瓢燕語初來澹
隔浦鶯聲取次圓
有女尋釵紅杏裡
何人吹簫綠楊邊
此時歛憶柴桑客
但撫清琴不問絃

山中阻雨再得天字

春禽嘹唳曉寒天
早起披衣坐一氈
卯酒自斟壺易竭
午茶僧瀹火頻然
將歸忽失漫山樹
側聽微澌古澗泉
昨日晴光今日雨
落花片片北窓前

挽四松先生

黃金纔盡故交疎
不愛烟霞駕遠車
豈有鳩人羊叔子

可憐貴客馬相如遊裝輕似扶筇日長嘆多於彈鋏餘
已矣先生西去後篋中贏得數行書

境主廟

名園收拾種橙篁別構三間主簿堂歇馬聽來松樹韻
開樽嘗得菊花香閒看獵火燒山逕醉把漁竿釣夕陽
一路樵歌天欲暮北風吹冷舊衣裳

峽山歸途

峽山山路遠微微久客思家起鳥飛雁宿平湖都是凍
鷗呼老樹半因饑一園朱橘霜封瓦十里青松露滴衣
如此隆冬閒不得衝泥鞭馬霧中歸

抵家

霜風吹老客中顏十日江城去復還倦極惟愁前路永
貧來那得此身閒金從盡後纔知寶鬢到皤時漸少斑
賴有一尊能撥悶呼兒煖著不須慳

長至

欲買青山寄此身尚憐兒女未成人囊空祇覺連年老
衾薄翻愁午夜貧幾點疎鐘敲令節一番征雁度寒津
水仙箇箇篋盆裡蚤孕香風到隱淪

姚文泉

字夏侯樞部戊生公之第八子也順治中補諸生與諸昆切磨問學才藻爛發兄司寇龍

懷公甚器待之屢見賞于文衡年二十餘與同母兄介侯後先卽世語云叢蘭欲茂秋風敗之君兄弟之謂矣所著有瑞隱草

頌嘉卽事

音耶 屈 雅 卷 六 二
平蕪舒早望芳草綠萋萋雲斂山光出禽來樹影低上
林詩自勝花萼景難稽漸覺幽居好溪邊杖可携

無酒

山深春氣淺無酒覺寒多竹暗燈光透溪喧梵響和客
愁雙劍倚雁陣一聲過恍惚窓間月依稀在薜蘿

贈歸客

年來生計尚如蓬旅客蕭蕭歎路窮雁字數行秋葉老
霜華幾點嶺梅紅帆過江寺聞清梵權返家園藉好風
把袂臨歧頻有約春樽還待故人同

夕眺

望中野色變衰顏雨後風光天水間一片青苔封古石

幾行疎樹點空山僧歸柳逕初傳磬秋入綿衣欲掩關
暫倚草亭因待月肯教夕照負人還

錢灋祖

字孝則西頑先生之長子也南渡時西頑避
黨禍亡命三吳母方夫人踪得之遇兵亂抱
女赴水死作兩絕句紉孝則衣帶中有願作吳江
一段波之語孝則每為人泣述之西頑理閩之延
平孝則親執家苦糲食敝衣能自得師博通經史
文譽蒸蒸起一夜盜入室執孝則拷掠楚毒以衛
後母故被害時守令懼禍譴相率諱盜盜逸去無
一獲者反誣以他故海內士大夫聞者莫不寃之

雙鳥作

雙鳥從南來各飛天一方相去萬餘里日夕永相望九
月號北風所嗟道路長同行天南隅忽復參與商故人
在遠途有意不得將奄忽浮雲去中心悽以傷良朋難
邁會况茲戎馬塲握手一揮淚仰視雁北翔願分雙羽

音耳居牙名之二
翼與君還故鄉

老梅行

老梅峯嶺如鬼立當軒對我森列戟二更殘月西山頭
倒影虬龍走絕壁霜皮慘裂三千尺突兀猶爲人愛惜
不事芳菲爭特奇歲寒豈異松與栢憶昔策杖羅浮東
千株萬株相映紅東風一夜吹花落回首曲江春正濃
唱詩酌酒興何極冰姿玉態長相憶漢宮常恨草離離
此樹不改先人植已抽碧條弄新姿故著寒花綴春色
可憐枯槁老江濱孤芳肯媿桃李春物情代謝亦常理
甘拙或爲時俗嗔朔風颼颼鴻雁大山不調刁聲相和
天寒歲暮落日微烏啄雀翻山雪墮吁嗟乎老梅開花

花不芳陰崖骨立傲風霜與爾日夕永相望

放舟

最苦灘聲急乘危任短篷新寒綠小雨古木自淒風鄉
國千山外生涯五嶺中何時長挂席流向大江東
過抱蜀有懷左三扶于左四壯于

一徑到茅屋秋陰自可憐穴檐廳撲面全檻笋行邊貧
佃誰輸課荒畦少納錢也知逢儉歲庖忍負龍眠
夜坐

茅齋好寂寞獨坐萬山空一犬踈鐘外孤燈細雨中身
輕新脫絮樹老夜生風無意發清磬何人夢許同
清明將遊九龍先一日柬何氏兄弟

音耶屋牙卷之二
遙憶登臨勝追陪無計過鶯吭圓正好江練白如何展
齒疎苔蘚琴心在薜蘿二難應有待絕頂漫高歌

喜藏野師携琴見訪

破衲千峰老携琴問隱淪知音今日少絕調百年新借
此談宗旨偏能洽野人清宵一曲後孤月亦傷神

山居

巖風片片雁南征山川蕭蕭客愁生秋來秋去那堪說
野花野鳥難爲情天涯滄桑幾更改中原豺虎何縱橫
日暮長叫歸未得牽衣下淚如盆傾

宿昭平

沙村漠漠雲欲歸落日黃昏山樹稀獨宿蕪城玩明月

誰家砧杵鳴征衣鴻雁哀叫不知絕秋風飄葉與俱飛
徒傷流蕩灘江裏避亂相將覓釣磯

贈牛山道師

大隱先生合數君浮名塵世總銷閒尋藥草經霜後
細寫方書到夜分長物蕭然琴作侶孤懷聊爾鶴爲群
滿窓黃葉紛搖落秋思應知在白雲

過白鵲山房有感

銘旌吹雨厝山阿此日樓頭客少過泉路可憐癡阿叔
繩床誰復病維摩賣供官稅田園盡散落鄰家書籍多
滿壁銀鈎渾漫滅吞聲猶是昔詩歌

湖上打魚偶成

曾笥鱗鱗集水涯支分漁子弟兄偕江村晚歲魚爲米
官稅連年戶有差霜鬣困泥看撥刺雪刀砍鱸勅安排
舊醅况有床頭甕折柬呼朋到小齋

過舍弟聖岐

三徑無人白板扉杖藜相訪在斜暉雨淋老屋苔花遍
霜打疎林柿葉稀鄰母賢能供雀乳傭工閒與綻鶉衣
糟床見壓新篘酒更欲飛觴醉我歸

贈陳山人

青島秘笈幾人俱驢背相逢憶得無爲遍江南芭屨破
獨歸雲岳杖藜孤生金不掘緣知足靈藥能成早驗鬚
祇要如君各一藝世間何處有窮途

雪霽喜何三水令見過留宿不果

凍雀喧晴不定棲故人初過灤溪西水邨潮落居相接
沙岸泥淤屐自携魯酒賒嘗鄰店缺胡麻炊熟舍烟低
寒窻準擬燒高燭歸去徒教夜夢迷

初秋壽胡君渥父執六十初度

市朝遷去避江村舊是先皇公主孫好客共知傾白下
非時端合隱青門盤空野鶴秋前健列案蒼山雨後尊
我有老親新卜宅柴桑應可伴晨昏

方于宣

字遂高郡司馬還青公之仲子也順治初諸

生耽嗜圖史賞志早喪孤曾祐哀其遺稿還
青題之曰仲兒宿草十七年矣見此卷如嚮者携
詩百質時老夫不覺泫泫淚下雖然有子能集此
詩與其蕙綱詩並表章以
質之當世吾兒不死矣

山夜聞鐘

山夜群音寂翠微鐘忽鳴聽從空處起覺在到時生虛
谷答清響涼風度遠聲敲殘孤雀夢千嶂月初晴

水底梅影

梅似鏡中見清香帶濕來有春花自發無底樹難栽水
面蜂聲亂池頭鶴夢迴游魚咬荇藻一過一疑猜

登樓賦得舊苑荒臺楊柳新

一上迷樓感昔時駐春歌袖竟何之應憐廢帝荒臺苑
不似依人新柳枝芳草銷魂含翠黛香塵撲面損胭脂
扶筇一憩斜陽下憑弔那堪涕淚垂

九日侍大人暨兄子山弟幼安子將遊龍眠

曲曲清溪叠翠紋孤村樵唱隔林聞黃花折去詩應老
綠蟻浮來客易醺麝鼠徑存千岫竹虬松枝拂半山雲
茱萸共插登高處行盡荒郊有雁群

姚氏鳳儀

樞部戊生公之長女諸生方于宣之妻也所著有蕙綢閣詩集其伯母清芬閣節婦叙之曰吾姪女幼而敏慧隨宦淑水輒傲謝庭韻事適吾宗遂高益單心風雅生一子二女不幸遂高早世女年甫廿一其境愈苦其節愈堅其詩亦愈工不意癸卯冬又棄我而逝傳其詩正所以傳其節耳嗚呼清芬氏之言如此予錄遂高夫婦之詩既采四松之題辭又掇清芬之弁語毋亦以家庭之言為信而有徵也與

題定遠徐貞女卷

青青松與柏結幹傲秋霜孤雁不成偶哀鳴何可當我
聞徐氏女未嫁守孤孀十七方妙年寂寞居空房嗟哉

黃鵠歌誰爲雙鴛鴦夜夜聞烏啼淚濕羅衣裳隨母盡
子道奉事如姑嫜在苒五十年中道失高堂四顧無依
倚哀哀空斷腸詩書教兩弟努力攻縹緲阿弟稱雙珠
聲名騰四方行將膺寵錫姓名達君王女子有此節家
門豈尋常皎皎徐貞女千秋彤管光

丁酉仲秋曾祜十歲初度予歡甚回思夫子去世

兒在襁抱中撫稚之難有誰憐惻諄諄示汝讀
書成名不負孀母之艱辛偶成一章用誌勉策
有子有子名曾祜歲纔踰周已失怙襁抱之時多疾患
輟寢忘餐倍茶苦卜居截髮敢言貧侍側時教中規矩
熒熒弱質掌上看阿母百事盡艱難天寒視衣饑視食

飲冰茹檠耐霜寒今汝十齡喜及肩凝眸待著祖生鞭
新秋雙桂當筵吐祈爾繩繩望爾賢

園亭納涼

園林無暑到亭敞日偏長水潤侵衣濕風輕拂座涼修
篁聲戛戛古柏色蒼蒼小憩凭欄久悠然茗椀香

初月

新月如弓曲含輝渾著霜微微臨小檻宛宛過前廊桂
魄搖初影銀河漾淡光移時雖漸落流照亦何長

哭母

淚灑蒲觴後俄驚一載餘長眠人不覺薄命女如初總
帳秋風冷朱樓夜月虛歸寧當此日禮拜倍欷歔

送大妹和仲之江寧

尚記歸寧日庭前款語時看花同把袂咏絮各成詩
忽望雲山杳休嗟雁鯉遲有家須自立聽爾夢熊羆

夢中與亾四嫂話舊有感

深山風慘慄念爾淚雙垂渺渺魂何適悠悠花自悲
苔堦無履跡繡閣網蛛絲空作相逢夢殷勤似往時

孤鴻曲

夜靜虫吟寂開簾見爾飛數聲和漏永隻影共星稀
塞外霜風勁天邊列宿微可憐同此恨輾轉淚霑衣

上元前一日喜八弟夏侯自山中歸

春光宜筆硯勉力起芳辰鳥語紛相伴濤聲響作隣
野

梅隨路放幽草逐溪新明日傳柑節君歸慰老親

秋月

夜半堦前似有霜閒看秋色轉蒼茫金波宛宛臨朱戶
玉樹依依上畫堂露濕青苔侵砌潤風吹黃菊滿籬香
清光偏照羅幃冷倚徧欄干子夜長

咏辛夷花步夫子韻

點綴春光小院中開時還倩落梅風流鶯學語穿花杳
戲蝶尋香繞樹叢日照瓊枝光燦爛雲連玉葉影朦朧
窻前徙倚閒無事羨爾冰肌映碧空

春雨

柴門深閉少逢迎濁酒相留弟與兄巢結空梁多乳燕

音見屋牙卷之二
枝搖野樹有流鶯風來天澗山猶暗
春老雲昏月未明
掃石攤書堪坐久
淒淒夜雨作溪聲

喜接家報

閒來獨坐正沉吟
忽得家書果萬金
讀罷離騷愁夜短
歌殘別賦怨春深
老親百里傳安堵
幼弟千山寄好音
細向雨窻看轉劇
懷人兩地亦同心

懷大人

匹馬饑驅何所之
經年未有日歸期
孤燈獨咏長相憶
兩地同歌遠別離
旅客正愁聞信少
飛鴻猶恨寄書遲
江南江北多來往
消息如今忽不知

九日憶夫子

去年令節君同去
今日登臨我斷腸
野色宜人添悵望
秋山如畫惹淒涼
征鴻塞外全無信
叢菊籬邊初有香
和淚題詩君不見
千峰忽忽又斜陽

春日遣懷

空階小樹漸垂陰
旭日初融嵐氣侵
半捲珠簾人寂寂
斜薰寶篆晝沉沉
三眠楊柳舒新翠
百轉流鶯報好音
春到更添愁與病
憑欄不覺淚盈襟

讀望雲集贈孫夫人並步見贈原韻

林下風流鄴下才
珊瑚架筆傍粧臺
應知漢史君能續
更見邇文手自裁
佩得薜蘿和露種
夢回萱草望雲來
慚予茹檠無情緒
詩思還因錦字開

春日寄訊大妹和仲

離群長憶對嬋娟寄爾遙函望早旋梅信好傳芳意去
柳條偏惹別情牽霜鴻天外飛成字春鳥枝頭韻似絃
可記辛夷花下坐持杯嚦嚦聽啼鶻

十一月廿七日偶夢夫子自外歸病容枯槁口叙

生計之艱予一一應對猶如在日既醒而淚痕

漬枕但聞簷前風雨聲而已

遭家多難敢憂貧蕩析紛如亦苦辛授畝未曾舖弱子
寄棲一似作羈人病容憔悴艱參木生計蕭條貫米薪
夢裏逢君頻對泣醒來風雨尚霑巾

予作夢夫子詩蒙大人及諸兄弟贈句再賦

隻影多年累老親示予新句慰艱辛每逢夜績分隣火
幾斷晨炊待市薪書積紫微堪共讀吟成黃鵠豈傷貧

二兄詩中云慈大人
諳訣時慮予貧苦 泉臺縱憶孤孀女呼籲誰憐薄命

人

上元前二日祐兒讀書二兄竹笈軒作此勉之

王正淑氣正新鮮好鳥關關韻似絃柳意知春條漸綠
梅花向暖色偏妍螢窻燈火休虛夜鵬路風雲定有年
莫道一貧無長物青箱舊業有家傳

麥花

穗吐千枝亂苞傾一半斜風微生細浪雨重落輕花

河邊新柳

青青柳色拂河濱千縷長條日日新輕掠波紋浮水面
風來亂挽釣魚人

夫子初度哭之

颯颯西風起暮烟空嗟薄命怨蒼天當年此日君招客
今夕招君影不旋

春日吟

散步凭欄春意遲風搖嫩綠影參差辛夷開盡薔薇放
留得芳菲待我題

春懷

布簾深下怯春寒偶見飛花帶雨殘傳語東風莫吹盡
猶留幾片待人看

吳兆武

字汝繩中翰澹齋公之子生而韶令績學精勤早卒妻姚氏卽蕙綱閣之妹亦以苦節聞

題扇頭諸葛菜

武侯手植原非此種落人間浪得名繪向齊紈猶有致

采花能不共留情

吳昌猷

字闕圃父差強公家席全盛構別業白雲崑亭亭榭花木詩酒聲伎之奉者二十年迨闕

圃家中落非復秦川貴公子之舊矣絳帷油幕心織而筆耕猶師承其風範名噪菰林徐子羽先每為予亟稱之茲集將竣張子芸圃復為予誦其佳句因接得之吳興諸子所嘗鼎一臠可知全味已

郭外

過橋還過坂初日著衣温一夜添溪溜千山淨雪痕草
深微有路屋破不成村對此青青柳何人獨斷魂

春雨

小霽耽閒步青郊尚踏泥麥肥鬚見早豆冷甲舒進綠
酒初殘後黃鸝未語時春遊惆悵晚烟裡又如絲

江上逢陸質夫還吳

年深夢亦未頻通萬里來如兩世逢綠鬢塚拋荒磧外
白頭人出亂軍中吳門舊業桑陰在遼海還家藥技工
送不肯行留不住青山江上泣殘紅

客中憶姚駕侯入閩

郭北離歌咽暮鴻滿天黃葉舞秋風難辭雨雪千山外
却憶烟波一櫂中梨嶺深陰榕樹碧甌城荒鎖荔枝紅
相思最是蕭蕭夜酒醒鴉啼水驛空

贈徐羽先

謝絕塵緣好放歌非僧非俗戀烟蘿偶然句就都焚硯
隨意書成不換鵝蒼骨健于年少倍高名賢勝子孫多
山山水水常相左幾度臨風喚奈何

寄大人

秣馬寒郊雪滿林東風思入鯉庭深青山幾處歸藤杖
白髮經年上竹簪善飯不嗔蔬水養逃禪宜淡水雲心
燈前能否蠅頭字少向花間費苦吟

散兵

軍容想像舊苔痕故壘蕭條月易昏一自健兒鴉散後
至今殘破不成村

除夕言懷

不用爲文薦歲除隨天留棄寄枯魚窮愁料必都如我
忍向誰家送柳車

丁舟巘

字玉及彼雲之子也彼雲閱兒子詩喜示云吾兒學步時騰踔過乃翁經營頗慘淡穆然

成歌風嘗省其父于章江歸里甫踰年而卒年猶未逮三十也彼雲爲按其掃烟樓遺詩刊而序之曰吾兒生六歲卽能拈平上四聲十歲後能成短章今其存者皆予客豫章後所作風流藻麗在錢劉温李之間嗚呼合彼雲之詩與序觀之玉折蘭摧可傷者不獨詩矣彼雲豈譽兒者哉

三月十日蔣蕙畝過訪同周男玉分韻得春字

垂楊飛絮草如茵松徑陰陰到故人滿院鶯花消濁酒
一天烟雨洗殘春風流詩思生銀燭邂逅談鋒訝比隣
樹色山光真似畫儘堪連榻臥經旬

冬日洲行

梅花含蕊雪初晴一騎衝寒傍晚行落日沙前迴雁冷
孤雲天外挾風鳴沿江白水堅成渡斷岸黃蘆折有聲
遙憶青瑣當改歲敝裘霜夜不勝情

七夕

纔隔銀河路不迂今宵烏鵲復何須人間多少天涯路
得借橋邊一渡無

古梅

野竹懸崖水一涯虬枝古幹老烟霞山中竟日無人到
莫向春風浪著花

春望有感

柳暗花明燕語時春風極目向天涯堤邊多少相思樹

不獨垂楊管別離

姚士塗

字嵩肇楚雄守岷懷公之第三子生數歲即酷好書籍十歲許從父官漢南日誦唐人詩

岳陽洞庭之間多有題咏迨父致官歸距城邑數舍買郭北近地為園嘯歌其中病且亟猶徒几榻往焉日有詩家人或戒之曰舍是病轉劇盍聽吾以生平歿後詩多散佚友人江子在涓梓之瀼溪而屬戴子韓五江子少文刪定成帙日如舫齋詩存凡百有十首

秋懷

素月破寒烟對之不成寢昔照桃花肥今照菊花冷擲人歲月去四海志未騁斂翼待春風翱翔摩蒼冥今日有佳色披衣且再飲高歌燈和予舉杯神勸影悠悠一醉足興盡復就枕

采蓮曲

采蓮女兒新妝靚葉嶼花潭飛小艇雲中齊唱采蓮歌沙堤風吹鴛鴦醒碧浪輕翻蓮葉裙翠眉愁鎖蓮花粉桂棹齊搖玉腕酸蘭橈斜逗金楊靜困頓愁添千萬縷夕陽山外送微暑夫婿年年愛遠遊花下朝朝淚如雨思如藕絲長心似蓮心苦紅枝眠蛺蝶綠葉翻鸚鵡更憐雙蒂花低頭向人語噴香衣袖濕含色煙霞碧萬頃離懷千頃愁折花歸去蓮洲寂

不寐

不寐匡牀冷寒帷且放歌一天明月在半夜客愁多溪響連霄漢虫聲挂薜蘿夢來驚復醒試聽幾更過

過方晏閣

數日總無事思君過薛門草深微有徑樹靜渾如村留
飯瓜親摘呼樽詩共論小窻新雨好歸屐破苔痕

探晏閣病

臥病門常閉相過省送迎竹間多藥氣枕上有詩聲影
共梅花瘦神同夜月清應須憑靜攝莫遣俗塵生

上元日東晏閣

又是上元日春光到處增鳥銜梅落樹魚戲藻吹冰賦
性亦何拙除詩無所能唯君是知己相約夜看燈

落花

百舌叫春去東風吹樹斜可憐一夜雨零落幾枝花點
點凝芳逕飛飛過別家餘香猶滿苑新葉蔭怱紗

雨中言懷

山外雨初歇含愁溪上行少年成隱士末世賤書生虛
谷雲千疊空林磬一聲豁然塵事絕山水解幽情

喜孫雨田見過

日來溪路濕喜有故人過相對貧如此經時病柰何萬
山爭送雨雙澗悄生波細草庭前坐飛煙滿薜蘿

遊畫溪二首

七月初涼堪探勝諸峰招我破氤氳登山十丈倚巉石
長嘯一聲驚野雲無限夕陽杯裏盡幾條秋水樹頭聞
老翁爲述前朝事溪上煙波籠畫裙

烽火頻仍三十年空將風景說從前笙歌聲斷猿常嘯

音韻通雅卷之三
臺榭基存鹿穩眠
鴈信到梅偏傲雪
春情歸柳尚含煙
淒涼倒覺荒殘好
留得山川本色全

招同學戴子韓五蜀客潘子貽孫左子注我箴我

江子繡聞少文吳子天况過村家見籬菊分韻
竹塢陰深野老莊破籬菊綻一枝香根留秋色雪中白
花帶冷雲梅下黃苔點落英雞睡穩簾搖踈影雁聲長
桃源依郭客人到與客提壺問夕陽

到北園

爲問吾廬渡水來柴門依舊白雲隈半墻風積一秋葉
連日雨荒三逕苔濕翠雲籠亭子小新香石壓水仙開
從今不發江湖興多覓梅花繞澗栽

嘉平廿四日

一年懷抱總難舒今日春光到草廬掃石看花新釀酒
敲門催債舊賒書頻移歲月陰難惜幸有詩篇興未除
兄弟承歡堪永夜謝家蘭樹較何如

過陳大匡齋中看牡丹

踈踈楊柳覆雙門林外鶯啼香滿園春色一年三月好
花枝五代幾家存影移蛺蝶夢還處葉染芭蕉書破痕
嬌豔無情堦下立最堪憐是月黃昏

吳

熹

字志和予從姑之子也父弼士與婦翁張如

修焉志和風神秀朗語輒驚人試文屢見賞于主
者病數月而歿厘兩女如三携之吳門不半載相
繼殤因貽書與予待志和第二姪生立爲後
弼士爲之首肯其庶足慰發節于萬一乎

山居招隱詩

野老殷勤問我名我生書劍一無成才踈懶作詩詞客
世亂偏宜山水情松下不衫兼不履石頭為枕亦為枰
子規何事聲聲泣徒向人間叫不平

殷 邦 字正萬自號江海游鴻所著有旅居粵遊諸草

山中即事

風暖梅開早山深月到遲隔墻頻有約釀熟酒香時

還青亭和還字韻

為愛池邊鷗鷺閒客來煮茗坐亭間笑談鎮日渾忘倦
不問客從何處還

吳 席 字大夏予妹夫左賦之長子也總角精文選帖括之暇輒工推敲與兩弟肄業心遠亭互

相送難時取士額隘家貧視子衿登天然蜀中
簡謙居先生拔入黌舍士林傳為美談游泮甫半
載病瘵死親知莫不惜之吾甥詩予寓目頗多歿
後檢篋衍不可得吾兒仁樹少與諸外兄講求聲
律方甥乘時謂我日務滋于燈地酒闌時頗自誦
其詩琅琅盈耳今接之亦身有矣然不肯以屢筆
兒也

早梅和友人韻

玉骨翻噴雪到遲霜天初霽曉風吹為防春信來三徑
先冒寒威放一枝架上水仙纔著蕊墻邊萼綠尚含姿
知君歲歲催粧早不與隋堤柳鬪眉

姚鼎 拳 字勒先少警悟家貧彊志問學以文苑知名能率其從祖休那先生之教與吳甥大夏皆

以寒素受知于簡謙居先生同入黌序好吟咏凡
羈愁困悴無聊之感一寓諸詩于咏物尤工撻奇
扶巧屬對精妍皆出人牙慧嘗讀書院之迎江寺
時臬司韓一佟公駐節皖上其公子儼若名下士

也偶見勒先題壁上詩卽就寺訪之一見成僑舛
交後佟公開府虔州延入幕府將授以官因病謝
歸歸遂不起所著約齋遺稿散佚過半友人方子
有懷爲子稱美不置而戴子導及孫子皆公周子
式玉又廣爲蒐摭因采其
一二不使其湮沒無傳云

促織

孤鳴如絡繹節奏特分明虫羽憐微族瓜藤寄此生未
能驚嬾婦翻覺助秋聲誰念無衣者因君一動情

蟬

遯跡藏深葉聲聞忽滿林飲雖承白露人亦愛清音勞
鼓雙鳴翼全虛一片心年年秋樹底枵腹自長吟

和家叔陵陽署沼白蓮

香滿銀塘露正團珠光千點上雕闌雪兒歌醉三更酒

湘女波生六月寒色映蘆簾何處是神傳秋水許人看
幽姿清絕誰同調庾嶺梅花楚澤蘭

水中雁字詩十五首

有引

賦詩行樂止堪卽事拈題咏物難工况復多篇
拘韵秋空征雁旣借字以相形水底驚鴻益憑
虛而無據湖光天影合成一片琉璃霜頰秋毫
搖落千行蝌蚪若論風檣陣馬何足喻其雄奇
極之水弩杯蛇未可方其巧幻空明淡蕩從何
著力尋求恍惚虛玄到底空勞指示雲邊或來
或往江間時有時無紅蓼沙頭翻令魚書落色
黃蘆澤畔頻看兔筆生花弟兄聯結于江湖毛

羽翱翔乎豐滿何須才八斗偏能奮臂青雲未
讀書五車自爾文驚白帝望影下征人之淚聞
聲斷嫠婦之腸陣陣驚寒行行舞羽起孤忠于
雪窖沙漠傳書寄遐想于天涯衡陽斷影流民
集中澤肅肅于征歸妻迨泮水噤噤旭日秋懷
蘊結敢煩載筆以寫憂野水蒼茫肯許乘風而
破浪必具精工之筆乃不愧夫鴻譽高文似余
鈍拙之姿竟何有乎殘雲剩水研精竭慮思不
越乎尋常窮日終宵韵幸滿乎三十始悟少之
爲貴卽隻字片言畢竟揀金批玉翻悔多而無
取雖連篇累牘終成賸馥殘膏詩題久播于騷

壇和歌偶拈于氍席聊云備數敢曰誇多丙午

秋杪霜降日白苓小休氏漫識

澄澄秋水曉雲紅錦字飄來上下同應是江湖多鳥跡
翻疑文物讓鴻濛臨池翰墨誰操管學草龍蛇別樣工
何事霜天愁太劇向人無賴只書空

雲水迢迢隔幾重同羣異地恰相逢驚飛颭浪書偏誤
側陣凌波筆有鋒漫自飄零依四海分來文史足三冬
天南霜信多年斷影落衡陽第一峰

雲中嘒嘒影差池濃淡分明次第宜天本無心憑寫照
書從何處寄流離鷗盟未許窺文藻鴻序由來重羽儀
應有伊人堪問字行行都向大江滄

水天明淨似冰壺秋染霜毫一筆塗分布章程通鳥譯
全收江海入鴻圖影隨烏鵲歌三匝名讓鷓夷占五湖
幾度長征涇渭水聯翩還爲寫陰符

陣亂烟雲日已西波光飄渺字全迷沉霞影勒丹崖篆
封事書沾紫塞泥點水輕毫欺綵鷁乘風霜翮闢文犀
蓼花似火蘆如雪直把秋江作畫題

秋影涵空逐陣排六書繩墨未全乖事雖歷歷知誰指
聲喜噫噫本自啻行鎔亂時因浪起字磨滅處恨雲埋
江淮霜信無人問振翼臨流寫素懷

陣陣飛鳴去復回秋江尺素爲誰裁共驚澤國分符至
恰似波臣捧檄來鴻史何心沉漢水鸞文有意避秦灰

弋人底事煩矰繳消息冥冥莫浪猜

盈盈秋水喜來賓天外雲章認未真不是五湖招羽客
還應中澤咏流民圖成篆籀毫偏巧影落江峯句入神
自是鴻才多浪迹鳳池休道有絲綸

鷗鷺平分託水雲天涯辛苦敢離羣隨陽銜帛來南國
破陣臨池壓右軍漫道羽毛還異俗須知江漢本同文
瀟湘明月秋如洗奮翼爭書白練裙

水國烟雲動碧霄聯翩折簡向誰招當空一畫天心見
遼海千羣露布遙岐路斷行應賦別河梁疎影恰題橋
靈均憂思娥皇怨都向瀟湘筆底描

龍蛇飛動陣雲高羣闖鷹揚奮六韜遼海素書傳漢節

音賦 雁 卷六十二
洞庭秋影寫離騷
銜蘆原不須斑管
集蓼驚看落綵毫
漫向江天誇羽翼
人間文字本鴻毛

影搖蚪蚪落文河
長短連行字轉多
欲爲古今留翰墨
拚將毛羽託風波
書來白水休烹鯉
草就黃庭肯換鵝
底事勞勞飛不斷
空中消息定如何

寥寥烟水曉雲清
海國飛來不計程
行刻鴻臚應序爵
江橫塢影看題名
溪風析羽文旌動
秋翰生花綵筆輕
書遍長空猶未了
天涯何事太關情

兄弟詩篇比脊令
江湖原不畏飄零
龍文躍影休競綵
鳥篆成章本象形
却寫秋思沉楚澤
應書清怨弔湘靈
圖分禹貢居彭蠡
字字看來山海經

秋江晴浪影深深
羨爾鴻文自古今
霄漢高飛憐羽翼
風霜奇字任浮沉
憑空寫出青天意
到處書傳白水心
莫道聲名流落久
會看雲路有知音

白雁

嘹唳紛飛素羽輕
獨披霜雪向南征
想應遠去烏孫塞
疑是生來白帝城
烟水蘆花何處影
瀟湘明月只聞聲
當空摩出中郎字
未必遺書屬子卿

枯樹二首

十載芳華事已休
霜皮蒼幹冷荒丘
藤蘿百尺空相附
苔蘚多時色尚留
不惜疎陰微蔽日
幸無落葉免悲秋
園林蕭瑟西風晚
幾點寒鴉在上頭

古木凋殘歲月深
疎枝猶自繞鳴禽
飄零剩有風霜骨
消瘦唯餘朽蠹心
槁矣何堪勞剪伐
蕭然原不礙山林
春來莫對鶯花泣
爨下焦桐本是琴

和五松侯明府鏡中牡丹

雕砌銀槃一樣紅
露華掩映特玲瓏
香生月窟客人到
春在壺天不易逢
玉宇光涵花滿縣
水輪影綴錦爲宮
相看主客皆圖畫
北海清尊未許空

燕子四首

合向烏衣老結隣
高飛底事遠銜春
都從座上憎泥落
誰對梁間愛語新
異地獨憐容借廡
棲身何必定依人
一年一度梨花雨
牖戶綢繆亦苦辛

爲爾珠簾下不成
香泥零落曉窓晴
影隨掠水蜻蜓小
翅比穿花蛺蝶輕
樓上清宵空有夢
掌中妙舞舊知名
他時巢向春宮裏
莫負窮簷飲啄情

隨處門庭有路通
飛飛輕漾任西東
泥從補後占陰雨
雛喜多時驗歲豐
小翼綠沾芳草色
舞筵紅蹴落花風
春來無限空閨恨
都在雕梁細語中

銜得春光到草廬
藥闌雙立午晴餘
驚人飛去常迎面
帶雨歸來每濕書
自是羽毛堪野宿
翻從棟宇作巢居
避風豈必端門好
應笑鷓鴣智不如

送別佟儼若之豫章

河橋高柳拂行旌
海口江潮已漸平
千里客裝容易束

十年官橐本來輕丈夫雖別原無淚我輩交游不爲名
惟有隨風心一片送君直到豫章城

寄懷周梅墅先生洲居

簾戶蕭條靜掩關經年衰髯想尤斑寒憑燈火支清夜
晴喜江天出遠山尊酒貧猶貪客過才名老不放人閒
愁深積雨知多少病裏詩情可耐刪

張

竝

字禹仲孝廉蔚菴公之仲子也性英敏絕倫落落有大志父歿年纔舞象母方夫人治家嚴竝事之純孝躬操家秉見事明決兄弟四人獨不辭勞瘁以故內外雍肅視孝廉公存日有加焉暇則下帷別墅填唱箎和引泉種竹盃石蒔花以奉板輿舉業而外博覽墳素工詩古文詞游太學籍籍有聲與人交不侵然諾詩壇酒社雖復高談雄辨而溫和之氣盎然眉宇凡朋酒獻酬莫不樂有張仲子云年甫三十卒卒之前一夕自言爲祖西禪師後身祖西者孝廉公所敬禮數十年之戒

僧也三生石上舊精魂古人豈欺我哉詩多闕音亮節主于蒼渾然不喜存稿輒多散佚其弟仲華從扇頭壁間搽得數十首予爲錄而存之寸瓣片甲亦可知其風尚矣

新月

春色已云暮春月今始看年年月如此今年看獨難
霽雨六十日日埋雲端一朝雲霧開花影移欄干皎皎
朝霜潔沉沉秋水寒蛾眉向人展對月眉休攢天地不
終晦豈憺青春殘

聞雁

夜寂忽聞雁不似秋來聲秋來春歸太時序良足驚誰
不思故鄉爾胡獨哀鳴鳴豈分哀樂聞者測其情憺哉
凌雲翮僕僕終平生

戴蜀客以松石見贈詩以答之

青松百尺參雲漢黛色霜皮鐵爲幹白石玲瓏質更奇
疊嶂層巒飽人玩古人癖愛若奇珍或稱石丈或龍鱗
更喜千年不改色以之論交情倍真交情此日無管鮑
我與戴子敦古道蜀遊貽我松與石示我同心投我好
蒼翠欲滴石上浮恍如松下風颼颼又如畫工得意筆
筆墨精巧真銀鈎山川變幻胡至此松石之奇他莫比
靜置几上作曠觀錦江雲樹留眼底

秋日山中恭讀 先大人懷克賢上人并悼祖西

禪師詩不禁痛哭賦示兩弟

憶管趨庭嘗稱述古塘深處有幽築軍持說法木樨香

帶月鐘聲來雪谷遠公梵行本精嚴蒲團趺坐儼天竺
蒼苔封處碧流斜空翠倒結青茅屋菴名三慧振天葩
人疑羣玉山頭宿借師行修爲皈依誰是青原稱高足
烽烟起後走江南靈谷長松高突兀愛客不肯渡虎溪
長嘯何人同躑躅戶外梅花滿珠林挑燈咏雪慰幽獨

先君嘗與祖公靈谷看梅

鹿苑花雨不飛來吁嗟宗風孰堪續相從

掃逕過碧峰書床夜靜茶初熟

克賢上人住碧峰先君讀書于此

青氈

白氈有餘悲高懷猶寄管林麓剝竿倒却幾何年菁園
涕淚漬修竹揮毫念舊發長歌故人會面不再卜當時
龍象何崔嵬今朝相見倍局促藤蕪依舊蝶夢非雖有
父書不忍讀猶記管年吟咏時呼我夜坐燒銀燭月照

屋梁天已秋嘆息別離如在目我今追維廿年前荒烟
無地尋曲盡幾回全盛幾蕭條不禁窮途發痛哭悵望
吞聲泣數行簾捲寒雲秋山綠天高日薄更凄其野樹
悲風吹落木

冬夜兀坐竹映月窻命酒獨賞欣然成詩

謝惠愛月無此君子歎癖好不在影滿窻明月竹影搖
個中佳趣誰能領吁嗟乎窻月竹影何地無之焉能兀
兀坐糜歲時河漢色娟娟琅玕響瑟瑟感茲搖落餘節
節當窻出當窻搖曳去復來焚香飽翫且銜杯杯中有
酒須盡醉眼前美景懷爲開陶窻面北納風好我窻面
東邀月早但使三冬常如此夕閒羲皇以上之人應絕

倒

夜坐

才抽動違時自憐還自疑孤燈愁影暗長夜喜眠遲歌
缺唾壺口尊消博浪椎打窻嫌落葉不住朔風吹

入山

茅屋白雲遮峰環路轉賒水聲春雪化池影野梅斜喔
喔鷄喧午青青麥放芽誰云兵甲滿絕不礙山家

庭前老少年

秋色已垂暮繁華特地開豈同脂粉艷未許蝶蜂來籬
畔驕黃菊窻前點碧苔青春人不愛合傍老人栽

和東田吳夫子夜雨見懷之作

珍重雲箋寄高吟夜雨詩庭花紅已潤簷柳綠初垂舊
榻留晴閣新編想絳帷東田春課畢早訂入城期

會聖品納涼

品一名
隱賢

舊說隱賢處今當避暑時老僧閒入定遊客倦吟詩石
缺雲來補山深日到遲飄然有秋意直欲覓天池

栽菊

何必陶公宅東籬亦自開秋英他日勝春圃及時栽雨
後分根出鄰家乞種來意中香滿袖采采佐銜杯

方禾客以詩期遊披雪洞依韵答之

鐵騎橫郊不敢遊黃花蕭索負三秋松筠笑我門常鎖
山水邀人願未酬霜重楓應飛落葉雨餘溪定漲清流

與君試訂閒吟處載酒何妨信宿留

姚佩若庠若左注我箴我過飲秋樹堂看紅葉

霜催紫柏變丹楓點綴青山色盡紅瀑引客筇登石頂
秋隨峰影落杯中清泉能助茶香淡兼味還因市遠窮
爲約分題須剪燭林梢同看月朦朧

過友人故居

黃昏漠漠暮雲飛一過烏衣淚一揮苔跡尚餘求仲屐
書聲長歇董生幃棄襦有志人先去作賦招魂事總非
可惜手栽堦下竹空留蒼翠拂荆扉

酬姚庠若惠筆

彩毫携自上林回爲我輕將篋笥開錦繡忽從懷內擲

蓬蒿投向徑中來
右軍虛費臨池墨
司馬空慚作賦才
珍重芸窻花案上
捲簾香染一株梅

宿方子將四松山莊送伯兄之任崇明學博限韵

四章

冉冉春風逐澗阿
柴關初啟客同過
桺飛驛路催行色
雁落橫塘起別歌
千里壯遊開錦纜
一杯心事藉雲蘿
明知此後多離別
聚首其如牖下何

燈火連床陸氏阿
登臨何處不同過
幾回欲赴看松約
五夜翻增折桺歌
薄宦喜君膺綬冕
小山容我卧烟蘿
鵝原無限消魂處
鶴髮堂前更若何

郭外青山有卷阿
春來常奉板輿過
攤書略慰和丸志

捧檄應增陟岵歌
洱海瞻雲翻碧浪
清宵看月上藤蘿
知君不盡鄉關夢
離別人間可奈何

冰衙可當碩人阿
况復三吳次第過
夾岍花陰童貰酒
平沙鷗煖客徵歌
黃梅潮信連桃葉
帶草官閒接女蘿
屈指秋風知不遠
別時如此聚如何

春日姚天池招飲月臺

層臺面面接峰巒
醉裏春風不覺寒
解舞隔牆楊桺弱
初飄別苑杏花殘
晴雲輕捲開簾幙
乳燕低飛貼畫欄
贏得勞勞尋勝客
繁華都向座中看

任戴仁招飲西園同方譽子便過慈雲菴

綺席名園歇酒籌
笑歌濃處梵音幽
誰從世外尋佳趣

別有閒情狎野鷗佛火春風高座穩梅花溪水一灣流
歸途漫道斜陽迤深樹村烟望裏收

病中聞子規

緘關虛却艷陽天曉怯衣單未脫綿將落花從油幙護
欲歸春被鳥聲傳乍驚旅舍難成夢喚起深閨也廢眠
豈獨閒居憔悴者坐拋書帙恨啼鶯

聞鶯

戶外流雲壓樹生病中那復問陰晴幾時春到鶯先覺
百轉聲中意不平帶露肯緘垂柳舌飛紅應重落花情
由來俗耳堪鍼砭誰解雙柑載酒行

夜間作

夜色沉沉冷碧紗帷燈影射薄衾斜多情客夢如飛雨
無樣春愁共落花病卧圖書堆几席詩成池草隔天涯
愁腸不耐夏聲急漏促東風起宿鴉

宮怨四首

隔苑西風動管絃欲從銀漢妬嬋娟承恩粉黛知誰好
帶露芙蓉獨自妍夜漏有聲催月落寒燈無語照人眠
六宮姊妹多寥落若箇傷心莫浪傳

寂寞欄干對晚春朝來女伴過東隣爲憐同病看愁黛
縱托知音亦效顰薄命自甘清晝永宮粧競說逐時新
池邊試把朱顏照可是昭陽第一人

楊柳絲絲漾碧空年年花事負東風御溝水長沉新綠

粧閣春深鎖落紅別苑閒過看闌草空堦獨咏送歸鴻
凭欄多少閒情緒消盡朝雲暮雨中

長門何處覓相如吟得新詞手自書紅燭籠紗愁不剪
香塵拂硯懶休除月中歌舞成烏有夢裏思波托子虛
筆墨難將心事遣教人望斷七香車

口占答方子將

紅綃初著粉初施不似當年淡掃時寄語同心休問訊
笑儂臨鏡學趨時

並頭蘭

芙蓉本自擅風流誰解蘭花亦並頭恰是同心堪作佩
清芳應只傍妝樓

龍周孔斐

字漢舒號筠軒又稱東湖順治辛卯冒劉
姓補邑弟子員所著有偶然草五松遊草

尋菊伯純齋頭用王子兼原韻

江蜀藻輯

寒花遶砌最清幽攜手閒過即勝遊錦句漫從知已索
綠尊還與細君謀久拚鎮日籬邊醉盡掃經年客裏愁
自是陶家風味好殷勤不負碧雲秋

周肯堂

字爾構一字希白號安貧梅山之從
子也著有蘭皋雜咏醉吟集宣愁詩

燕子

小步荒郊外參差燕子飛香泥霑翠袖紅雨滴烏衣欲
傍誰家去曾依故主非春巢應未穩零落舊柴扉

聞雁次陳卧子先生韻

風靜夜潮平沙汀新雁鳴雲邊天外字腸斷月中聲漫

度烏孫塞應傷白帝城此時秋更慘斟酌向南征

自吳開寒風初發

絲尊數與時

寒芬發幽是青幽蘇平間豈暇親茲輪向曼笄映日索

尋藻出絲齋夏用王千濂風韻怡是同心堪作佩

周几妻

我蘇邑庚子員祖善甫剛然草正蘇草字鄭拾蘇蘇神又爾東臨則命辛明冒濛

龍眠風雅卷六十三目錄

木厓潘 江蜀藻輯

富平趙 述述古 叅

門人高 萃旦兮

寓公

王 宣 二十一首

鮑仲熊 二十九首

汪之順 八首

汪宗魯 二首

羽士

吳道隆 八首

衲子

釋淨倫 一首

釋洪恩 十四首

釋德清 六首

釋汰鎧 一首

釋本智 五首

釋佛光 二首

釋行岡 十首

釋大巖 七首

釋元亮 一首

釋戒顯 一首

釋慧琛 六首

釋道盛 十一首

釋如清 二十八首

釋海珎 九首

釋本正 五首

釋音可 三首

龍眠風雅卷六十三

寓公

木匡潘 江蜀藻輯

王宣

字化卿號虛舟世居江右金谿之潘方里父

日隨父之縱陽客有屬賦遊女詩者輒應聲曰江
邊客子思悠悠江上女兒花滿頭三三兩兩踏歌
去零落碧雲生暮愁遂以詩得各弱冠反金谿補
郡諸生復來桐益覃力稽古博極羣書桐人土翁
然嚮風友事者葉文莊燦方中丞大任何文端如
寵劉評事胤昌左忠毅光斗齊山人鼎名方司農
大鉉林文學胤瀘方中丞孔紹謝處士逸李山人
遇芳吳水部道新也師事者周司理岐方處士文
方簡詩以智孫監軍臨吳奉化道疑方處士豫立
也十三經皆有疏解尤邃易學著風姬易邈與方
中丞周易時論互相發明又有
龍馬言物理所金剛解諸書

同方玉成之元城別弟寅寬

音耶屋牙卷之三
風吹楊柳花高舉復低傾丈夫學書劍白首一無成退
耕苦無土進謁非所營吾友東南美烏奕領專城永惟
谷風誚念此生平盟烟花首前路輜輶將我行歲月不
可問山川非一程牽衣別骨肉亦復難爲情

嶧山

仙人收羣羊萬羣如一隻仙去羊不隨化爲此山石又
云太古荒此石在沙磧有人揮赭鞭鞭之血流赤驅將
置海東棄此曰鄒嶧平疇曠蕩中突爾紛狼藉簸地走
員方到天森劍戟最屢相撐撐豁豁開罅隙風生萬竅
怒雨注奔雷砮精靈綴岩阿隱躍見丹碧豐碑勒秦政
孤桐標禹益吾將老一拳舍此更安適

涿州九日

九日北庭菊香如南國秋啜英一以汎徒倚城東樓正
爾塞鴻去茫茫萬里愁

中秋自五老峰下月菴翫月作

天上坐秋色毛骨亦蒼翠歸來卧空山衣薄雲猶漬白
榆歷歷青女寒高歌擊節碎琅玕古今令節人同月誰
向匡廬絕頂看

咏史

一作劉公未沫詩

相如罷車騎高卧秋風時門掩茂陵草夢遶甘泉枝寂
寞竟何事歲月忽已馳賴有長門賦能克取酒資

過田家

田家隔朝市抱犢良優游到門見垂柳屋角飛鳴鳩前
溪漲新雨良耜刺平疇余亦躬耕者因之懷故丘

汪未央携酒見過其人東魯高士極慎許可

紫馬玉盤陀黃流金叵羅感時深謝客愛我獨相過共
作蘓門嘯羞爲燕市歌向來知己少此日一人多

懷方嘉州潛夫計此日已抵任矣一作劉公未沫詩

之子三刃夢嘉州萬里行舟過神女峽境入錦官城杜
宇千林合峨眉片月明此時端手板從事恰相迎

贈楊古度

楊生江上抱殘經落落虛疑處士星三月鶯花歸未得
半天風雨酒初醒有時得句驚髯白何處逢人不眼青

舊業關西頻入夢肯教虛卧子雲亭

酬葉潛之夜飲兼訂斐園之約

石城秋色移舟遠山郭寒更對酒遲多病尚餘司馬渴
下關初傍董生帷楮裁玉葉文心巧花綉春叢筆夢奇
見說斐園堪嘯咏何妨乘興一臨窺

飲方玉成園亭

花前十日三相見習習香風步履輕馬笠故人悲半在
雀羅門客見交情檐飛乳燕過新社草綠橫塘對晚晴
萬事共君頭白裏獨餘尊酒是生平

豫章藩署送朱山人還姑蘓

一尊風雨暮江頭遙識仙家傍十洲飛鳥自于天上去

著書不爲世間留
劍分南斗雙龍夜
練合吳門白馬秋
到得碑陰逢若士
可能聳臂復來遊

集劉未沫宅賞桂花

又是秋陰恰半時
桂香盈座酒盈卮
虛疑白晝烟籠樹
忽覩青天月滿枝
投轄孟公能好客
如泥周澤是吾師
衰年日日憂羣盜
醉殺還勝死亂離

曹元甫携具謝樓同方密之賦

樓頭美酒如黃金
樓外高天覆綠岑
蛤吠稻梁千畝合
鷗翻雲雨一溪陰
桓劉草草興亾事
謝李寥寥正始音
俛仰只今吾輩在
相逢惟有淺深斟

兒子振初便道省覲

天涯正爾憐形影
拜起俄驚汝到來
衣上雪霜千里色
手中書信隔年裁
恒饑弟妹容應改
垂老而翁病轉催
好耐心情修藥物
漫言歸去使予哀

初春送周農父赴苟侍御賓席

亂離何處控征鞍
獻歲椒盤且共歡
羣盜未隨春氣解
巖城初閉日光寒
時來驄使相迎好
老去驪歌欲賦難
想到冶亭愁不寐
妖星特向劍頭看

周公廟

周公遺廟魯城東
想像靈光識故宮
碧瓦金題人不見
離離禾黍動秋風

山莊

背郭松陰十里斜到來無處不烟霞門前流水溪頭瀑
幾樹新開杏子花

答客

劍隱芙蓉卧草茨十年心事藥爐知何人錯認田光在
不似先生少壯時

福州飛鸞嶺口號

草逕穿雲十二盤若為無事度飛鸞愁來忽聽鷓鴣語

山鳥亦知行路難

鮑仲熊字虎子廬江人自言常州武進人流寓桐城為僧不斷酒肉好大言酒後狂歌聲振林木方宮詹坦菴姚樞部戊生極賞識之相與唱和甚確無何又棄去軍持漉囊衣山人巾服遊放山水間其跣躄不羈皆此類也所著虎子我詩亂後無有存者子門人王子浩生偶得之石溪村塾中子

手錄副本今為分別存之姚榮靖非僧也錢虞山不以冠功臣虎子僧也予不以附開士議者謂錢為行公知已則謂予為虎子知已亦奚不可

小梅舟次

岼山橫暮雨孤艇意俱遲幾日避高嶺斷雲補破堤人
家楊柳近湖水稻梁低長歌復長嘯乘風知幾時

官凝之園亭招飲

園亭非不有愛此城中山靜聽萬家語忙偷半日間偶
憐花倚檻為放月開關即此便安樂何須更駐顏

泊蕪湖同姚純甫

蕪陰風月夜半接晚烟中平白浪無際遠蒼知有竄鄉
心隨水泊家計與舟同不盡江天意對之如畫空

山居

清供隨時有常如客到門掃花煎竹葉破石煮雲根往
者明時去終焉古道存敢言耽寂寞無鬼不須論

月夜卽事

明月照人近良宵只自看徘徊不肯寐孤潔轉相安樹
影常疑鬼天高豈讓山清平纔一曲香露著衣寒

同趙叔厚遊水西

聞鐘知遠意破俗偕雲山竹杖溪邊寺松門日下關野
僧開冷面熟鳥認生顏梅子何時落夷然共往還

盛蓮生爽園

朝來有爽氣日涉趣爲園一部修花史三間拜石軒平

臺儲月殿亂竹奏雲門城市下方近終年未覺喧

方坦菴龍井二首

龍井疑乎非世間髯翁偷得不曾閒栽花就石央雲灌
補罅藏舟付水關客至有言頻擊磬日來無事但看山
陰晴予奪皆相適更覓何方可駐顏

置身幽壑已忘還應是天緣非等閒文字何曾烟火氣
衣冠全染薜蘿斑飛橋棧月空懸壁接屋連溪湊作山
形影此中多少日寧容一刻不追攀

寶山

山老不如人耐秋黃葉漸脫紅顏愁有聲盡是落花韵
無計可爲歸燕留香月入林清見骨寒雲愛日懶成樓

三春每訂三秋去及至三秋依舊休

遊敬亭山

春纔十日入山行新綠枯枝相次生年煖困人依樹息
餘香出閣伏龍腥野花無怨自開落怪石當機不送迎
兩度此中窮眼力敬亭十載笑虛名

山居詩六首

自許愚癡不願行寧終清苦慰空生完全舊我還他去
博得新閒遠物爭洗菜臨池猜面色折松下爨息虛聲
橫衝絕頂誰相識靜夜山風嘯月明

這裏雖忙無世情山靈信美喻殷勤歸猿攀碎林間月
去鳥飛開石上雲塵不到門心路絕聲垂過枕覺場分

風霜保得孤根在不受些兒亂斧斤

芭蕉覆屋鬼藏頭枕熟黃梁夢未收一葉人情風上下
半窻天色日輪流僧歸常帶溪聲入雲去不貪山影浮
怪底鴻濛傳異事隨他寒熱報春秋

半壁烟綃分遠林日將短褐據蒼岑風期遇竹時爲籟
山不厭雲常作陰脉望未成先滿字奚囊無底謝長吟
閒來贏得多餘事梁月穿花一曲琴

菴前樹葉半秋黃物自榮枯人自忙曉露霑衣千戶月
暮雲歸壑一溪霜只言紙上功名薄誰信山中節令長
更憶萬峰深處好縱開猿鳥脫行藏

隻履繁霜星火焚拳頭紫翠搏薌芸三生石上閒風月

一片山中懶雨雲花托流泉香出世木依衆草得超羣
怪來相笑猩猩酒我自無爲不敢聞

春日遊龍眠古渡三首

閒溪不作聲暗暗吞今古往來渡頭人不知溪是主
耳熱李龍眠眼紅鮑虎子風流五百年不爲風流死
拄杖帶香泥應是春溪處遊人不肯歸盡被春溪誤

水陽河

一日只行六十里水陽河下船如齒月明不見月中人
一枕相思隨夢起

自祭四首

生不遇時死不傳且將杯酒祭生前予生在世成何事

吾亦難言敢問天

三十一年骨半枯敢言痛哭舊頭顱有家咫尺如千里
只爲顛狂錯讀書

冷面紅心自作人風霜雨露樂天行任他笑破狐狸口
莫把骷髏對鬼吟

囊有新詩可療貧肯攜面目與人憎年來多少英雄淚
盡向風花雪月傾

別餘溪

山似多情人似雲忽相聚也忽離羣雲情似與人情愜
常作山靈露布文

雨竹贈小玉校書

音耶風牙卷之三
星星夜雨度修篁乘醉西風小玉狂刀尺輕寒敲不醒
美人和夢到瀟湘

山中

午烟到枕從來睡小犬窺爐不管寒惟有青山相信得
今年還是舊年看

和吳師時

滿面紅塵杯酒洗箇中涇渭許誰分獨憐壯士無顏色
意氣紛紛化作雲

汪之順

字平子一字禹行懷寧人家於龍山與桐人
士唱酬最密性溫雅蘊藉跌宕風流每酒後
振竿揆瑟度曲高歌使人忘倦為詩蕭閒淡遠有
孟襄陽韋蕪州之風同里若范小范又蠡汪瑤若
宗周任克家塾程子先從大錢枚一選蔣素書瑤
芝皆一時詞壇之神領也平子晚年自署梅湖老

人所著詩文甚富瑤若貽我十數篇卓爾不羣竊
光拙集于于流寓諸公必僑居最久者方敢借重
若雪泥鴻爪偶留筇迹則未易更僕也錄平子之
詩因念我叵友吳端儀王仲夷吳退之阮子靜諸
子不禁

惘然

客來

烈風蕩湖泊春氣未和柔物色慘以悴鳥鳴聲啾啾夙
昔負大志緬邈思壯遊乘傳過上邑擊汰歌中流結交
天下士輪寫千載憂此志竟沉淪徒然守樊丘黃馘垂
素髮鶉衣披鹿裘別離鄉里笑迂拙妻孥羞半菽日難
飽遑論終歲謀今晨有客來時事談不休弔我老失路
功名等浮漚 聖朝復舊制明經卒見收從容待次薦
爵祿沾爾儔胡為輕棄擲日暮空夷猶予聞三嘆息寒

青耳居牙卷之三
默還低頭甚感客意厚甚愧客念周士各有微尚茲焉
非所求平生幽獨意不爲升斗愁千鈞弩牙折麕鼠寧
足酬斷木被丹黃何如壑與溝勸子且飲酒命婦開新
簞客太予亦卧到門惟沙鷗

寄瑤若兼柬不害

又忽一年過春來憶所爲看花何處醉咏史幾篇詩歲
月閒難得山林老莫疑孫郎煩寄語新柳倍相思

山行

不厭山行苦春溪聽子規亂蛩衰草路一輛夕陽時野
碓春溪緩繩橋過澗危久晴知欲雨撲面有游絲

甘露寺夜坐

門閉孤燈夜風生萬壑秋寒虫溪共語古佛客同愁瓜
菜分僧供衾裯爲病留疎鐘人定後殘月上山頭

谿邊

谿邊深靚裏古木響流沙石髮披山鬼松鱗蟠怪蛇渾
淪元晝夜清淨自魚蝦側听多幽意茸茸瞿麥花

得丁漢公孫子毅家園長寄詩

仲夏竹中飲秋風又早吹蒹葭千里夢鴻雁一羣思古
調向誰操溪心許獨知開槭蕪老病吾道果如斯

飲隣家

春飲隣家早見招不煩爭席坐逍遙高粱魚子滑流筋
蠟酒鵝兒黃滿瓢真率盡人忘主客談諧終日是漁樵

歸來膽勇殊堪羨安步徐過窄板橋

同磨山漢公不害集園長荷亭分侵字

短檻疎簾夏日陰過墻新笋綠沉沉尊前松響茶聲亂
衣上荷香雨氣侵半夜狂談人縱酒一燈清照樹橫參
中原我輩看搖落獨有千秋只此心

汪宗魯

字子兒號竹巖懷寧人侍御時菴公之仲子順治壬辰進士初宰浙之縉雲陞山西沁州知州奏最擢工部主事歷宦二十餘年所至皆有善狀與兄宗周家于邑之戴冲以刑部郎中卒于京邸瑤若出其漳源近草見貽為登其一以存崖略

晉祠登望川亭

夾道飛泉吼玉龍憑虛霽色想桐封珠簾欲濺梁園雪
書閣疑通長樂鐘古洞老蛟翻怒舞靈旗水母獨春容

片時少借晴瀾浴幽澗臨流響夕蛩

謁文中子祠

學就堪為帝者師衡門偃仰託河湄至今遊笈銅川下
遙憶先生講肄時

羽士

吳道隆

字易水邑之麻溪人九歲出家于郭西太霞宮從師祖盛東陽遊東陽為司徒公族子嘗携之入見司徒公目而異之曰此他日瑤臺貝闕中人也崇禎末秦寇躡吾桐太霞宮圮會靖南黃將軍援桐桐人德焉謀構祠生祀之僉謂非吳真人不足潔明禋答父老報功之意因徙而居焉易水有道術驅魁祈雨屢著奇驗好畜書凡真經秘籙金簡玉繩之篇以及儒墳梵筴靡不裝潢精好手自標記玉軸牙籤克初篋衍嘗撫而嘆曰子孫賢守吾書不賢則粥等敗楮不如焚之徒孫輩執不可乃止歿後斗室扇鏞封識有年忽一日火自內出併其冠劍鐘磬流鈴羽衣亦盡于一炬中矣

前即屈雅卷之三
豈神物不久留人間上帝遣六丁雷電追取耶吾
邑黃冠能詩者前代頗不乏人亂後皆莫可考易
水有虫吟一函自序而錄之關中李子祀瞻遊吾
桐假館黃祠見其詩頗加獎詡而序之以爲唐吳
筠之後身云卒年八十有一今其孫陳廷
謨亦能詩豈獨陰符寶訣流傳後人哉

贈爽園上人

地現仙人掌林藏佛子家誦經聞石磬聽泐悟曇花塔
聚鳥巢穩城過日影斜空談無我相高致託烟霞

謁黃公二首

虎山將軍

羽檄轅門至將軍不願生雷霆初下擊風雨但聞聲死
賊退三舍生靈全一城至今遺老祭俎豆萬年情援桐
英雄經百戰忠勇實無雙浩氣今猶壯丹心死不降虞
淵爭墮日楚些哭長江薄暮烏啼急陰雲繞泐幢殉難

黃祠前雙柏

我愛古蒼姿風霜性不移恥爭春色艷直到歲寒知西
指禪師意高連丞相祠老夫多冷落對此覺偏宜祠與史相

祠禪度
菴隣近

招鶴

野性難羈絡高天何處飛只貪雲不礙未報客初歸刷
羽防秋冷餐芝耐曉饑好來緱嶺上笙響振仙衣

寄友人山居

西來爽氣近何如君在其中好著書已識天關多虎豹
肯教霞渚遜樵漁坐沉紅燭茶聲細吟倦蒼梧鳥夢疎
爲語山靈休逐客秋溪來訪薜蘿居

遊齊山

江南風力老兼葭北陟齊山望九華人共白雲棲石屋
歌聞紅葉隔漁家牧之原上餘秋草武穆亭前亂暮鴉
憑弔不堪秋思起疎林遙見月痕斜

寄古槐上人

萬緣俱已託虛空秉燭風吹調自同手植一槐佛子種
身依五柳梵王宮通宵坐悟蒲團上竟日行吟竹徑中
飲水尋源誰得解好將四大任西東

衲子

以下係諸方高僧或卓錫
桐邑各刹或瓢笠偶憩者

釋淨倫

字大巍雲南昆明人
生宣德丁未以正統庚申出家禮本府太華無極泰和上受禪學戊辰徧歷諸方天順癸未叅古庭和上于浮山住持最久有竹室集與天童懷讓同時並闡宗風錢虞

山選其詩入列朝詩集虞山謂大巍得法于浮山古庭堅公今山足斧公輯浮山志但以爲叅古庭和上乃詩篇中載七絕一首直以爲古庭學公按虞山稱學公以洪武三年居光福浮山志稱古庭以宣德二年見知于侍御張公至弘治六年癸丑坐化年歲相距懸絕意大巍得法之師其爲學公堅公均未可臆測也虞山錄學公詩三首頗有可采浮山七絕苦不甚佳寧闕疑以俟後之君子

松陰小憩

風來石上松僧坐松下石洗鉢將煮茶溪流漾晴碧

釋洪恩

字雪浪金陵黃氏子年十二出家長于寺錢

內外典利如奔馬不勞問辨而堂奧歷然以無師習得大辨才慈大師北遊遂以弘法爲已任日據華座講演諸經盡掃訓故單提本文拈示言外之旨恒教學人以理觀爲入法之門說法三十年如摩尼圓照一雨普沾賢首一宗爲得法弟得繼席者以百計秉汰而轉教者以千計南北法席之盛近代所未有也又云公自言不讀萬卷書不知佛法博綜外典旁及唐詩晉字惟燈畫被日夜不置

音耳 丹黃紛披几案盡黑萬曆中江南開士多博通詩翰者亦公與愨大師爲導師也虞山之言如此其推崇者至矣公嘗開講華嚴有浮山長歌志稱公愛連雲峽如雪浪翻空因以雪浪名之卽用此署別號虞山謂公晚年開接待院于吳之望亭以勞苦示寂歸葬于雪浪山又似乎雪浪非連雲公之別號亦不因連雲得名也然觀虞山所錄如夜泊慈姥磯望江南諸山及廬江冶父山居諸作則公之開講華嚴無疑矣

遊浮渡長歌

紫霞關外逢吳季滿目山湖共相計福城東畔澹居來
頓入聖巖歡喜地宰邑祠堂不用尋白雲紅樹亦森森
蒸嘗俎豆惟衰草蔽蒂甘棠勿剪陰遠祖因碁曾說汝
坐隱崑中留卵塔想像當時舌上鋒勅敵歐陽亦解甲
太古初開此畫廊虛空爲牖石爲梁雲興霞蔚風司閉

蘿薜垂簷覆篠篁忽然步出蜿蜒竇千尺蒼龍亦何瘡
遍身鱗甲點莓苔萬里風烟若馳驟凝眸左盼仙人橋
只合凌虛上紫霄奈何珠宮秘叢棘致令鸞鶴杳難招
一派河山橫九帶假說三車在門外鏡臺交涉影重重
草木騰暉俱法界當年法雨潤閭浮今日蒿里山鬼愁
須知極樂七行樹只是西陵松與楸臨岐側入滄溟鳥
拾得交梨並火棗比隣羅漢石爲僧鎮日談玄似娛老
連雲峽映遶雲梯雲開雲歛行欲迷煉藥臺邊聊爾過
圓通祇在小橋西太華峰頭飄一瓣梅恒利國濟悲願
非關蜃氣結樓臺準的循聲現宮殿紫竹林中鸚鵡飛
躋攀磴道陟崔巍松間忽賜金莖露望入天池下翠微

歸去仍經三曲洞三十六崑口裏誦織毫不動往來遊
始知無用成真用暫息重登補衲臺半壁青蓮雲外開
夾道垂藤間修竹箇中能有幾人來路寢張筵邀夜月
茗椀爐烟綠小結橋樹梅檀信手拈那辨淄澠黑白葉
霏微露氣冷侵人一語能回滿坐春直下盡拋人我相
何妨雅俗事兼陳道本並行不相悖鹹淡甘辛各五味
性相禪宗縱爾分要在伊人自心會病若痊時藥亦忘
五更枕上再思量直木先伐甘井竭好處抽身羨子房
世出世間元大夢傀儡登場須撮弄驀然平地起風波
覺後還自知身痛

夜泊慈姥磯登絕頂坐月

踪跡元蓬慕天涯自往廻秋風隨去權夜色共登臺石
面潮初落江頭月正來最高思欲卧清磬一聲催

出劉菴晚步望江南諸山有感寄同社諸友

荒原無歷覽直視但丘陵斥鷃飛盈步波臣水僅升莽
烟孤晚岫疎樹出寒燈日斷鍾山色空餘望裏登

答王百穀虎丘送別

林棲同倦鳥山寺晚鐘殘霜涸秋潭冷風疎夜磬寒榻
方懸半偈錫更指長干欲就浮丘聽難禁別鶴彈

秋日過蓀谷訪石公

盤溪曲磴趨欹斜行盡芳蓀始見家門外空多萬岩壑
可中不滿一袈裟經年石瀨常疑雨每日林香未辨花

此處白雲紅樹好休容車馬破烟霞

秋日過吳氏經閣

誰向空門學布金新開龍藏樹祇林衣裁薜荔頭陀製
人頹蓮花不染心旛影到溪成梵宇經聲出閣總潮音
氤氳細細靈香散識得諸天莫外尋

冶父山居四首

亂石砌成茅屋編柴夾就疎籬繩樞華門晝掩任教霧
鎖風吹

風雨杳無人至閉門靜裏生涯詩字蒲團經卷燒香汲
水烹茶

定起一聲清磬經行幾轉雲堂課畢篝燈松火摘來柏

葉生香

食至三聲鼓響茶來半點經圓四衆和雲散空祇留明

月堦前

冶父山中有懷方丈菴

東嶺初升皓月西林漸沒殘霞散步歸尋邊笋乘涼摘
到新茶

望亭飯僧作二首

借得人家隙地中藏幾樹梅花旋構數間茅屋欲談一

卷楞伽

屋後一灣流水門前幾點青山雲空月來橋上鳥啼花
落林間

祇樹菴

竹映窻前水激門數聲幽鳥報朝昏行來恐踏苔痕破
目送山雲過遠村

釋德清

字澄印號慈山族姓全椒蔡氏年十二入報恩寺與雪浪恩公並事無極法師北遊叅徧

融笑岩偕妙峰登公棲北臺之龍門大事既徹慈聖皇太后建祈儲道場實主其事未幾黃冠難作坐私造寺院成雷陽時兩粵患稅礦之使公以佛法攝受所全活無算嘗掛錫浮山有詩錢虞山謂其伸紙信筆一一從光明藏中流出萬曆間公與雪浪恩公先後來浮渡不可謂非山靈之幸也

癸卯初度自五羊之曹溪舟中作

今朝五十八明日五十九未來不可思過太何所有世
相空裏花毀譽鏡中醜不推羊鹿車喜隨牛馬秃自媿
膝穿蘆却怪肘生柳髮散少冠束面厚多塵垢戰退生

死軍打碎無明白使盡老婆心笑破虛空口兩岸既不
容中流非所守來往任風波公住絕偕耦天際望長安
寒空一回首回首問時人誰是儂家友

遊浮渡歌

空中一鳥鎖青霞宛如香海浮蓮花岩龕石竇花簇蕊
又如帝網珠交加我來遙登華藏界一開雙眼無遮礙
周圍行樹影重重分明炳若瓶中芥橫空殿閣雲中影
恣身不動青山穩飛來花氣暗香浮習習侵人重衲冷
曳杖撥開岩中霧怪石崢嶸若綦布指點還如數刻星
一噴青天灑飛唾石門磴道一線通側身半壁足不重
猿行鳥度亦不易何如使我筋力窮扳蘿直上妙高頂

眼底湖光霞布錦足未離地身合空回看亦似水壺影
小轉還過會聖岩雲廊石室何奇哉遠老因基善說法
黑白未兆令人猜渡溪西上蓮花石朶朶金蓮從地出
徘徊不見花中人但聽松風廣長舌回禮金谷丈六身
虛明無地容纖塵劫火洞然此不壞始信蒼崖是本真
我欲誅茅依石室餘生借此藏踪跡倘得安眠白日高
身心世界都拋擲如何捨此從他去一葉浮空總是寓
不若快便早歸來休教猿鶴長相憶華藏從來是故宅
行盡十方出不得潛身頓入一微塵何人于此知消息

山居

髮不如心白形還似木枯衆緣閒處盡一念看來孤天

已容疎拙禪應離有無餘生當落日步步是歸途

舟行

湘水通巴漢孤帆入楚天片雲低遠樹晴日照斜川處
世常如寄浮生莫問年縱遵歸去路亦似渡頭船

抵廣州寓海珠寺

天涯歷盡尚遐征百粵風烟不計程涉險始知塵海濶
道窮轉見死生輕暫依水月光明住偶向琉璃寶地行
到岍舟航今已棄上方鐘鼓爲誰鳴

寄浮山澹居鎧公

浮山九帶車如何回首當年已爛柯爲問夜深趺坐處
白雲明月是誰多

釋法鏡

字澹居長洲趙氏子紫栢可公之法嗣也住持浮山之會聖巖曾主華嚴寺法席道望隆重詩詞書法皆傾一時示寂于雙徑門人清隱亮公奉全身歸浮山塔于翠微峰之西

醉翁岩

靈芝石下路難通逕轉峯頭憶醉翁豈謂醉翁崑寂寞

更聞雞犬在其中

釋本智

字朗目雲南人其地有朗目山因以為號徧參諸方遇紫栢老人參扣入室署為首座至邑之浮山見遠祖道場人北與吳觀我宮論阮澹宇太守倡議興復檀施雲涌頓成寶坊萬曆中勅賜藏經永鎮祖庭公即雲遊五臺甲辰再至燕中寶塔寺乙巳冬寓廣慈菴為眾講楞嚴經甫第二卷一日以書辭丘太史禾實丘甚疑之三日後過訪公以閉目示寂端坐如生遂茶毘塔于浮山

坐木蓮閣

小閣千崑下幽棲一病禪燈懸天上月菴煮谷中泉石

潤岩飛瀑林昏樹吐烟有人來問法惟指木開蓮

懷古

憶管歐陽子來叅遠祖禪收枰談實相豎拂了重玄窈
竟形名外單傳黑白前至今跌坐處枯石長金蓮

浮山解制

千日禪關解制時秋風吹動紫伽黎白雲片片橫金谷
流水潺潺下石溪錫杖竟飛天柱北鉢囊爭出石門西
因緣聚散初何著獨向寒山樹影棲

護勅藏歸浮山

紫泥飛上妙高峰水石山雲寂照中三十六崑沾化雨
百千萬劫吼仁風木人來問三生訣石女親承九帶宗

世出世間無異法只教心與太虛同

蓮花石

三十六崑今又別蓮花一日幾經行道入太住原無著

為憶天池夜月明

釋佛光

字慈照新安人臺山月川之嗣朗公剃染之孫也萬曆甲寅夏掃朗公塔于浮渡妙高峯

吳太史客卿司馬本如請主五印寺晚年以百金入浮山華嚴寺為歲輸賦入之資未幾遷化其徒覺成塔于寺莊之後所著有石林木居詩一卷

亂後歸浮山草堂

且喜干戈息雲門返客舟青山仍在眼白髮未盈頭風

月供新偈烟霞守故丘籬邊松與菊猶為草堂留

垂虹井

千尋裂石罅迸出流泉冷菴廢綠蘿凋井前有渴虹垂

下飲

釋行岡

字千仞楚中名家子少隸諸生以秦寇之難

五祖拈椎豎拂有一代龍門之風因掃遠祖塔至浮山遂主華嚴法席據室云未開雙眼誰敢當軒死却偷心方許入室然雖如是更須勘過始得許載語錄中曾有重修華嚴序欲振起國鑑宗風與姚休那居士為方外交甚善後復歸五祖吾鄉聖安省禪師亦其嗣法龍象也予族叔秀三名瑜芝者年二十已婚冠矣一旦徒步謁五祖腰包杖錫從公受具戒非聞風而興者與

九日懷友

兩度逢重九偏君不在家去年頭未禿此日帽尤斜是

處雁烽火何心問菊花故鄉已愁絕况復走天涯

金山

到來山寺裏不復記寒溫
瓜潤風烟介波濤晝夜奔
三秋淹越客千里見荆門
天下滔滔日中流一柱存

贈姚休那居士

此去欲何之叢林有一枝
藏身兵燹日投足水雲時
莫厭儒無術甘同我不辭
消磨俠烈氣木樵與軍持

示居士

淨名終假相示跡滯毘耶
病是衆生病家非居士家
磨磚難作鏡種粟反成麻
心境俱忘處長宗一雁斜

和文光法師挂瓢半塘寺

生平無奈此瓢何齋罷應須挂
薜蘿不逐孤雲千里去
且同流水半塘過
心頭自覺無些子
肩上如今輕許多

樹有松花池有芟免將口腹累檀那

淮陰雪中過通源寺訪萬年少先寄至拙上座

淮水東頭叩夜禪
此身來往意飄然
玉禾疑是栽天上
金粟分明現寺邊
古路竟封三日雪
故人只隔一林烟
待君爲我開刀丈
不是山陰訪戴船

問何無咎遊江心寺

不妨喚作小蓬萊
懷抱欣然到此開
萬里潮方將塔撼
兩邊山欲渡江來
忽增陸地浮沉感
因想中流砥柱才
好向海天窺彼岸
與君更上一層臺

示八菴

拂衣不使染紅塵
三十年來出世身
開士曾爲名下士

道人原是讀書人法從白馬經中悟心與黃金座上親
此日既承予記荆圓八三點越尖新

與宿松下院月珠和尚

十里鐘聲覺路賒微分蓮澗滴平沙上堂自任新靈隱
下院重開小泐華月印長川珠吐蚌松凝宿露石生霞
高樓莫厭無酬和時聽樵歌送晚鴉

寒夜同友宿育王寺

嶺松凍色轉蒼蒼老至重來禮育王客暮但聞僧梵唄
童時曾見佛毫光芒鞵踏碎寒山月竹杖敲殘曉院霜
一夢恰如過一世與君商略覓津梁

釋大穢

一名元來學者稱無異和尚舒城沙氏子生而白衣重包葷酒不入口十六遊金陵聞法

華于雪浪恩公遂禮五臺祝髮于靜菴通公得泐于壽昌老人二十八居信州博山之能仁寺六和廩至四事雲興博山宗風烜赫義林才辨聞望傾于一時天啓丁卯聞父訃奔舒城取道吾鄉盍簪盈缶實蕃有徒予小子年方髫髻親受摩頂之記楷稚齒無知不能入其錘師慈容淨滿道骨堅凝眉采燁然春秋在穎法筵清衆不肅而嚴刈麥負薪無不人人委蛇詳叙若有深湛之思者行業具宗一先生塔銘中予摺據師詩不可得方子素伯從錫類法檀中接得十餘篇皆慈社贈畬之作也嗚呼師豈以詩重哉

次韵答謝中隱居士

錫飛桐子國皈向意紛然不樂三乘教寧參五味禪經
行稽古道趺坐聽鳴泉笑徹清凉夜相逢話月圓

釣魚臺度歲

臘盡纔聞訃孤舟趁夜回澄沙無鳥跡深樹有猿哀江

青耶屋牙卷之三
何時到家庭少客來思親兩行淚先落釣魚臺

雪夜哭父

管世尊為父金棺扶襯涅槃時諸天血淚如雨
大權示現不斷世緣戒經云孝名為戒亦名制
止慟哭深思非情想所及因書哭父偈示諸從
行者

親墳在咫尺何事苦羈留夜雪飄無歇寒雞叫不休悲
思驚坐寢血淚染溪流天憫緇衣孝青山盡白頭

舒城渡河

河下白如練烟雲照淺流近城禽解語抵舍客生愁骨
肉無青眼兒童半白頭荒郊高纍纍盡是故人丘

過水松方丈

水勢穿山谷松聲落澗泉凭欄占雨候正值杏花天
舟次梅溪

水濶如舟小雲深見樹低掀篷問渡子說是小梅溪

謝吳石生居士

會晤須臾與道交泥途百里不辭勞將何人事酬君去
獨有歸家路一條

釋元亮

字清隱河南鄆城崔氏子三歲出家于里之

普濟寺既而參學諸方慕紫栢老人之風徑
造浮山見澹居鎧公而皈心焉深究大乘卓然有
得還鄆省親開講廣教寺天啟辛酉鎧公世壽六
十特來浮山祝之慕壽昌經和尚開田說法為本
分鉗鎚遂于石龍峰左就地高下畝墾數畝博山
老人別浮山公送至皖上博語諸君子曰老僧去
後欲了此事者當知四卷楞伽在清公處厥後公

各益著一日忽示微疾偈云逢場一事正商量拂
枕秋風一夜涼紅葉更從霜借色清泉好為月儲
光臨川魯叟寧知老藏經莊生不是狂了了乾坤
雙眼在鏡中花發木樨香又自撰塔疏集衆辭行
衆問曰師此行後何處相見曰逆水定香
侵案濕雨花應供石牀平向空一擲而逝

吳蓮舟居士雨中見寄依韻奉和

妙高峰頂白雲深流水桃花滿碧岑拄杖有無誰與奪
空拳破雨好追尋

釋戒顯

字願雲號晦山族姓吳門王氏本先朝明經
少與吳太史梅村同學甲申後薙髮出家于
玉峰之海藏為靈隱具德禮公嗣法弟子公嘗語
之曰綱宗者人能講我能用先師當日鉗錘晚年
始獲其益此即我三峯家法也其接引直截如此
曾任黃梅四祖又挂錫匡廬道經浮山流連不忍
去有別金
谷岩詩

別金谷巖

浮渡名崑金谷傳崑中石壁滿金仙當頭突起碑無字
滴水飛來甕有天樓瞰千峰青嶂鎖關通一竇紫霞懸
出門纔揖塵中去又向漁磯覓去船

釋慧琛

字魯南自稱西蜀趙氏子與槃菴熊魚山同
門投分最深皆嗣法於靈崑繼起儲禪師人
以為雪菴和尚之流公終不自言何許人也因禮
投子遂主崇福祖庭八載復振慧燈宗風著有語
錄一卷程奉常立菴為序其首後入南泉示寂建
塔獅山臨行屬侍者以衲衣拂子寄息心居士云

洞天深處

在王屋崇福寺西澗

洞口流雲濕烟花接翠微參差藏怪石縹緲映斜暉懸

瀑傾松頂鳴禽繞竹飛悠然尋樂處誤入竟忘歸

酬趙以贊居士

時往靈崑省觀老人方歸

多年淪世路幽夢到天涯短杖親師日深山舊士家倩

啼尋宿鳥過樹看飛花遙憶溪邊月輕舸歸路賒

禮浮山遠祖塔

多年棋局未曾終此日看山到此中舉手不辭三拜竟
識心猶賴幾人同岩深無隙投新月洞冷當門拂曉風
策杖且隨流水去漸看蒼翠濕空濛

丙戌春侍本師儲老人南還兵阻平江老人以蠻

奴赤脚上皇州之句命成一絕

蠻奴赤脚上皇州暮雨酸風大地秋古廟裏頭回避得
一身還有一身愁

朱能及居士七十

大道由來絕古今殷勤何必問從心野情豈效華封祝

指出南山最上岑

浴佛日趙以贊四十步韵

梅子青青接暮春碧池搖影笑相親一年一度花開日

七步周行試此身

釋道盛

字覺浪別號杖人閩浦張氏子戒秉博山法

弘東苑曹洞一宗賴以振起順治戊子春從
白門來會聖岩禮遠祖塔時方觀察蛟峰欲請主
浮山法席會白雲岩有揭竿起者寇且至四眾駭
散公晏然端坐笑而遣之不獨名山祖庭旛幢無
恙環山村舍亦安耕芸公之賜也小龍山中方寺
迎請應浴佛之期猶有再來重興之請非再來之徵
耶公行業詳劉黃門良弼所撰塔銘中其徒竺菴
成公狀之曰師雖嗣法洞宗五宗並舉主盟佛教
三教並弘劉黃門以為定論公與憨雪諸公不必
以詩重吾取其不落禪諦者為風雅之一助云爾

再入武夷見玉女峰

山水有奇姿幽貞夙自負亦時懷隱憂未獲良人晤我
憐窈窕情惻然返故步初見恍夢思如怨復如慕溪感
白頭吟素琴猶在御一撫心爲悲再撫心爲悟指月盟
寒潭佳期勿再悞

與方爾止紀伯紫唐髯孫諸子夜坐尚論古今忽
及方子留少年英烈創感于懷賦此

人如此干心可剖心如比干人可友泰伯文王尼父取
舜子丹朱誰下手文字知見怪掣肘癡忠愚孝視敵帚
試問于今還有否驀然叫出方子某驚起杖人只搔首
張興公六十拈此示之

在簪嘗高陶靖節退身一步真人傑門栽五柳自依依

乞食不愧言辭拙如今想慕無其人喜君學道能安貧
甘老丘園課耕讀自呼六十葛天民

山事二首

十年隨一杖所至草離離樹是團蕉屋石爲無字碑此
中休夢語別路有誰知兩袖乘雲起飛花點墨池
小窻收鬢鬢古澗送潺湲苦竹常留徑高松自護關眼
惟憐白紙天只許青山出沒浮雲態容予坐看閒

懷浮山遠祖

尚論宗門奇特事輒於遠祖不勝情五絲將絕誰兼命
二桂中興獨主盟葉縣盤根千古峭太陽翻茂兩眉清
兒孫碌碌盈寰宇幾識浮山脚下行

博山老叅往桐城候何芝岳相國吳觀我太史

博山雷雨過龍眠潘窟騰空總電鞭瓔珞光中垂兩手

雷霞洞裏只孤拳浮丘金鳳飛還息投子青鷹夢自圓

赤脚油餅相見笑千秋一帶與誰傳

南屏懷古似左三山侍御

重振孤筇入武林湖山影影照人深南屏一帶春風起

吹我蒼茫弔古心

浮山嚴公來

青鷹收翼入人懷赤脚桐城特地來話到指天金谷下

棋盤石為掃蒼苔

皖桐王以介太史過訪

歐公曾試浮山遠棋局拈來別有禪今日儼然相晤對
當機一著請君先

山遊次夏生韵示竹關無可

神烈山前剩幾松冰霜有路護茅蓬竹關枕子墮地否
濺血漫天感此風

釋如清

字石浪族姓陝西城固顧氏子七歲謁際虛

和上祝髮紫栢山九歲依梅谷和上研摩內
典十九入都徧參講席雪浪月川高源諸老人以
法器期之二十五受具于古心律師喜修禪觀嘗
結茅于匡廬金輪峰之下禮憨山清公多所咨扣
又訪博山謁壽昌遊峩巒登瓦屋提杖叅方幾半
天下晚乃歸憩慈雲應檀施張方伯之請結宇梅
檀以崇禎庚午仲春示寂塔于梅檀錦峰之左世
壽五十三僧臘四十六有枯木吟幻關草博山老
人與吳樞部雪厓為之序五言近體其最優者予
嘗謂慶陽學杜其悲壯處猶有車麟駟鐵之遺公
秦人也何其嗜嗜離離似吾桐音其寶月清晝之

後身乎公順世已五十年予采詩榆社披及緇黃
其孫擴慈禪公出其遺篇繕寫精好新如未觸且
縮其伊蒲之饌用供殺青又屬予點定全
集將缺專稿以行世法中未易多得也

宿彭澤縣懷陶淵明先生

維舟彭澤听遙懷靖節風詩書自娛樂微官糟粕同永
辭五斗祿歸卧柴桑中豈知利名貴惟虞尊酒空或飲
栗里間或醉籬菊叢門前種五柳隣多素心翁相與話
桑麻歡笑忘其窮誰是知音者東林一遠公

坐桂花下寄成都離微兄

桂影婆娑大如斗落花滿地莓苔厚香風吹月上花梢
月照花神開笑口忽憶成都關主師未知近狀能佳否
別後音塵十載餘我意問花花不吐欲折一枝贈遠人

水遠山長不耐久摘花和墨寫新詩寄與竹林蓮社友
一年一度見花開百斛離愁掃復來安得雲中飛錫至
與君共笑桂花臺

信州江行

好山連不斷江路轉迢迢曉霧半帆雨秋雲一澗潮高
樟藏野寺古柏隱危橋慣得遨遊趣孤身未寂寥

匡廬雜咏

逕隨流水入門向衆峰開亂竹排雲上一聲幽鳥來繙
經花影動鳴磬鶴飛回招隱泉非遠携鐺就綠苔

不寐

夜長清不寐擁衲坐焚香霜氣肅羣動燈光冷一房秋

虫鳴古砌疎月下寒塘遙憶山中侶藤蘿覆石牀

憶廬上舊居

出戶見層峰悠然憶舊蹤門應荒草合路是白雲封霜
落初收稻天寒未種松塵紛不可住歸去學降龍

賦得白雲多在山

本是無拘物如何意不閒暫隨龍出岫又逐鶴飛還靜
宿池邊樹閒依戶外山知予多寂寞夜夜伴柴關

留別知己

蘭若西山靜安禪不記春言辭同席友歸觀倚門親沔
水元通楚江帆望入秦縱然重聚首俱是白頭人

霧中山宿見宗老人房

信宿雲中寺欄干薄暮凭因尋功德水得訪薜蘿僧下
榻千峰雪懸燈一澗冰石楠花樹上山月影層層

憶舊遊

西川饒勝槩瓦屋與峩山奇妙甲天下高寒出世間僧
居雲霧窟人訪雪花關曾記攜詩句峯頭對月刪

謝中隱居士雨後見過

山寺雨初霽詞宗著屐過雙塘春草合一逕暮烟多芳
樹徧崑谷寒泉挂薜蘿竹房懸半榻留待老維摩

送姚純甫居士由浙之閩訪兄心甫明府

山水有知己忻君快意行起潮逢夏爽得句愛江清帆
影懸吳越琴堂憶弟兄荔枝逢到日飽食話離情

過劉白林居士小山

幽尋得此地不與世人通
盡攬千峰色都收一戶中
風搖藤壁亂花逗嶺雲紅
小坐消塵想彌知君念空

新秋酬汪克下居士

好雨灑新秋乾坤暑氣收
雲依山谷動溪抱石塘流
作賦看司馬談經憶惠休
匡廬蓮社近吾意一瓢遊

酬劉大理燕及先生

遺民歸社早支遁尚耽吟
偶爾一交臂永懷千古心
春花連雨發紫蕨入林尋
脫粟黃齏供何妨亦抱琴

題楊蘭似居士書堂兼示倪君夷茂才

楊子愛禪棲書堂傍虎溪
龕燈分佛火林吹送仙雞
床

下泉聲響松梢月影低
詩情兼梵咏踏徧數峯西

春日贈能止兄

一鉢辭岷水長年未得歸
禪詩貧後進鄉夢定中違
蘿薜裁春服雲泉暢道機
夜涼羣籟靜山月映柴扉

早春送印弟過九華訪青蓮社友

春澗水初泮芒屨別玉屏
渡江一水白到岍九華青
秋浦雨中過寒潮月下聽
芙蓉多舊識杖笠莫辭經

別岷嶽弟

纔辭巫峽險又進劍門程
只是添愁思那能增道情
荒烟迷野戍大雪擁山城
行盡褒斜谷應知白髮生

東謝中隱居士

出郭山根五里遙，錦雲峯對矮松寮。
千章古木圍溪口，一道寒流鎖石橋。
眼倦拋除文字障，心閒贏得酒杯消。
幾回掃徑茶瓜熟，爲愛清言破寂寥。

自博山回東諸知己

博山叅罷起寒歸，幾度懷人在翠微。
江雨半帆懸客夢，溪光數畝染僧衣。
雛僧掃石和雲動，倦鳥投林帶雪飛。
自是名心都歇盡，錦峯深處掩柴扉。

送岷嶽師弟習靜江南

江南名勝多奇絕，九子齊山可卜居。
臨壑有堦須種竹，傍湖構閣好收書。
天台雨過諸峯淨，秋浦霜歸萬木疎。
若向翠微亭畔望，試尋山谷字何如。

冬夜書懷

木落猿啼霜滿空，露華寒浸梵王宮。
百般幽事來心上，幾處名山入夢中。
樹影靜依蘿薜引，泉聲遙與石龕通。
應知此夕懷人處，月照松堂萬壑風。

思鄉

一度春風一倍愁，思鄉無日不登樓。
愁心欲寄襄江水，不肯回頭西北流。

方赤城先生來遊匡廬，覓予時予居金輪峯不果
一晤賦此寄之

瀑布金輪景更奇，美人何事不攀躋。
自慚住處雲峰冷，拄杖無緣伴虎溪。

張欽之梨園

十里松聲爽客心
蘿門窈窕碧沉沉
殷勤預與梨花約
待到春來月下尋

送剡水公賈錫類泐檀上博山

兩岸霜林映水紅
法檀穩載碧流中
秋山似識曾遊客
齊立江頭送剡公

答客問小徒到家消息

瓢笠星霜三月周
計程應到錦江頭
縱教雨雪羈行李
不在嘉州在簡州

釋海瑛

字與疎舒城羅氏子年二十刺染于大羅菴
大羅者先高祖侍御成宇府君萬曆中建子
郭北延律師祖西印公結方外交印公戒律精嚴
單提念佛以攝禪淨邑屋中緇素傾慕法施雲湧

高足首推克賢次則與疎崇禎未菴火于賊偕師
弟屈遠竝公湖遊三吳叅訪耆宿順治初返鷹阿
就其田廬以興復為已任不數年殿宇告成弘敞
鉅麗視昔有加公與竝公之力也公專修淨土晝
夜可四五萬聲行業專勤風規溫雅里人無知與
不知皆為公屈第一指康熙癸丑除日示微疾沐
浴而逝所著有鷹峰散話予為詩挽之有云龕室
在時常入定佛聲寂後尚如聞蓋實錄也世壽六
十有九僧夏亦幾五十塔于大羅菴之西一時古
鏡有寂弘字窮崖者與公兄弟善公嘗誦其秀句
如梅花云流香出古洞和月照柴關恐教春草見
預向冷泉開澹月霜中洗疎烟石上籠曉含江日
笑晚逐笛聲涼雁字云一片錦心藏萬古幾回霜
翻掃孤峰四海坑儒因獨免何人把筆再刪書數
行整似連珠體一陣斜如指日戈雪夜云翻疑林
下春催到只道窓前月曬來皆賦物之雅奏也或
以其出于青林馮來子而少之不知吾鄉青衣能詩者
頗多如桂林馮來子而少之不知吾鄉青衣能詩者
臨池徒乞米彈鋏不歌魚妻風敲瓦背孤月到床
頭楊柳欲花堤影白芰荷得葉水痕青夜當涼後
纔就酒月到明時却戀秋家貧未畢兒婚願道阻
難尋父骨歸延陵孫肇先之霜草無人跡枯枝有

雀巢亂烟縈柳絮細雨落桃花寒江帆影落古戍
角聲高沙田留鹿跡烟樹隱鳥窠三湘柳色空迎
眼二月梅花未寄家兩度桃花千樹滿百年耆舊
幾人存廣陵將慧士之窺窓微月影覆屋老桐陰
鳥語一時歇鐘聲數里間選樹鶯啼如喚友浴溪
鷗夢解參禪病倚孤燈為老伴身如落葉逐輕塵
黃金結客交難薄白髮驚人老未歸或清雋或輕
妍俱有鑪鞫豈呻吟左氏解讀靈光其漸摩者素
與吾家蒼頭師善者年垂七十亦知詩今且長
齋持誦飯心禪悅而惜乎予之不及穎士也

夜坐

坐看秋夜月風動衲衣寒雲隱山光淨臺空鳥跡殘心
閒名利薄事少夢魂安遙想彌陀院情淡法喜餐

登投子山和韵

尋幽趨勝地芳草帶春寒曲徑雲埋久祇園鹿占寬鐘
聲前代蹟檀板俗人彈先哲歸何處遺踪淚眼看

過三慧菴訪古達師拈翠旭韵

綠樹參新竹茅菴舊隱家有池堪映月無地不栽花刻
石先為座開山已種茶劇談時易久窻影日西斜

山居雜咏

一寓鷹阿已十年眼前木石盡皆禪消閒曳杖行松徑
解渴攜盃汲澗泉掣斷玄關堪脫屣吸乾香海可栽蓮
年來行脚根機劣說法何須豎大拳

重過海會菴訪慈石禪師

芒屨不怯路行難重破雲關躡碧巒登嶺衣霑朝露濕
渡溪足踏夜泉寒凌空松竹增新翠彈指樓臺勝舊觀
話久頓忘更漏永頻添薪火足盤桓

次晒大師韵

細縫雲衲禦寒霜懶與隣家較短長風捲秋堦桐葉冷
月明茅屋老梅香閒常倒屣迎佳士貧不將詩謁貴郎
無限清幽消未盡名場蝸角任人忙

悶雨東蜀藻居士

春花失意也堪悲每恨風敲雨打時茅屋破愁禪榻冷
竹簾輕怕佛燈危一條白瀑雲遮練數朶青峯翠斂眉
鑄底縱餘三合粟生柴旋斫午炊遲

悼汪海度居士

撥草瞻風事正濃誰堪遽隱入雲峰緇衣也灑青山淚
門徑空餘碧蘚封

奉和蓮池和尚多娑婆韵

月到幽居趣更多竹窻斜照影娑婆謾言古道青烟合
勘破雲山指路婆

釋本正

字曹水西蜀之瓦屋山人也為石浪濤公上首禪定之餘旁通儒典肆力詞章有清公風

聞蟬

天朗暢新晴春山蟬忽鳴予心渾不覺客意若為驚花
暗聲逾切風迴響更清微依松竹下如助苦吟情

山夜

涼宵羣籟寂事事愜幽情竹影搖窗淨松梢挂月明鵲
來林有伴犬靜夜無聲徒倚孤燈下吟詩一倍清

秋日歸梅檀林

入郭情偏倦歸林興轉幽亂山黃葉落一逕碧溪流古
木寒鴉集新霜淡日收千峯頻到榻坐看野雲遊

薄暮喜虎子見過

淡日落谿口薰風送竹涼晚烟迷野岫好友到閒房纖
月挂林杪微虫鳴夜廊高踪欣邂逅益助我詩狂

重陽期張堯仙居士見過雨阻有懷

掃徑迎君晝已昏層層夕霧蔽柴門窺窓但見秋花笑
獨坐空聞流水喧隔嶺猿聲啼暮雨隣家砧響咽空邨

相思又聽西風起黃菊叢中何處尊

釋音可

字元白楚武岡鄧氏子年二十謁顯愚衡公
遂祝髮學圓通法門參訪博山湛然慈山雪
嶠諸老二十四謁天童密公多所咨扣指柱大法
頗為同寮所忌遂辭去過江陰黃介子請開堂豎

拂嗣溯江右恢復泐潭祖庭金碧輝煌法道烜赫
乃來浮山掃遠祖塔闔邑衿袞請弘法慧山二十
餘年佛刹僧寮煥然重新居無何挈院事付十洲
禪師退休舒城華蓋山紺宇落成復應撫軍張公
之請住錫郡城之清涼菴撰集圓通廣懺六十卷
板行于世一日示微疾委順而化弟子奉全身塔
于瀟之天柱世壽七十六僧臘五十六所著語錄
若干卷公道行超卓詞致非其所長其次栢堂禪
師山居詩有可採者五印古槐懷公吾邑人也曾
開講章江之嗟峨山亦有次栢堂山居詩如落花
滿徑和烟掃舊茗生塵趣雪烹插棘編籬遮夏笋
開池引水灌春花清影半龕孤月照潮音一派萬
松號看圓新月看殘月聽罷晴鳩聽兩鳩折脚瓦
鐺時煮茗尖頭茆屋晝焚香忙裏不知頭似雪靜
中始覺日如年若與靈一處默相遇詎復多讓蓋
吾邑騷雅之盛即緇流中亦不可勝數因思天崇
之交未罹兵火設有注念斯文者早為收
輯勒成一書不可謂非粉榆之幸也惜哉

次栢堂禪師山居韵三首

清閒偶爾問兒曹野馬塵埃作底勞一點古今天下雨

大千世界海浮毛碧池霧起龍方躍寒竇風生虎便號
未許聲名向門外山居何事更增高

紫芋黃精種幾叢了無紅粟累人春床頭落枕能驅夢
鉢裏生雲不呪龍風起天浮清漢水土肥地養翠濤松
看來仍是閒家具何必蒲牢更吼鐘

却憶雲遊在路途曾將無隱問樵夫珠穿九曲蟻何智
字啞千行蠹不愚怒髮原非爭玉壘傾家祇爲賭珊瑚
從來得失都成屨夢幻虛名未可圖

東趙以贊居士

陣陣香風掃玉蘭秋光照落一輪寒衣珠未得人收拾
且把心王獨自看

龍眠風雅卷六十四目錄

木厓潘 江蜀藻輯

豫章釋興斧山足 叅

同里釋智操寒松

衲子

釋明雪 七首

釋存省 十九首

釋弘智 七十七首

釋淨燈 八首

釋大寧 五十六首

漸子

同里驛皆熟寒林

新章驛興峯山只

木里香 五區藥神

龍眠風雅卷六十四目錄

龍眠風雅卷六十四

木里潘 江蜀藻輯

衲子 以下係邑人弘法諸方者

釋明雪 字瑞白入就別號也樅陽楊氏子事母卓以

西倩師令持毘舍浮半偈偶聽楞嚴忽悟身世空

花渴慕向上聞湛然澄公大闡宗風於雲門遂往

從焉每有浴扣澄公輒笑而頷之欲有所付不受

天啓丙寅秋復以衣拂授之始不敢辭未幾澄公

順世衆請繼席崇禎庚午夏將之終南道經吳興

爲弁山僧遮道留王龍華法座緇衲如雲道風弘

扇嗣是開堂延慶說法白雀登應諸宰官請凡任

弁山七年楚剎一新丙子欲遂終南初志又爲黑

風所阻挂錫崆峒山吳興諸宰官趣歸弁山不果

適有幣聘主洪都百丈山者勉強往赴以辛巳三

月十九日示疾說偈吉祥而逝世壽五十八僧臘

三十八塔全身于弁山龍華寺吳宗一先生云吾

邑之有弁山猶龍舒之有博山此非尋常定知地

湧菩薩不忌慈誓以佛知見爲我等留影是邦其

推服者至矣公行錄詳余中丞蟄庵所作塔銘中所著有語錄並闢叛十餘卷異方便一卷九坐道場得法者三十餘人法席隆重烜赫東南嗚呼可謂盛已

遊桃源洞

昔年懷此勝今日始親來
劉阮仙何在胡麻跡未灰
曉花迎日媚野鳥帶雲回
徑轉情猶適還親石上苔

尋路

與來曳杖行信步入荒草
問取採樵人皆云此路好

宿梅檀林

林中無異木純是梅檀繞
一宿此林中時覺香風好

德山托鉢

木偶何曾喚得醒牽絲徒
作幾般聲不如收起優棚好

對月空庭談更清

遊雲棲五雲峰

循溪直上五雲峰絕頂渾如
霄漢中綠水青山環滿目
何須更羨梵王宮

咏雪

冽冽寒威遍界周六花飄蕩
滿空浮乾坤今日一時老
處處青山盡白頭

青石場山居

榮辱無干樂有餘瓢囊高挂
隱山墟茅庵結在窟幽谷
野鹿閒雲伴我居

釋淨燈

字破闇號容菴又號棘園邑人汪氏子初習儒旋禮博山無異和尚薙染受具梵行精嚴

楷在末流法門推爲義虎禪定之餘旁通儒學嘗
提唱良知宗旨與餘姚相發明後嗣法弁山瑞老
人居第十三座順治庚寅鄉衮方仁植中丞孫魯
山司馬汪坤生明經齋書幣迎請于華山中方寺
開堂說法所著有語錄十卷詩文五卷楞嚴律部
南華諸解及大學續語中庸截流諸集公住道場
凡十三法嗣凡二十八講席之盛亦近今所
僅見以順治己亥秋示寂塔全身于三祖山

病中書懷寄一句法姪

久病碧山貧時思午後臥松風枕畔鳴梅雨簷前啣歷
落珠千斛浮沉月一個蕭蕭幻影殊此曲如何和

三山舟中別吳朗函廣文

遠岸垂楊綠荒林落日斜相逢烟雨濶惜別海雲賒旅
邸悲春寂書齋放早衙君今揮手去無復問官家

壬辰秋底自桐城來弁山禮先老人宰堵寓草庵

塔院夜坐有懷

冰花三兩樹霜葉幾千枝鳥宿簷前月雲來洗鉢池

留雪

昨夜來時興不同如何今日便西東留君暫且中原住
免得征鴻暖曉鐘

避風

嚼雪應知冰是寒趨風爭似避風安閒來每讀陶潛賦
坐對南山不忍看

寄林樵

自古梅花臘月開隴頭消息帶春來今年不見江南客
莫是江南梅少栽

編籬

編籬不是趁雲飛每為莓苔失粉衣多插桑條少插柳
免教明月逗晴暉

再遊虎丘題劍池

最喜逢人說虎丘劍池峰冷紫雲浮峭崖陡壁芙蓉面
雨洗寒濤石點頭

釋存省

字聖安自號人山道者邑中許楊氏子幼讀
書應童子試婚娶後一夕月下閒行見道旁
古井默計曰入世滋味不過如此盍早覓回頭解
脫生死乎遂躍入少選身自浮而上從者訝其故
公笑曰偶然耳年十七臥塾中夢白髮老人持大
文簿至一頁可十餘行字畫微細中有鹽關二字
老人指之曰此汝八字至此便好又夢老人捧大
梓盛煮熟僧頭眉目口鼻悉具忽驚寤時秦寇蟠
踞山中公曰吾不生矣果被執旋釋之遂棄家潛
行祝髮于空徹和上廿四隨具德禮公至揚州頓

有省發適符鹽關之夢一者宿謂之曰汝是熟和
尚他日為僧之首又何疑在靈隱已為具老人所
器待偶遊廬山遂為磬山入室弟子公素善病受
東山付後開堂于贛州靜聖吉安聳福復歸桐隱
居深雲禪院與州司馬趙子湛齋往還印證以拂
子手卷授之康熙丙辰首春方禮佛名經畢忽示
微疾于所善緇素悉作偈為別沐浴更衣端坐而
逝其門人海策輩奉全身塔于深雲所著語錄二
卷趙子為之刊以行世
而予與越樓陳子序之

冬日

孤坐擁衾帷東方白上眉風淒鳴鳥少霜重曉烟遲平
野羅丹樹陽崖放紫枝遙思無褐者曝背亦熙熙

陶谷

昔喚陶家谷今開衲子扉山清無盜入雲密有僧歸夜
梵停猿泣晨鐘飯虎饑桑門神化遠含識盡依依

鷓鴣

不曾卑枳棘豈復羨椒蘭色淺心常下形微求易完鷓
猶俄翼過弋亦真羅看衆鳥多憂畏誰如爾最安

感歎吟

幼齡亦敏誦祇欲博浮榮未展青雲步俄遭白刃驚熱
中渾底冷暗裏當時明幸爾頭顱在因堅出世情

自咏

老來懶復下幽岑古德芳規尚可尋閒坐每修無縫塔
開懷時弄沒絃琴匣中皓月光華滿屋裏揚州花木深
自信世間知己少風流原不在簪纓

咏茶

青青不畏雪和霜摘葉裁枝認不妨烈焰場中收氣色
清泉浪裏展旗槍味回那見當初苦性潔偏留久後香
若遇睡魔來作祟儘教一椀便生涼

喜雨

風吹西嶺千條雨到我幽林一夜涼閉戶惟聞蕉葉響
開門忽覺豆花香蛙從墻外池邊噪蟹向堦前石底藏
野老隔溪招手喚水消烹茗待君嘗

影

暗裏相隨猶未覺明中回顧始知親短長大小雖成假
坐立閒忙却似真辨色最宜臨水鏡開言認不涉聲塵
四方上下無拘束百歲殷勤伴此身

音韻通雅卷之四
武林飛來峰

靈鷲異群山千峰滴翠顏何年飛至此切莫又飛還

咏古

司馬琴挑意文君夜遁心可知身未老便有白頭吟

繡毬花

天上仙人打玉毬輓來多少碧枝頭山僧懶費閒心力
坐看清風踢不休

古松

良托名山斤斧無和寒暑雨色仍敷青枝猶在秦何在
笑爾封渠作大夫

古硯石

奇峰爲筆石爲硯池水烟籠噴墨香萬象森羅皆是字
寫成今古大文章

講經臺

高士曾茲宣貝葉空餘臺石挂藤蘿莫言後代無人講
泉樹風雲口更多

洗月池

嫦娥似不耐高秋面上輕雲暗帶愁夜半偶經池裏浴
玉顏從此更風流

早梅

草木蕭蕭雪未休數枝新放暗香浮花中亦有真豪傑
地凍天寒也出頭

偶成

晚節榮華世所希
古人何事獨歔歛
重陽過後還登眺
箇箇青山著錦衣

偶咏

散步春風花灼灼
閒吟夜月草芊芊
空林密徑無人識
惟任山僧去復旋

對雪

六花一夜染瓊枝
小小青山白髮垂
屋裏年年飛不到
滿頭何故亦如斯

釋大寧

字石潮別號笠山雙溪傳氏子也崇禎末寇亂父母轉徙困苦不能自存十餘歲寄食隣庵披緇為僧日從事齋鐘粥鼓間未嘗知學也浪杖人掃塔浮渡過其庵呼與語器之錄為侍者時

年踰二十矣始令讀儒書上口較能闇誦若夙記者聞杖人說法肌骨理解神悟頓超自是手不釋卷貫通內外典其所撰法語及世諦文字援筆立成距初識字時纔五稔耳與竹菴梅逢諸公受杖人記蒞主席天界寺繼素雲歸再應江右新城之請移錫福山宗風益振及棲霞竹公既寂而世遂以浪公滴乳首奉笠山矣康熙壬子秋方建佛殿子簫曲拈捃瘠瘁感微疾沐浴禮佛而終年四十餘所著卮稿莊我等書行世語錄數十卷歲福山予采方外諸公詩強半出山足斧公手授茲卮稿一帙則得自滌岑陳子者陳子又誦其見贈詩二首因併錄之

山中雜詩

竹門藤花開岑寂
自幽適孤倚松上雲
群奔澗中石著
我出世書刈我壠
西麥悠然獨往情
流泉亂阡陌落日
生涼風天香拂枕席

對松吟二首

老枝不苦青恥學尚顏色孤盤荒徑傍行者賴休息光
薄兩跳九空陰匪幽黑下視棟梁材委質受繩墨反喜
藤與蘿相附爲高直
秦皇最可笑強官青松枝豈知彼不受至今居山隱喪
却繁華兒耐盡寒風吹千秋只此物誰比凌雲姿我將
作古佛禮之忘歲時

輓石開瓊公同參

卯齋院裏別不覺十五年公死何郡縣行脚皆浪傳同
參子與我豈讓鼇山賢天地一古夢海嶽幾點烟秋使
暮雲瘦春將枯卉鮮此性已無本誰能知其然哭作招
魂詩交道賴以全拭淚望遠岫風神如在焉

寄方羽南

遙想冶塘人幽遁在空翠湖水映茅茨湖雲拂衣被烟
舩春風搖雁字秋天至案上一函開波際數鷗睡早晚
心神清鐘聲出山寺何時提杖來一了疇昔意

哭母

我昔念生死我母許別離倏忽廿五載一身無定期擬
參大事畢願學睦州師梅花屋初構接母恨太遲遣舟
未旬日我母遽棄遺溯流駕孤舟哀哀泣河湄旣無母
可奉徒有學佛兒佛登忉利天度母展化儀我愧無神
足我母難追隨但依佛垂教七七琅函披我母久念佛
心淨如蓮枝生天固不必西方願所宜母生極樂國見

佛承提持永坐寶華上勿爲兒愛移

張南村過山堂夜話次日同步萬松看梅

城南此山深客至慰幽寂天風吹夜寒奔濤半峰擊
坐傾淡懷素心竟難覓詰朝過翠岑看花博閒適雲際
空香來講堂隔松壁我返君遂留春雨滿林滴

天目大師來訪卽歸巢庵

遠從江上來支杖向山寺相別遽十年各自行其志寄
託果何爲斯道尚獨至盤桓宜盡言此懷念深闕林外
孤鳥還松風動高吹篋笥出詩篇吟咏見宏遠峰陰夕
照翻爽色破空翠睥睨千古流感遇豈無事憐茲知己
情真誠不容易細大有所關淺近奚足異鬚髮共驚霜

坐臥起遐思暫晤今又歸片帆忽天際

弘濟方丈題贈蒲菴和尚

大江橫脚下日夕波流奔空光渺無際孤帆來天根一
室層雲上雄踞敞高軒中有織蒲老事母如世尊清興
發長嘯聲與寒波翻此意自千古相對難具論明月夜
深出獨起窺巖門

答訪魏惟度

一榻清涼山不知在城郭日夕多遐心超然脫糟粕春
風吹樹林春雲映江閣我來逢出遊空堂自花萼令子
語意殊留坐亦成樂只尺烏龍潭隨步度丘壑

種豆歌

龍民風雅卷六十四九

我昔開山自種豆，豆未萌芽草先透。日夕去草草青青，
草青豆苗出難秀。努力去草存豆苗，所去未盡又蘇蘇。
可憐豆苗不得長，蘇蘇之草隨風搖。豆苗豆苗知我苦，
青草青草何不腐。正喜晴光曬草根，草根未死復逢雨。

送陳坦山明府歸武陵歌

八月重尋松下來，言別江門舟將開。旅懷詩草我初閱，
名人序跋皆雄才。喜君性情最超逸，三載金陵寓僧室。
遊興翩然隨遇安，奚囊唱和無虛日。老僧一榻隣半峰，
蠟屐詩瓢屢過從。高秋覓句送君返，長江兩岸開芙蓉。
芙蓉嬌艷傍秋水，直向洞庭霜曉裏。家山遠隔洞庭湖，
洞庭湖盡家可指。君家武陵卽桃源，此中山水稱絕倫。

只恐避秦人尚在，鷄鳴犬吠桃花根。桃花遠近皆烟邨，
歸家得失不足道。應將桃源山水重討論。

投贈藥地和尚

挂錫文殊草懸空，有薜蘿不容黃菜出。惟許白雲過衍，
易宗通佛譚莊怪。入魔睡殘蝴蝶醒，涼月向秋多。

雨花臺

細草沿山綠，春風徧酒壘。屐從今日問，花傍舊祠開。
江暝人俱散，月明僧獨來。逍遙一曠覽，鐘磬起峰隈。

棲霞歸過藥師菴訪完樸兄

適逢春曉際，雙屐度江岑。入郭問香刹，到門聞磬音。
山房開逕曲，池水映堦深。日暮難言別，殷勤說此心。

梅花雜咏

漁家環水在，花亦逐江開。赤听少人立，青天獨鳥來。春心奚足問，冬意莫相猜。爲此衝寒色，常時坐釣臺。

聞人說山中佳處

深谷有人住，山田隨力開。種茶依白石，采藥破蒼苔。結屋樹相倚，補衣雲共裁。一溪流水外，唯見鳥飛來。

牛首

烟開天闕迥，絳屋滿青岑。石磴松根轉，山樓磬響沉。春郊含落照，幽徑適孤心。却憶黃梅老，初從此地尋。

壽遠峰琮子

吾子逢生日，應思顧復人。出家存萬世，學道報雙親。白

業根初熟，青山宅永隣。何期冰雪裏，窺見劫前春。

送劉海門大叅之粵東

千里春江外，雲山天際看。心隨明月動，夢向夕陽安。香浦花初暖，羅浮雪不寒。石城言別處，迢遞望晴瀾。

送安士之湖上二首

片帆天際下，因識舊遺民。去泛湖頭月，還尋谷口人。孤山原在水，獨鶴不爲隣。樵盡梅花影，難教冰雪春。

一湖春水綠，隨意作浮家。僧住听邊寺，鷗眠烟際沙。小舟依柳葉，深磬出桃花。殊慰孤征者，悠然對落霞。

大悲閣題贈智公

一閣開林麓，崔嵬出衆峰。虛窗含遠景，杳靄入深松。香

雨淨僧意苔床散鶴蹤晚聞鐘磬罷瞻眺興猶濃

天濟大師書來却寄

南北一江隔天涯何處尋夢隨疎磬斷詩向別峰吟友
道古難得師門今易任遠懷應有共風雨念山深

喜劉仕詒書法華經成

書經十二部端爲報親恩一字不容怠三年未出門焚
香存佛念禮像憶慈言人子應如此傳家孝有源

周元亮大叅枉過

白晝空山靜松門忽到車一茶分野席半日坐荒廬方
外逢高韻人間傳異書縱談各理好秋色滿階除

哭子林球子

子病經多月曾無愁愠顏化時猶右臥別夢欲西還洒
淚向斜照焚身來遠山佛聲師友送知不戀人間

贈方聖子

弘濟今年寓江流何混茫詩囊臨水石屐齒帶冰霜天
外雲光白松間月色蒼此懷都莫問風雨到山堂

輓楊季采

寄我書猶在空憐夢未圓論文如昨日謝世已經年殘
雪人間事孤雲鳥外天有心應不滅春樹問啼鵲

寄胡柏庵

時有渡江夢孤懷歷歲深暮雲歸鳥意春樹野人心岸
草青連屋山花紅滿林好知千古事明月幾回尋

登廻瀾磯

獨登孤嶼望天逐大荒流晚照開江底春烟集岸頭僧
隨山影定鷗與鏡光浮四顧蒼茫裏風帆此暫留

宿廻瀾磯下

江半依山宿波平亦有聲孤舟危石繫片月遠空生長
鏡中涵影橫峰上出城一鐘烟際落魂夢爽然清

友人至

前歲廬山去春江今始來一帆收白鷺雙屐到蒼苔叅
話疑應豁藏詩篋不開長干舊遊處花鳥絕相猜

舟次上河間王汾仲宅聞出遊未返

宅傍垂楊處伊人尚未歸江隨春水濶雲出晚山微詩

爲懷深述書因地近稀平生何事業風雨一柴扉

送澹遂現姪省覲歸粵

來是曹溪路還從庾嶺歸江干生客夢天際念慈幃法
乳新禪板烟霜舊葛衣白雲遙在望心與日俱飛

廬山

空青萬仞傍湖橫五老香鑪雪可耕瀑布如從天上落
石梁宛入鏡中行六朝開士疑猶在千里遊人夢不成
欲向莽蒼深靜處任間茅屋聽松聲

山居二首

燒芋烹茶此碧岑從來絕境少人尋坐殘榻上雲歸久
睡熟門前花落深古佛經函慵更展寒山詩句喜頻吟

老僧不是忘機客，纔說無心已有心。
蒼茫曉色忽黃昏，此意分明不可言。
雲上數峰容我嘯，溪前片月待誰論。
松杉日與鳴禽靜，瀑水時同過雨奔。
怪問如何貪木石，青山中有一乾坤。

寄懷木立和尚

盱江兩寺定幡風，緇白親承古鏡中。
選社不知天地別，放身原識鳥魚同。
墨池落筆翻波黑，屐齒殘花踏雨紅。
歸到廩山閒把翫，留予相對漫譚空。

雨中寄鄧元昭太史

欣逢涼雨灑芳洲，回憶青蓮太史樓。
萬竹自宜棲鶯鶯，一溪應許到鳧鷗。
座中客滿吟詩好，江上花開載酒遊。

只恐日邊丹詔至，不容高臥北山秋。

浮山

浮山直似少陵詩，平裏含奇未易知。
衆壑翠從當路潑，九華青許隔江窺。
淺深巖洞僧棲穩，高下烟雲客到疑。
雷雨連朝春水足，峰根白處卽湖湄。

蒼翠庵看梅尋寄公不值

曲徑通幽又一門，花光交錯出山園。
主人未返香堪護，客子相延日已昏。
想到羅浮空入夢，吟來東閣實驚魂。
雖憐春事將三月，賴得天寒是舊恩。

松風閣贈張瑤星

登到松風景自殊，軒窓蒼莽帶平蕪。
榻前獨見青山滿，

江上斜飛白鳥孤，嘯落高巖狂阮籍，談空絕嶼傲林逋。
常將雙眼窺河漢，月映春郊醉一壺。

贈楊古度

老入江南混俗居，身輕時已七旬餘。鄉園事事都憑夢，
旅舍年年只著書。擬向象先窺所以，却來松下問何如。
偶然談到吾無隱，風送秋香滿草廬。

題畫

一雪滿江干，孤舟釣客寒。誰知烟水上，最好是冬殘。

崇先寺

崇先寺在臯亭前，歇祖開山是宋年。門外桃花紅十里，
不知溪上有人烟。

送枹山大師之關中省親

之秦省覲正春寒，不畏孤筇行路難。見說終南山最好，
可能寄我數峰看。

湖頭

湖頭古木已全虛，嫩綠新紅總不如。唯有孤山林處士，
梅花還剩兩三株。

胡星卿索題三友圖

多年寄托傍孤村，夢裡雲山好共論。碩果苦寒顏色在，
江南猶有此株存。

張南村訪吳興太守近聞在一山，寺度夏兼閱藏。
聞入山中較梵華，尋人只作問烟霞。歸舟應待秋江晚。

一路芙蓉看到家

至雙溪

廿里河干綠柳遮中開
一半野棠花泊舟獨上溪樓望
空外橫青是九華

留別方太華

先樞三年閏子山多君
旦晚獲松關今朝移向金陵去
魂夢猶依雙渡間

秦淮曲二首

是誰溪上打歌聲
手把花枝步嬾行
賒得酒家三白酒
携來春樹就啼鶯

今日城南遊雨花
明朝桃葉弄琵琶
囊空那有閒錢使

典却春衣醉落霞

贈陳滌岑樞部二首

何須郭外看東山
屋後高樓萬竹間
風雨著書消歲月

乾坤留得此人閒

晨齋日復理踈筠
風度何如谷口人
能隱市廛山自遠

孤亭直與九華隣

釋弘智

字無可別稱藥地即翰林方公以智也甲申

出至齋後轉側苗尚遂棄家為僧當路前後欲強之
堪怡然樂之得法于天界覺浪盛公任江右青原
山法化大行期眾萬指山有七祖倒插荆枯數百
年至是復樂人以為思公再來公會通三教志在
因法救法剝爛貫穿著書數百卷承三世淵源窮
盡差別乃決從來理窟寔與膠葛灼然無疑而備
開物成務之用聖域祖燈可謂絕學集大成矣公
為人平恕飲人以和教人以無我為過關因物為

音耶 居牙 卷六十四
適當慎獨于未發明微于中節尤諄諄于好學毋
自欺兩言人有一長輒稱之不吝口扣擊者未嘗
不反覆開示惟恐其不盡其所以愛才造就之者
世內外不可勝數歿之日聞者莫不為之流涕焉
和陶飲酒九首 辛卯梧州米舍作 尚白倡之

論詩于陶不必其飲酒二十首也和者風其風
耳栗里如故葛巾常著豈非天乎予雖不飲倘
然若醉不飲非戒亦非不戒予當為淵明受雙
非之戒

北窓草木盛壁立如深山四顧雖無人可歌不可言短
歌四五字上下常千年終古北窓下一片心誰傳
子安問黃鵠萬里將安飛八極紛茫茫中路能無悲三
萍飄大海風波還相依安得如潮頭朝夕自言歸一經

離亂中盛年忽已衰有心不敢惟有口當猗違
衰柳蔽秋日黃花紛落英慨然一念至一往無人情不
知地氣熱不知天河傾溪水日夜流蟋蟀隨時鳴哀樂
所不受樂得蟬蛩生

荆扉當谷口一徑臨流開逍遙足千古想見前人懷珍
重此顛沛自問何當乖所見不空曠長林如羈棲出門
風以雨杖屨皆汗泥洗洋任蒙莊志怪聽齊諧直下無
可悟悟者天然迷途窮亦常事何用慟哭回
自然林藪命何論天一隅風波卷地起蓬海皆危塗一
進不能退枉為世所驅到處容木榻抱膝原無餘自非
一莖草廣廈難安居

我聞鄱陽岸尚有淵明宅潯陽彭澤路所至傳遺跡亂
後村烟少千家不滿百匡廬三疊泉至今飛空白予時
寫一紙自病自愛惜
嘗翻博物志流覽神異經飛身不可信黃冶知無成篝
燈對古人開卷常三更風雨不出戶披衣周中庭閉目
若有見兩耳時一鳴蠹魚成神仙此是天地情
豈少五斗米乃公多一仕貧賤分所甘何必求知已青
蠅爲弔客自聽溝渠耻獨以老親故凄然念鄉里老大
愛忘事甲子猶可紀人傳鳳凰山枳棘非所止寧且隨
鷓鴣一枝良可恃
修士多顧忌吾寧率吾真末世風俗薄猶喜山中淳終

歲無聞見但道禾苗新雖歷干戈後口不言胡秦茅屋
各相望永無車馬塵始知衡山懶無異丈人勤遠公不
飲酒偏與陶公親飽食但高枕絕跡不問津有時濯清
流漉以手中巾古今不同調同是羲皇人

梅川奇峰行

梅川西山麓奇峰拔地起截取陽朔道劍鋒四十里削
立數百尺嶮絕成塹壘鬼斧劈崑崙其頂大于趾幔亭
似武夷但少九曲水懸瀑似龍湫莫以剪刀比金精舊
仙窟避世聊徙倚赤面望三巘環巒如列指移家冠石
者種茶采蘭芷俗聽無終約學滿公超市鷄犬喧雲間
子弟甘蓬蘽我來自黎川峰頂熟相視送我遊三巖伏

虎且枕几踰月過碧開寫此伸長紙諸公皆古處相聚
藝經史唐述許津逮靈威藏宛委笑傲此閩苑烟塵脫
傲屣呼風拍掌歌一聲長不死

寄施尚白少叅

水舍遂一紀竹關別九年山谷與冷齋此自多生緣憑
空飛寶蓋傳是臨江仙猶意蒼梧夢寄語到黎川飛峽
曹溪路急流同刺船歸宗披舊衲大呼三疊泉山中開
路人太息非偶然君建瓔珞幢我揮牯牛鞭萍逢西江
口舊榻知新懸隨場布薰風四野無荒田是壤皆可擊
是簾皆可屢藥籠一莖草瓦竈薑棗煎請君試吞吐瓶
水傾雲天匡廬草堂在早寫香山篇冬雪中立春句報

梅花先

隨余老師及諸公遊春浮遯圃

春浮四十年遂作愚公谷手造此山川兀然超往復鞭
石成島磯挿草爲古木方輿收圖記山載文人福今隨
吾師杖別展鴻濛目蓬萊幾回淺謨觴失書屋野水波
浩浩梅檀藏岸曲中洲無片瓦林杪巢鳴鵠將立神道
碑饗堂建其麓老僧啞然笑遊者觀不足未有此山先
高深媚幽獨

二林

雙林古道多荒草北面之麓此間好不煩樓鑰辯三笑
且誦往來成二老誓文鑱石讀勿哀草堂香谷花常開

龍眠下筆開生面古今杖屨欣然來可惜靈運一去不
回首可惜淵明不載東林酒獨賞宗家解臥遊一木一
石皆不朽舉鐵如意來此庭化城猶隔殘沙汀渾身坐
在青青裏不說青山青又青

五老行

亂世尋山恐不深三峽九疊千樹林古人欲識廬山面
何人能識廬山心五老峰上看雲海襟江帶湖原不改
五老峰下瞿唐傾白虹噴沫驅雷霆懸巖無路死躋攀
捫蘿濺水號鬼關等閒借得樵人斧劈破西天造北戶
重陽日真第一山有靈我有筆關同郭熙寫不出請叫
一聲千年畢千年饒有題詩人雕鏤刻畫皆不真自非

放眼長空者此心那與名山親廬山有心問五老五老
面面對人好眼前半句聊草草一世機鋒此間掃

廬山問

廬山問客幾時到客除箬笠仰天嘯九州定數幾嶺高
五嶽惟稱華山峭南方雁宕勝天台武夷還讓陽朔道
江湖久慕天池名一生結尾來登眺山公自知實不如
問客曾翻宛委唐述之奇書當面未識匡公廬皮相此
老何其迂蘇迷廬是山川祖欲遊不在中華土三界鯤
鵬卮寓言脚跟依舊桑麻園此去君鄉本不遠今始識
面恨君晚君請吟我知音此山淺其中深匡公名目東
西林高人達士爭相尋名山自有名山筆五老獨得江

湖心

與黃俞邵

高者高深者深平者平有溪有江有滄溟有日有月有
列星或為瞿塘太行阪或為原野或都城蝴蝶丹青是
誰染草木夭矯何多情蠹魚亦具神仙福大鼎正須薪
火烹天予手筆不可負只是莫與時人爭

讀愚山集因畫得浮雲一洗萬峰出

愚山生就名山筆十洲五岳供塗乙瑤石瓊林浴天日
波搖霧合風馳疾我欲贊歎不能悉為畫子春島上絃
歌室忽然潑墨得句一浮雲一洗萬峰出

寄曾止山

蒼梧水舍投滴血匡廬竹關兩面鐵送君一篇不可說
至今枕子夢寒熱感恩只在潛龍訣隨寓垂簾路自別
君住懸崖四壁絕黃龍白鷺關心切近聞遠遊挾短策
其家日貧日好客且喜新詩變一格渴且鈎斬憐羽翮
若肯穿破玄黃眼青白得輿亦可行蠻貊

鐵笛歌

為季蘆夫子作

讀書鼓琴真樂窩吾曾見李季光為之仰天歌以才老
韻駕古語吾曾見張伯雨為之題樂府恒山鳥當上留
田壽巖遺老存長篇自是黍離配三閣却喜富春門下
重新編乃者鐵笛圖片紙作賦幸有偃佺子壺山畔隱
更采藥秉燭南汪判經史想像鶴髦華陽巾江海弄出

梅花痕高樓聽雨綽山醉遊絲墮地琴傳神總此一聲
裂金石古人發揮天地碧撐腸萬卷喙三尺乃以七孔
試霹靂箕山瓢裏呼吾師扶桑日落田家移聊借鐵老
加鑪錘鼠肝鵬背同支離忽然覲面不相識重展此幅
長太息門墻班草藉香林蒼莽堆頭破顏色我欲聞此
笛此笛不可聞但見飛流驅石雷霆奔秋風雁影崩層
雲窮子叩盃作何曲布鼓當軒拍直木須知瓦缶藏黃
鐘萬古鳳凰鳴嶰谷

一覽歌

南北竒峰數不足溪邊見者三十六百尋削鐵無寸土
拔笋成林染青綠丁香鬼面蟹瓜皺李成郭熙皆逡巡

從來圖書恨優孟凌空倒景難傳真我乘竹筏至其下
流峙相鮮應接暇崖鱗嶂角爭拏雲魚龍起舞鸞驂駕
乃登天游一覽亭仙掌玉華扶隱屏胡麻剩水茶洞傾
忽然粉碎蓬萊青峰峰盤髻皆可上栖真避亂兩無恙
接梯負米不言勞烟嵐簇擁巢居壯南遊虎嘯一綫天
携率玉版環滂泉北則水雲與水簾馬頭鷹背鐵郎穿
東則獅子王慢把溪口西則鼓樓三教收平川最高三
仰碧霄洞蜂窠衆峽行長扉桃源火焰雙石門倒水分
溪各相送此山崛起一百二十里中流白戰成壁壘勿
令茅塞竒山水不覺墨酣伸五指請看懸瀑試人誰過
關問取拄杖今朝閒

禮佛

雪山冰化水只破一微塵
餓是生來飯灰翻死過人
掀天猶有手下地本無身
黑焰車輪火燒雲寄老親

庚寅仲冬自南洞繫出

本爲林藪客自小耻公卿
抱筆知無命封刀豈望生
國恩三世重覺路一身輕
大笑西風裏何方非化城
哭弟直之

鋒頭經八載度日強沉吟
一綫緇衣命千迴白髮心
在筵方待刃設榻痛亾琴
仗汝空中力因風返故林

度梅嶺

此嶺原無險征夫勞不辭
開山留漢姓鑿路識唐碑
但

有松千尺難求梅一枝
古今南北淚非但爲流離

白香山草堂

多謂青衫濕名山灑墨痕
寫詩留寺院將佛作兒孫
雖發匡廬誓終歸履道園
但傳雲確語讀者爲招魂

答長干舊韻似旻昭覺岸

高岡謝踈雨獨立自泠泠
空數南朝寺休傷東冶亭
江留天外白山洗晉時青
木末遊人少松濤不許聽

新竹

中德傳奇遠社文初諸子

白日壺中冷依人滿坐陰
一生全是節出世竟何心
天地果然碧門墻從此深
松風相問答原不望知音

和笠山韻

竹皆衝碧落松更挂青蘿石不隨流去秋先送葉過略
知醫用藥閒許病來魔掃蕩殘昏曉涼風嶺上多

乙巳元旦中適呈二律因而拈此

第一書雲句誰來問得親下流驚白浪高者畏紅塵朔
定千秋曆冬知四季春苦心輪扁手難以告他人
山泉惟一味藥自備溫涼背謝青天日毫生白紙霜壁
非龍窟穴雲是鶴家鄉萬卷藏何處看看老去忘

與徐仲調高阮懷閒叙

平生詩五變不識是何聲落雁水中字寒蟬秋尚鳴老
知當日病衰讓少年行熟唱文殊問唇牙自不爭

次信公遊青原韻二首

文山遊青原詩云鐘魚閒日月竹樹老風烟一
徑溪流滿四山天影圓無言都是趣有想便成
緣夢破啼猿雨開元六百年空庭橫蟪蛄斷碣
偃龍蛇活火叅禪筍清泉透佛茶晚鐘何處雨
春水滿城花夜影燈前客江西七祖家

古今相見處一點自生烟屋背青天落潭心白日圓鷓
鴒啼不歇蝴蝶夢何緣請看山門字題來四百年
石關真似象藤路不疑蛇塔護黃荆樹爐烹碧乳茶晴
雲知夜雨冬雪發春花共說龍潭夢多生到此家

寄梅子長

朗三之子

夢吟當日句僧老六朝松高枕三更雪寒林一陣風讀

書原有種遯世不逃空土竈桑薪火簞瓢足送窮

出杉關入閩口號四首

水窟山不盡過嶺又漂萍喜作長橋屋多修過路亭是
村喧水碓種藥屬茅丁翁鬱峻响裏鐘聲許客聽
怪石連山起灘高人不愁推篷三扇箬臨水五層樓櫓
更纏麻石厨皆信規溝編椽抄束紙枕席市中收
福城原覆瓦榕樹老街坊乳橘隨蕉實黃彈雜荔香釀
留紅麴酒果薦白糖霜更喜臨島石芙蓉翠滿堂
此地無榆杏奇材剝卷杉甜諸藟紫菜番菊勝紅藍鯽
墨蝦須杖鱗花鱟尾帆邇來嚴禁澣珍品寫空函

鯉湖漫興

谷口傳鳴鼓峰頭起落星珠簾穿雪月丹竈煮雷霆氣
吐雲根白詩開天眼青奇山待奇筆畫出與誰聽

難中示中履

北都南徼外白刃剩家庭我老惟高枕兒曹善抱經鑊
湯爲五岳風浪驗三萍喜汝生憂患應無媿汗青

處取名
汗青關

回東山石展東文燈巖

癖好窟山水勾雲覲面皴晴秋逢勝地此事讓閒人觀
瀑能醫病臨池亦養神松風容几席白紙最相親

鼓櫂漫興

多年山有夢今日始逢君九曲乘秋水諸峰學夏雲草

音韻通雅卷之四
堂遺額在丹竈借香薰定踏天遊頂從吾指掌分

梅花十首

仙迴西溪梅花十里巖伯玉引至此不覺呻吟
第一天心只愛寒東風珍重寫來難眼開便見千秋白
蕊破先傳五葉丹黍谷吹成香道路蘆笙解唱玉闌干
真人面目誰能識壁立崖前仔細看

繞屋扶疎本故鄉化成蓬影自翱翔久知鐵是前生骨
偶爾風傳蠻地香掌上折盤驚割水眉間挂劍冷吹光
千年却遇悲歌者一紙投空淚數行

步障銀鈎罩曲阿四天螺黛散毘羅衣飛小白巖前像
雪擁空青海裏波癡坐竟拋班草杖飽看懶唱採薇歌

不勞帝釋珠宮雨埋怨空生漏洩多

向爲花神作誓文荆榛櫟社任紛紛東皇難保無風雨
西岸何緣脫斧斤憶遠忽同千里色叅天能隔幾重雲
玻璃嚼碎敲空問鐵笛橫吹揔不聞

雷擊冰山浪濊天草鞋何異鐵爲船素車哭盡山陰雪
白練平穿谷口烟玄夢鳳凰誰吐出粉身蝴蝶在春前
可容破帳支籬壁自植松根靠一椽

巉巖石骨倚香林零雨連旬滿地陰忽挂神州天盡月
暗傳盤古歲寒心檐低索笑如澆酒紋斷無絃久碎琴
一片魂成華表鶴唳空長作海潮音

霧收蒼峽覓林光返照紅塵夾路長天女當空無異色

行人到此不聞香詞壇豈可誇胡粉窮谷何緣點壽陽
惟有冰心在溪水任他老死白雲鄉

攔路先封沒字碑逢君鐵筆送鉗鎚九泥枉費當關種
樂府翻驚出塞吹鬢斷西州空托夢灰飛東閣恨題詩
普天一窖槎枒骨雪上加霜好剔眉

慘慄傷心此一回腥風匝地苦相催慘知漠北春無草
哀寄江南信不來天上招魂非筆墨空中埋玉免塵埃
和根擲向蓬萊外枉費深山瘠土栽

桃源留得漢家春草木當時善避秦瘴癘未聞花變色
風霜直以句投人寧甘化作三江水那可飄同五市塵
歲歲一場年少夢惟餘老幹自鱗皴

聽人彈琴作

莫是佯爲河上謳移情苦海舊滄洲木魚可當蘇門嘯
落雁彈成異國秋藥罷烹葵愁客餓詩終削草聽江流
却憐漢曲關山月直過千年劫後留

水井和施尚白懷元次山

荒亭猶足換良辰抱甕烹茶久作隣歷盡滄桑留此水
可憐天地重詩人濁流懶照緇衣面長袖能揮青草塵
坐定枯腸爲君洗猗玗洞裏血痕新

在梧州水舍作粥飯主二年待刃而已旣放回因

拈示彭孔哲何叔鑑

圍城玉貌不言功蹈海還齊久看空避世仍憑三寸筆

渡人常送半江風孤蓬死後輪猶轉兩路歸時夢自同
此去廚牀隨地設不將經典語遼東

同素臣露坐蘧庵門外

翡翠山前屋一椽開門橘柚晚生烟桃源飲食惟留飯
栗里聲音不在絃洞裏星知當日客湖中月載古來天
此番相對蒲團影吞却逍遙內七篇

再咏三疊泉

三峽巴江似直流疊溪屏嶂幾層收

周武改疊州以其山水層疊也今為

溪水綃剪破裁雲幔銀漢斜傾作玉溝畫角鼓聲催急

雨

朱璟以雨點論鼓法鼓角一通為一疊

陽關笛曲送深秋

唐有陽關三疊

誰將

折筆圖成後

書家用三折筆

可挂松風最上樓

弘景三層樓

壬辰除夕歸省白鹿度歲於海門江口

此回蓬徑果桑田竊比遺民入社緣

遺民即麟之從遠公事佛而養其父

久望里中如北塞得依膝下即西天詩題且記廬山臘

雪浪從過海口年長跪南浮荒草地伽梨兩袖雨潸然

和白門梅花韻四首

萬代皆傷此日寒枯腸冰冷墨痕乾人間屬和千篇易
世外傳真一筆難還是深山還太古不知大地不平安
逢場眼見繁華盡翻笑雕虫興未闌

舊家手跡白描新想像羅浮見不親雙鬢久忘江北信
一枝空憶嶺南春晚聽玉珮疑山鬼坐取金壺寫谷神
古木懸崖難得到除非鐵骨再來人

刀鎗林裡轉身難說甚桃源老幹殘敗竹那能藏隱士
孤松未免作秦官種留野寺安灰冷雪識天心重歲寒
同一陸沉翻白浪覆舟山後豎橈看
年年忍凍不曾閒臘底春風自往還脂粉掃來惟白戰
根芽托處只青山畫成女字枝無葉點作吳妝苔有斑
折向寒窻無可寄一時飛舞墨池間

涉江阮仙諸公送任高座竹軒閉關

竹影虛堂破竈寒衆人舉火勸加餐原來座上拈花易
畢竟城中乞食難千古風傳今日笑六朝雲入夕陽殘
面前木末鍾山在當作匡廬絕壁看

次杜于皇見贈韻

錢椎直碎玉連環隻履何須度雪山筆下尚愁前世累
刀頭信得古人閒白毫對月休看指黃面焚香莫厚顏
但叫蒼天能瓦解半空劈破鳳林關

大雨夜過臥蛟樓同寓公默公分得先字

過海還鄉木榻懸臥蛟樓信舊龍眠爲君破涕成花雨
隨手傾瓶洗碧天燭影燒殘前世夢詩魂銷入此聲先
墨池乾盡灰難畫仍種寒山父祖田

墓前號忌

銜土成墳忽一年霜風滑路草屨穿漏瓢滿飲先天藥
秃筆愁荒後世田痛湊三杯茶當酒枉燒四壁紙爲錢
長號倒地千層斷迸作人間破竈烟

題金精洞示諸公

百丈陰崖朽柱支一門塞却水簾垂
佳人舊說能遺世遊子傳神只是詩
家在峰頭親過劫書藏洞裏古來疑
蓮花八歲能彈指笑殺男兒面壁時

余老師過泃林

葛蘿松柏嶺烟平夾路黃花重晚晴
幸有青山殘瓦礫尚容白髮舊師生
秋添兩袖雲霞色溪和三門鈴鐸聲
大笑泃林橋上影蒼蒼下視甚分明

登快閣次魯直韻

百尺高樓聳出城遠峰沙嶼喜冬晴
古人到處心常在此意從來說不明
破瓦千家黃草裏江帆幾點白雲橫

杖藜一過誰知者惟有浮鷗是舊盟

得施愚山書約來年遊黃山

年來三疊煮山茶笑得臨江送落花
正借青原爲白社又期黃海浴朱砂
焦村路上乘朝霽石筍岡頭看晚霞
丘壑未忘閒養老夕陽不畏亂雲遮

和江在湄見贈韻

水磨竹杖不沾塵信得青山待客真
直木歌逢新拍板讀書聲愛故鄉人
十洲夢醒詩如畫九曲花開秋亦春
浮渡報親庵有約寒巖樹下屋相因

同錢飲光李磊英入裴村口作

扁舟一筆老來同天地藏身托畫工
出世相逢黃葉裏

有人先住碧雲中
信知巖壑非凡骨
且拾滄洲入藥籠
對面寫成歌擊節
何須雀躍問鴻濛

偶題

年年芳樹一番風
誰信桃源滿地紅
憶斷梅花看不見
從來春在有無中

匡山懷古

三疊千年少客尋
黃巖一望卽知音
當時太白香山輩
乘興看山總不深

與蔣用弢語

岳江猶有石倉基
盛事興公譜荔支
一自林鴻傳雅調
三山樓閣盡能詩


與徐器之語

霧霧老將舊登壇
招客如雲宴道山
乾海吹灰猶有夢
越王臺下草斑斕

萬曆庚申阮堅之先生倡
道山詩社一時和者百人

茶坑

百里山坑盡種茶
御園久廢落民家
雲窩自造熏籠片
先采漳州穀雨芽





書